

欽定舊唐書

卷之十
十八

後晉司空同中書門下平章事劉 昫撰

本紀第十八上

武宗

武宗至道昭肅孝皇帝諱炎穆宗第五子母曰宣懿皇后韋氏元和九年六月十二日生於東宮長慶元年三月封潁王本名漚開成中加開府儀同三司檢校吏部尚書依百官例逐月給俸料初文宗追悔莊恪太子殂不由道乃以敬宗子陳王成美爲皇太子開成四年冬十月宣制未遑冊禮五年正月二日文宗暴卒宰相李

珽知樞密劉弘逸奉密旨以皇太子監國兩軍中尉仇士良魚弘志矯詔迎賴王於十六宅曰朕自嬰疾疹有加無瘳懼不能躬總萬機日釐庶政稽於謨訓謀及大臣用建親賢以貳神器親弟賴王灑昔在藩邸與朕常同師訓動成儀矩性稟寬仁俾奉昌圖必諧人欲可立爲皇太弟應軍國政事便令權勾當百辟卿士中外庶臣宜竭廼心輔成予志陳王成美先立爲皇太子以其年尚冲幼未漸師資比日重難不遑冊命迴踐朱邸式協至公可復封陳王是夜士良統兵士於十六宅迎太弟赴少陽院百官謁見於東宮思賢殿三日仇士良收

捕宣詔院副使尉遲璋殺之屠其家四日文宗崩宣遺
詔皇太弟宜於柩前卽皇帝位宰相楊嗣復攝冢宰十
四日受冊於正殿時年二十七陳王成美安王溶殂於
邸第初楊賢妃有寵於文宗而莊恪太子母王妃失寵
怨望爲楊妃所譖王妃死太子廢及開成末年帝多疾
無嗣賢妃請以安王溶嗣帝謀於宰臣李珣珣非之乃
立陳王至是仇士良立武宗欲歸功於已乃發安王舊
事故二王與賢妃皆死二月制穆宗妃韋氏追諡宣懿
皇太后帝之母也上御正殿降德音以開府右軍中尉
仇士良封楚國公左軍中尉魚弘志爲韓國公太常卿

崔鄆戶部尚書判度支崔珙並本官同中書門下平章
事勅二月十五日立元皇帝降生日宜爲降聖節休假
一日三月詔宮人劉氏王氏並爲妃勅朔望入閣對刑
法官是日非便宜停五月中書奏六月十二日皇帝載
誕之辰請以其日爲慶陽節祔宣懿太后于太廟初武
宗欲啓穆宗陵祔葬中書門下奏曰園陵已安神道貴
靜光陵二十餘載福陵則近又修崇竊惟孝思足彰嚴
奉今若再因合祔須啓二陵或慮聖靈不安未合先旨
又以陰陽避忌亦有所疑不移福陵實協典禮乃止就
舊墳增築名曰福陵又奏准今年二月八日赦文應京

諸司勒留官令本處剋留手力雜給與攝官者臣等檢
詳諸道正官料錢絕少雜給手力卽多今正官勒留亦
管公事料錢少於雜給刻下事未得中臣等商量其正
官料錢雜給等錢望每貫割留二百文與攝官餘並如
舊從之秋七月制檢校禮部尙書華州刺史陳夷行復
爲中書侍郎同平章事八月十七日葬文宗皇帝于章
陵知樞密劉弘逸薛季稜率禁軍護靈駕至陵所二人
素爲文宗獎遇仇士良惡之心不自安因是掌兵欲倒
戈誅士良弘志鹵簿使兵部尙書王起山陵使崔稜覺
其謀先諭鹵簿諸軍是日弘逸季稜伏誅門下侍郎同

平章事楊嗣復檢校吏部尚書潭州刺史充湖南都團
練觀察使中書侍郎同平章事李珣檢校兵部尚書桂
州刺史充桂管防禦觀察等使御史中丞裴夷直爲杭
州刺史皆坐弘逸季稜黨也易定軍亂逐節度使陳君
賞君賞鳩合豪傑數百人復入城盡誅謀亂兵士軍中
復安九月以淮南節度使檢校尚書左僕射李德裕爲
吏部尚書同中書門下平章事尋兼門下侍郎以宣武
軍節度使檢校吏部尚書汴州刺史李紳代德裕鎮淮
南帝在藩時頗好道術修攝之事是秋召進士趙歸真
等八十一人入禁中於三殿修金籙道場帝幸三殿於

九天壇親受法籙右拾遺王哲上疏言王業之初不宜崇信過當疏奏不省十一月鹽鐵轉運使奏江淮已南請復稅茶從之魏博節度使何進滔卒三軍推其子重霸知留後事

會昌元年正月壬寅朔庚戌有事於郊廟禮畢御丹鳳樓大赦改元二月壬寅以淮南節度使檢校吏部尚書李紳爲中書侍郎同平章事中書奏南宮六曹皆有職分各責官業卽事不因循近者戶部度支多是諸軍奏請本司郎吏束手閑居今後請祇令本行分判委中書門下簡擇公幹才器相當者轉授從之車駕幸昆明池

賜仇士良紀功碑詔右僕射李程爲其文三月貶湖南
觀察使楊嗣復湖州司馬桂管觀察使李珣瑞州司馬
杭州刺史裴夷直驩州司戶宰臣李德裕進位司空三
月壬申宰相李德裕諫夷行崔珙李紳等奏憲宗皇帝
有恢復中興之功請爲百代不遷之廟帝曰所論至當
續議之事竟不行贈故中書令晉國公裴度太師山南
東道蝗害稼造靈符應聖院於龍首池四月辛丑勅憲
宗實錄舊本未備宜令史官重修進內其舊本不得注
破候新撰成同進時李德裕先請不遷憲宗廟爲議者
沮之復恐或書其不善之事故復請改撰實錄朝野非

之五月辛未中書門下奏據六典隋置諫議大夫七人
從四品上大曆二年昇門下侍郎爲正三品兩省遂闕
四品建官之道有所未周詩云衮職有闕仲山甫補之
周漢大臣願入禁闥補過拾遺張衡爲侍郎爲居帷幄
從容諷諫此皆大臣之任故其秩峻其任重則敬其言
而行其道况蹇諤之地宜老成之人秩未優崇則難用
耆德其諫議大夫望依隋氏舊制昇爲從四品分爲左
右以備兩省四品之闕向後與丞郎出入迭用以重其
選又御史中丞爲大夫之貳緣大夫秩崇官不常置中
丞爲憲臺之長令寺監少卿少監司業少尹並爲寺署

之貳皆爲四品中丞官名至重見秩未崇望昇爲從四品從之六月有禿鶯鳥集於禁苑庚子夜五更小流星五十餘旁午流散制以魏博兵馬留後何重霸檢校工部尚書魏州大都督府長史充天雄軍節度使仍賜名重順中書奏請依姚璿故事宰相每月修時政記送史館從之以衡山道士劉玄靖爲銀青光祿大夫充崇玄館學士賜號廣成先生令與道士趙歸真於禁中修法籙左補闕劉彥謨上疏切諫貶彥謨爲河南府戶曹勅自前中外上封論事有所糾舉則請留中今後竝云請付御史臺不得云留中不下如事關軍國理須宥密不

在此限如臺司勘當後若得事實必獎奉公苟涉加誣
必當反問告示中外明知此意七月己巳北方有流星
經天良久關東大蝗傷稼襄郢江左大水彗復出室壁
之間八月迴鶻烏介可汗遣使告難言本國爲黠戛斯
所攻故可汗死今部人推爲可汗緣本國破散今奉太
和公主南投大國時烏介至塞上大首領唄沒斯與赤
心宰相相攻殺赤心率其部下數千帳近西域天德防
禦使田牟以聞烏介又令其相頡于迦斯上表借天德
城以安公主仍乞糧儲牛羊供給詔金吾大將軍王會
宗正少卿李師偃往其牙宣慰令放公主入朝賑粟二

萬石九月幽州軍亂逐其帥史元忠推牙將陳行素爲
留後三軍上章請符節朝旨未許十月幽州雄武軍使
張絳遣軍吏吳仲舒入朝言行泰慘虐不可處將帥之
任請以鎮軍加討許之十月誅行泰遂以絳知兵馬使
車駕校獵咸陽十一月丁酉朔壬寅夜大星東北流其
光燭地有聲如雷山崩石隕其彗起於室凡五十六日
而滅太和公主遣使入朝言烏介自稱可汗乞行策命
緣初至漢南乞降使宣慰從之十二月中書門下奏修
實錄體例舊錄有載禁中之言伏以君上與宰臣公卿
言事皆須衆所聞見方可書於史冊且禁中之語在外

何知或得之傳聞多涉於浮妄便形史筆實累鴻猷今
後實錄中如有此色並請刊削又宰臣與公卿論事行
與不行須有明據或奏請允愜必見褒稱或所論乖僻
因有懲責在藩鎮上表必有批荅居要官啓事者自有
著明並須昭然在人耳目或取捨存於堂案或與奪形
於詔勅前代史書所載奏議罔不由此近見實錄多載
密疏言不彰於朝聽事不顯於當時得自其家未足爲
信今後實錄所載章奏並須朝廷共知者方得紀述密
疏並請不載如此則理必可法人皆向公愛憎之志不
行褒貶之言必信從之李德裕奏改修憲宗實錄所載

吉甫不善之迹鄭亞希旨削之德裕更此條奏以掩其
迹指紳謗議武宗頗知之

二年春正月丙申朔以撫王紘爲開府儀同三司幽州
大都督府長史充幽州盧龍節度大使以雄武軍使張
絳檢校左散騎常侍兼幽州左司馬知兩使留後仍賜
名仲武中書奏百官議九宮壇本大祠請降爲中祠宰
相崔瑛陳夷行奏定左右僕射上事儀注二月丙寅中
書奏准元和七年勅河東鳳翔鄜坊邠寧等道州縣官
令戶部加給課料錢歲六萬二千五百貫吏部出得平
留官數百員時以爲當自後戶部支給零碎不得觀察

使乃別將破用徒有加給不及官人所以選人憚遠不
樂注受伏望令部都與實物及時支還諸道委觀察判
官知給受專判此案隨月支給年終計帳申戶部又赴
選官人多京債到任填還致其貪求罔不由此今年三
銓於前件州府得官者許連狀相保戶部各備兩月加
給料錢至支時折下所冀初官到任不帶息債衣食稍
足可責清廉從之太子太師致仕蕭俛卒牂柯南詔蠻
遣使入朝三月遣使冊迴紇烏介可汗以振武麟勝節
度使銀青光祿大夫檢校尙書右僕射單于大都護兼
御史大夫彭城郡開國公食邑二千戶劉沔可檢校右

僕射兼太原尹北京留守充河東節度管內觀察處置
等使代符澈時廻紇在天德命沔以太原之師討之四
月乙丑朔光祿大夫守司空兼門下侍郎平章事李德
裕銀青光祿大夫守右僕射門下侍郎平章事崔珙銀
青光祿大夫中書侍郎同平章事李紳金紫光祿大夫
檢校司徒兼太子太保牛僧孺等上章請加尊號曰仁
聖文武至神大孝皇帝戊寅御宣政殿受冊十月九日
甫至十四日轉甚乃改用二十三日時有織人告中尉
仇士良言宰相作赦書欲減削禁軍衣糧馬草料士良
怒曰必若有此軍人須至樓前作鬧宰相李德裕等知

之請開延英訴其事帝曰奸人之詞也召兩軍中尉諭之曰赦書出自朕意不由宰相况未施行公等安得此言士良惶恐謝之是日晴霽中書奏元日御含元殿百官就列唯宰相及兩省官皆未開扇前立於欄檻之內及扇開便侍立於御前三朝大慶萬邦稱賀唯宰相侍臣同介冑武夫竟不拜至尊而退酌於禮意事未得中臣等請御殿日昧爽宰相兩省官鬪班於香案前俟扇開通事贊兩省官再拜拜訖升殿侍立從之天德奏迴紇族帳侵擾部內勅勸課種桑比有勅命如能增數每歲申聞比知並無遵行恣加翦伐列於鄜市賣作薪蒸

自今州縣所由切宜禁斷五月勅慶陽節百官率醪外
別賜錢三百貫以備素食合宴仍令京兆府供帳用追
集坊市樂人天德軍使田牟奏迴紇大將盟沒斯與多
覽將軍將吏二千六百人請降遣中人齎詔慰勞之宰
相李德裕兼守司徒太子太師致仕鄭單卒六月甲子
朔火星犯木丙寅太白犯東井迴紇降將盟沒斯將吏
二千六百餘人至京師制以盟沒斯檢校工部尚書充
歸義軍使封懷化郡王仍賜姓名曰李思忠以迴紇宰
相受耶勿爲歸義軍副使檢校右散騎常侍賜姓名曰
李弘順七月嵐州人田滿川據郡叛劉沔誅之八月迴

紇烏介可汗過天德至杞賴峰北俘掠雲朔北川詔劉
沔出師守鴈門諸關迴紇首領屈武降幽王授左武衛
將軍同正詔以迴紇犯邊漸侵內地或攻或守於理何
安令少師牛僧孺陳夷行與公卿集議可否以聞僧孺
曰今百寮議狀以固守關防伺其可擊則用兵宰相李
德裕議以迴紇所恃者盟沒赤心耳今已離叛其強弱
之勢可見戎人獷悍不顧成敗以失二將乘忿入侵出
師急擊破之必矣守險示弱虜無由退擊之爲便天子
以爲然乃徵發許蔡汴滑等六鎮之師以太原節度使
劉沔爲迴紇南面招討使以張仲武爲幽州盧龍節度

使檢校工部尚書封蘭陵郡王充迴紇東面招討使以
李思忠爲河西党項都將迴紇西南面招討使皆會軍
於太原制以皇子峴爲益王岐爲兗王皇長女爲昌樂
公主第二女爲壽春公主第三女永寧公主上御麟德
殿見室韋首領督熱論等十五人太原奏迴紇移帳近
南四十里索叛將盟沒斯昨至橫水俘虜兼公主上表
言食盡乞賜牛羊事賜烏介詔曰朕自臨寰區爲人父
母唯以好生爲德不願黷武爲名故自彼國不幸爲盟
沒斯所破來投邊境已歷歲年撫納之間無所不至初
則念其饑歉給以糧儲旋則知其破傷盡還馬價前後

遣使勞問交馳道途小小侵擾亦盡不計今可汗尙此
近塞未議還蕃朝廷大臣四方節鎮皆懷疑忿盡請與
師雖朕切務含弘亦所未諭一昨數使迴來皆言可汗
只待馬價及令付之次又聞所止屢遷或侵掠雲朔等
州或劫奪羌渾諸部未知此意終欲如何若以未交馬
價須近塞垣行止之間亦宜先告邊將豈有倏來忽往
遷徙不常雖云隨逐水草動皆逼近城柵遙揣深意侶
恃姻好之情每覩蹤由實爲馳突之計况到橫水柵下
殺戮至多蕃渾牛羊豈恠馳掠黎庶何罪皆被傷夷所
以中朝大臣皆云迴紇近塞已是違盟更戮邊人實背

大義咸願因此翦逐以雪殂謝之寃然朕志在懷柔情
深屈已寧可汗之負德終未忍於幸災石戒直久在京
城備知人實憤惋發於誠懇固請自行嘉其深見事機
不能違阻可汗審自問遂速擇良圖無至不悛以貽後
悔詔太原起室韋沙陀三部落吐渾諸部委石雄爲前
鋒易定兵千人守大同軍契苾通何清朝領沙陀吐渾
六千騎趨天德李思忠率迴紇党項之師屯保大柵十
月吐蕃贊普卒遣使論普熱入朝告哀詔將作少監李
璟入蕃吊祭帝幸涇陽校獵白鹿原諫議大夫高少逸
鄭朗等於閣內論陛下校獵太頻出城稍遠萬機廢弛

星出夜歸方今用兵且宜停止上優勞之諫官出謂宰相曰諫官甚要朕時聞其言庶幾減過

三年春正月以宿師于野罷元會勅新授銀州刺史本州押蕃落銀川監牧使何清朝可檢校太子賓客左龍武大將軍令分領沙陁吐渾党項之衆赴振武取劉沔處分二月先詔百官之家不得於京城置私廟者其皇城南向六坊不得置其閑僻坊曲卽許依舊置太原劉沔奏昨率諸道之師至大同軍遣石雄襲廻鶻牙帳雄大敗廻鶻於殺胡山烏介可汗被創而走已迎得太和公主至雲州是日御宣政殿百寮稱賀制曰夫天之所

廢難施繼絕之恩人之所棄當用悔亡之道朕每思前
訓豈忘格言迴鶻比者自恃兵強久爲桀鷲凌虐諸鄰
結怨近鄰黠曼斯潛師彗掃穹居瓦解種族盡膏於原
野區落遂至於荆榛今可汗逃走失國竊號自立遠踰
沙漠寄命邊陲朕念其衰殘尋加賑卹每陳章表多詐
諛之詞接我使臣如全盛之日無傷禽哀鳴之意有困
獸猶鬪之心去歲潛入朔川大掠牛馬今春掩襲振武
逼近城池可汗皆自率兵首爲寇盜不恥破敗莫顧姻
親河東節度使劉沔料敵伐謀乘機制勝發胡貉之騎
以爲前鋒塞翎侯之旗伐彼在穴短兵鏖於帳下元惡

扶於穀中况乘匪六飛衆纔一旅儲備已竭計日可擒
太和公主居處不同情義久絕懷土多思亟聞黃鵠之
歌失位自傷寧免綠衣之歎念其羈苦常軫朕心今已
脫於豺狼再見宮闕上以摠宗廟之宿憤次以慰太皇
太后之深慈永言歸寧良用欣感其迴紇旣以破滅義
在翦除宜令諸道兵馬使同進討河東立功將士已下
優厚賞給續條疏處分應在京外宅及東都修功德迴
紇並勒冠帶各配諸道收管其迴紇及摩尼寺莊宅錢
物等並委功德使以御史臺及京兆府各差官點檢收
抽不得容諸色人影占如犯者並處極法錢物納官摩

尼寺僧委中書門下條疏聞奏以麟州刺史天德行營副使石雄爲銀青光祿大夫檢校左散騎常侍崖州刺史御史大夫充豐州西城中城都防禦本管押蕃落等使劉沔檢校尚書左僕射張仲武檢校尚書右僕射餘並如故黠戛斯使注吾合素入朝獻名馬二匹言可汗已破迴鶻迎得太和公主歸國差人送公主入朝愁迴鶻殘衆奪之於路帝遂遣中使送注吾合素往太原迎公主時烏介可汗中箭走投黑車子詔黠戛斯出兵攻之三月太和公主至京師百官班于章敬寺迎謁仍令所司告憲宗穆宗二室四月昭義節度使劉從諫卒三

軍以從諫姪積爲兵馬留後上表請授節鉞尋遣使齎詔潞府令積護從諫之喪歸洛陽積拒朝旨詔中書門下兩省尙書御史臺四品已上武官三品已上會議劉積可誅可宥之狀以聞五月勅諸道節度使置隨身不得過六十人觀察使不得過四十人經畧都護不得過三十人築望仙觀於禁中宰臣百寮進議狀以昆戎未殄塞上用兵不宜中原生事潞府請以親王遙領令積權知兵馬事以俟邊上罷兵獨李德裕以爲澤潞內地前時從諫許襲已是失斷自後跋扈難制規脅朝廷以積豎子不可復踐前車討之必殄武宗性雄俊曰吾與

德裕同之保無後悔自是諫官上疏言不可用兵相繼

六月西內神龍寺災左軍中尉楚國公仇士良卒秋七月戊子宰相奏秋色已至將議進軍幽州須早平迴鶻鎮魏須速誅劉稹各須遣使諭旨兼值三鎮軍情今日延英面奏聖旨欲遣張賈充使臣等續更商量張賈幹濟有才甚諳軍中體勢然性剛負氣慮不安和不如且命李回若以臺綱闕人卽兵部侍郎鄭涯久爲征鎮判官情甚精敏雖無詞辯言事分明官重事閑最似相稱上曰不如令李回去卽遣回奉使三鎮八月壬戌火星自七月蒼赤色動搖井中至是月十六日犯輿鬼萬年

縣東市火黠戛斯使諦德伊斯難珠入朝以右僕射平章事陳夷行檢校司空兼河中尹御史大夫充河中節度晉絳慈隰觀察等使九月制定天下者致風俗於大同安生人者齊法度於畫一雖晉之樂趙家有舊勲漢之韓黥身爲佐命至于亂紀律罔不梟夷禁暴除殘古今大義故昭義節度劉悟頃居海岱嘗列爪牙屬師道阻兵王師問罪三面開網一境離心乘此危機遂能歸命憲宗嘉其誠欵授以南燕穆宗待以腹心委之上黨招致死士固護一方迨于末年已虧臣節劉從諫生稟戾氣幼習亂風因跋扈之資以專封壤恃紀綱之力

以襲兵符暫展執珪之儀終無上壽之請陳駒爲喻魏
豹姑務於絕河井蛙自居孫述頗聞于恃險誘受亡命
妄作妖言中罔朝廷潛圖左道接壤戎帥屢奏陰謀顧
髮亂之所矜豈淵魚之是察泊乎沈痼曾靡哀鳴猶駐
將盡之魂恣行邪僻之志罔或奮拔自樹狡童中使授
醫莫覩其朝服近臣銜命不入於壘門逆節甚明人神
共棄其贈官及先所授官爵并劉稹在身官爵宜並削
奪成德軍節度使王元逵魏博節度使何弘敬或姻連
王室或任重藩維懇陳一至之誠願揚九伐之戰吳漢
任職受詔而初無辦嚴卜式朴忠未戰而義形於色况

成德軍嘗以梟騎橫陣首破朱滔戰氣方酣再迴魯陽
之日鼓音不息三騎不周之山魏博軍頃以大旆涉河
竟殲師道建十二郡之旗鼓以列降人削六十年之厲
階盡歸皇化士傳餘勇軍有雄名必能稟鄴侯之指縱
成葛亮之心伐咨爾二師朕所注懷元達可本官充北
面招討澤潞使弘敬充東面招討澤潞使曩者列祖在
藩先天啓聖符瑞昭晰彩繪煥於泗亭鑿輅巡遊金石
刻於代邸寔謂可封之俗久爲仁壽之鄉寇難以來頗
著誠節必非同惡咸許自新其昭義舊將士及百姓等
如保初心並赦而不問如能捨逆效順以州郡兵衆歸

降者必厚加封賞如能擒送劉稹者別授土地以報勲庸頃隨劉悟鄆州舊將校子孫既有義心宜思改悔如能感喻劉稹束身歸朝必當待之如初特與洗雪爾等舊校亦並酌勞仍委夷行劉沔王茂元各進兵同力攻討其諸道進軍並不得焚燒廬舍發掘墳墓擒執百姓以爲俘囚桑麻田苗各許本戶爲主罪止元惡務拯生靈於戲蕃維大臣抗疏於外髦俊舊老昌言於朝戒朕以祖宗之法不可私一族刑賞之柄所以正萬邦宜用甲兵陳於原野雖朕以恩不聽而群臣以義固爭詢自僉謀諒非獲已布告中外明體朕懷仍以徐泗節度使

李彥佐爲澤潞西南面招討使河陽節度使王茂元以本軍屯萬善彥佐制下後踰月未出師朝廷疑其持重乃以天德軍石雄爲彥佐之副劉稹牙將李丕降用爲忻州刺史以陳許節度使王宰充澤潞南面招討使河陽節度使王茂元卒贈司徒王宰代茂元總萬善之師十月宰相監修國史李紳兵部郎中史館修撰判館事鄭亞進重修憲宗實錄四十卷頒賜有差晉絳行營副招討石雄奏收賊砦五以河東節度使劉沔檢校司空兼滑州刺史御史大夫充義成軍節度鄭滑濮觀察等使以荆南節度使檢校右僕射同平章事李石可檢校

司空平章事兼太原尹北都留守充河南節度管內觀察等使十一月勅中外官員過爲繁冗量宜減省以便軍民宜令吏部條疏合減員數以聞十二月王宰奏收天井關榆杜行營都將王逢奏兵少乞濟師詔太原軍二千人赴之初劉沔破迴鶻留三千人戍橫水至是李石以太原無兵抽橫水戍卒一千五百人以赴王逢是月二十八日橫水軍至太原請出軍優給舊例每一軍絹二疋時劉沔交代後軍庫無絹石以已絹益之方可人給一疋便催上路軍人以歲將除欲候過歲期旣速軍情不悅都頭楊弁乘士卒流怨激之爲亂

四年春正月乙酉朔以澤潞用兵罷元會其日楊弁逐太原節度使李石勅齋月斷屠出於釋氏國家創業猶近梁隋卿相大臣或公茲弊鼓刀者旣獲厚利糾察者潛受請求正月以萬物生植之初宜斷三日列聖忌斷一日仍准開元二十二年勅三元日各斷三日餘月不禁壬子河東監軍使呂義忠收復太原生擒楊弁盡斬其亂卒百寮稱賀二月甲寅朔丁巳制晉絳河中慈隰等州節度觀察等使中散大夫檢校左散騎常侍河中尹御史大夫上柱國博陵縣開國男食邑三百戶崔元式可檢校禮部尙書兼太原尹北都留守充河東節度

觀察等使戊午夜太白犯鎮星辛酉太原送楊弁與其
同惡五十四人來獻斬於狗脊嶺三月以晉絳副招討
石雄爲澤潞西面招討以汾州刺史李丕爲副以道士
趙歸真爲左右街道門教授先生時帝志學神仙師歸
真歸真乘寵每對排毀釋氏言非中國之教蠹耗生靈
盡宜除去帝頗信之四月王宰進軍攻澤州五月以司
農卿薛元賞爲京兆尹六月金紫光祿大夫尙書右僕
射中書侍郎同平章事判度支崔珙貶澧州刺史癸丑
勅諫官論事所見不同連狀署名事同糾率此後凡論
公事各隨己見不得連署姓名如有大政奏論即可連

署制追削故左軍中尉仇士良先授官及贈官其家財並籍沒士良死後中人於其家得兵杖數千件兼發士良宿罪故也勅責授官銀青光祿大夫澧州刺史上柱國安平郡開國公食邑二千戶崔珙再貶恩州司馬員外置以珙領鹽鐵時欠宋滑院鹽鐵九十萬貫帝令度支鹽鐵轉運合爲一使七月以淮南節度使檢校司空杜棕守尚書右僕射兼門下侍郎同平章事仍判度支充鹽鐵轉運等使又制銀青光祿大夫守尚書右僕射兼門下侍郎同平章事監修國史上柱國趙郡開國公食邑二千戶李紳可檢校司空平章事揚州大都督府

長史淮南節度副大使知節度事吏部條奏中外合減
官員一千一百一十四員王元逵奏邢州刺史裴閭別
將高元武以城降洺州刺史王釗磁州刺史安玉以城
降何弘敬山東三州平潞州大將郭誼張谷陳楊廷遣
人至王宰軍請殺積以自贖王宰以聞乃詔石雄率軍
七千入潞州誼斬劉積首以迎雄澤潞等五州平八月
戊戌王宰傳積首與大將郭誼等一百五十人露布獻
於京師上御安福門受俘百寮樓前稱賀以魏博節度
使檢校尚書右僕射同平章事何弘敬進封廬江郡開
國公食邑二千戶以成德軍節度使王元逵檢校司空

兼太子太師同平章事進封太原郡開國公食邑二千
戶宰相李德裕守太尉進封衛國公加食邑一千戶以
兵部侍郎翰林學士承旨崔鉉爲中書侍郎同平章事
河東節度使陳夷行卒九月以天德軍使晉絳行營招
討使石雄檢校兵部尚書河中尹兼御史大夫河中晉
絳慈隰等州節度使以前山南東道節度使盧鈞檢校
尚書左僕射潞州大都督府長史充昭義軍節度使澤
潞邢洛觀察等使以忠武軍節度使陳許蔡等州觀察處
置等使河陽行營諸軍招討使金紫光祿大夫檢校尚
書右僕射兼御史大夫上柱國太原郡開國公食邑二

千戶王宰檢校司空太原尹北都留守充河東節度管
內觀察處置等使制曰逆賊郭誼等狐鼠之妖依丘穴
而作固牛羊之力得水草而逾兇久從叛臣皆負逆氣
劉從諫背德反義掩賊藏姦積其怙亂之謀無非親吏
之計劉公直安全慶等各憑地險屢抗王師每肆悖言
常懷革面况郭誼王協聞邢洺歸欵懼義旅覆巢賣孽
童以圖全據堅城而請命昔伍被詣吏不免就誅延岑
出降終亦夷滅致之大辟無所愧懷郭誼劉公直王協
安全慶李道德李佐堯劉積積母阿裴積弟曹九滿郎
君郎妹四娘五娘從兄洪卿漢卿周卿魯卿匡堯張谷

男涯解愁陳楊廷弟宣男醜奴張益男歡郎三寶門客
甄戈伎術人郭諗蔣黨李訓兄仲京王涯姪孫羽韓約
男茂章茂寶王番男珪等並處斬于獨柳勅以河陽三
城鎮遏使爲孟州割澤州隸焉與懷孟澤爲節度號河
陽制以皇子愕爲開府儀同三司夏州刺史朔方軍節
度大使時党項叛命親王以制之十月車駕幸鄆縣十
一月幸雲陽十二月勅郊禮日近獄囚數多案欸已成
多有翻覆其兩京天下州府見繫囚已結正及兩度審
案伏欸者並令先事結斷訖申時左僕射王起頻年知
貢舉每貢院考試訖上榜後更呈宰相取可否覆人數

不多宰相延英論言主司試藝不合取宰相與奪比來
貢舉艱難放人絕少恐非弘訪之道帝曰貢院不會我
意不放子弟卽太過無論子弟寒門但取實藝耳李德
裕對曰鄭肅封敖有好子弟不敢應舉帝曰我比聞楊
虞卿兄弟朋比貴勢妨平人道路作楊知至鄭朴之徒
並令落下抑其太甚耳德裕曰臣無名第不合言進士
之非然臣祖天寶末以仕進無他伎勉強隨計一舉登
第自後不於私家置文選蓋惡其祖尙浮華不根藝實
然朝廷顯官須是公卿子弟何者自小便習舉業自熟
朝廷間事臺閣儀範班行准則不教而自成寒士縱有

出人之才登第之後始得一班一級固不能熟習也則子弟成名不可輕矣

五年春正月己酉朔勅造望僊臺於南郊壇時道士趙歸真特承恩禮諫官上疏論之迺英帝謂宰臣曰諫官論趙歸真此意要卿等知朕宮中無事屏去聲技但要此人道話耳李德裕對曰臣不敢言前代得失只緣歸真於敬宗朝出入宮掖以此人情不願陛下復親近之帝曰我爾時已識此道人不知名歸真只呼趙練師在敬宗時亦無甚過我與之言滌煩爾至於軍國政事唯卿等與次對官論何須問道士非直一歸真百歸真亦

不能相惑歸真自以涉物論遂舉羅浮道士鄧元起有

志

長年之術帝遣中使迎之繇是與衡山道士劉玄靖及
歸真膠固排毀釋氏而拆寺之請行焉宰臣李德裕杜
棕李讓夷崔鉉太常卿孫簡等率文武百寮上徽號曰
仁聖文武章天成功神德明道皇帝辛亥有事於郊廟
禮畢御承天門大赦天下庚申義安太后崩敬宗之母
也遺令皇帝三日聽政十三日小祥二十五日大祥二
十七日釋服兵部尚書歸融奏事貴得中禮從順變配
祔之禮宜有等差請降服朞以日易月十二日釋服內
外臣寮亦請以其日釋服陵園制度請無降殺從之以

前太原節度使檢校司空李石以本官充東都留守二月戊寅朔太白掩昴之北側諫議大夫權知禮部貢舉陳商選士三十七人中第物論以爲請託令翰林學士白敏中覆試落張瀆李玕薛忱張覲崔稟王湛劉伯芻等七人三月崔鉉罷知政事出爲陝虢觀察使以御史中丞兼兵部侍郎李回本官同平章事夏四月皇第四女封延慶公主第五女封靖樂公主勅祠部檢括天下寺及僧尼人數大凡寺四千六百蘭若四萬僧尼二十六萬五百宰相杜棕罷知政事以戶部侍郎判戶部崔元式同平章事六月丙子勅漢魏已來朝廷大政必下

公卿詳議博求理道以盡群情所以政必有經人皆向道此後事關禮法群情有疑者令本司申尚書都省下禮官叅議如是刑獄亦先令法官詳議然後申刑部叅覆如郎官御史有能駁難或據經史故事議論精當卽擢授遷改以獎之如言涉浮華都無經據不在申聞神策奏修望僊樓及廊舍五百三十九間功畢秋七月庚子勅併省天下佛寺中書門下條疏聞奏據令式諸上州國忌日官吏行香於寺其上州望各留寺一所有列聖尊容便令移於寺內其下州寺並廢其上都東都兩街請留十寺寺僧十人勅曰上州合留寺工作精妙者

留之如破落亦宜廢毀其合行香日官吏宜於道觀其上都下都每街留寺兩所寺留僧三十人上都左街留慈恩薦福右街留西明莊嚴中書又奏天下廢寺銅像鐘磬委鹽鐵使鑄錢其鐵像委本州鑄爲農器金銀鍮石等像銷付度支衣冠士庶之家所有金銀銅鐵之像勅出後限一月納官如違委鹽鐵使依禁銅法處分其土木石等像合留寺內依舊又奏僧尼不合隸祠部請隸鴻臚寺其大秦穆護等祠釋教旣已釐革邪法不可獨存其人並勒還俗遁歸本貫充稅戶如外國人送還本處收管八月制朕聞三代已前未嘗言佛漢魏之後

像教寢興是由季時傳此異俗因緣染習蔓衍滋多以至於蠹耗國風而漸不覺誘惑人意而衆益迷泊於九州山原兩京城闕僧徒日廣佛寺日崇勞人力於土木之功奪人利於金寶之飾遺君親於師資之際違配偶於戒律之間壞法害人無逾此道且一夫不田有受其飢者一婦不蠶有受其寒者今天下僧尼不可勝數皆待農而食待蠶而衣寺宇招提莫知紀極皆雲構藻飾僭擬宮居晉宋齊梁物力凋瘵風俗澆詐莫不由是而致也况我高祖太宗以武定禍亂以文理華夏執此二柄足以經邦豈可以區區西方之教與我抗衡哉貞觀

開元亦嘗釐革剷除不盡流衍轉滋朕博覽前言旁求
輿議弊之可革斷在不疑而中外誠臣協予至意條疏
至當宜在必行懲千古之蠹源成百王之典法濟人利
衆予何讓焉其天下所拆寺四千六百餘所還俗僧尼
二十六萬五百人收充兩稅戶拆招提蘭若四萬餘所
收膏腴上田數千萬頃收奴婢爲兩稅戶十五萬人隸
僧尼屬主客顯明外國之教勒大秦穆護祓三千餘人
還俗不雜中華之風於戲前古未行似將有待及今盡
去豈謂無時驅游惰不業之徒已踰十萬廢丹雘無用
之室何啻億千自此清淨訓人慕無爲之理簡易齊政

成一俗之功將使六合黔黎同歸皇化尙以革弊之始
日用不知下制明廷宜體予意制第六女封樂溫公主
第七女封長寧公主中書奏伏見公主上表稱妾某者
伏以臣妾之義取其賤稱家人之禮卽宜區別臣等商
量公主上表請如長公主之例並云某邑公主幾女上
表郡縣主亦望依此例稱謂從之九月火星犯上將十
月乙亥中書奏池水縣武牢關是太宗擒王世充竇建
德之地關城東峯有二聖塑容在一堂之內伏以山河
如舊城壘猶存威靈皆盛於軒臺風雲疑還於豐沛誠
宜百代嚴奉萬邦式瞻西漢故事祖宗嘗行幸處皆令

邦國立廟今緣定覺寺例合毀拆望取寺中大殿材木於東峯以造一殿四面置宮牆伏望名爲昭武廟以昭聖祖武功之盛委懷孟節度使差判官一人勾當緣聖像年代已久望令李石於東都揀好畫手就增嚴飾初興功日望令東都差分司官一員薦告從之十一月甲辰勅悲田養病坊緣僧尼還俗無人主持恐殘疾無以取給兩京量給寺田賑濟諸州府七頃至十頃各於本管選耆壽一人勾當以充粥料十二月車駕幸咸陽給事中韋弘質上疏論中書權重三司錢穀不合相府兼領宰相奏論之曰臣等昨於延英對恭聞聖旨常欲朝

廷尊臣下肅此是陛下深究理本也臣按管子云凡國之重器莫重於令令重則君尊君尊則國安故國安在於尊君尊君在於行令君人之理本莫要于出令故曰虧令者死益令者死不行令者死不從令者死又曰令行于上而下論可不可是上失其威下繫於人也自太和已來其風大弊令出于上非之於下此弊不除無以理國也昨韋弘質所論宰相不合兼領錢穀臣等輒以事體陳聞昔匡衡所以云大臣者國家之股肱萬姓所瞻仰明王所慎擇傳曰下輕其上賤人圖柄則國家搖動而人不靜弘質受人教導輒獻封章是則賤人圖柄

矣蕭望之漢朝名儒重德爲御史大夫奏云令首歲日
月少光罪在臣等上以望之意輕丞相乃下侍中御史
詰問貞觀中監察御史陳師合上書云人之思慮有限
一人不可兼總數職太宗曰此人妄有毀謗欲離間我
君臣流師合於嶺外賈誼云人主如堂群臣如陛陛高
則堂高亦由將相重君臣尊其勢然也如宰相姦謀隱
匿則人人皆得上論至於制置職業固是人主之柄非
小人所得干議古者朝廷之上各守其官思不出位弘
質賤人豈得以非所宜言上瀆明主此是輕宰相撓時
政也昔東漢處士橫議遂有黨錮事起此事深要懲絕

伏望陛下詳其姦詐去其朋徒則朝廷安靜制令肅然
臣等不勝感憤之至弘質坐貶官又奏曰天寶已前中
書除機密遷授之外其他政事皆與中書舍人同商量
自艱難已來務從權便政頗去於臺閣事多繫於軍期
決遣萬機不暇博議臣等商量今後除機密公事外諸
候表疏百寮奏事錢穀刑獄等事望令中書舍人六人
依故事先叅詳可否臣等議而奏聞從之李德裕在相
位日久朝臣爲其所抑者皆怨之自崔鉉杜悰罷相後
中貴人上前言德裕太專上意不悅而白敏中之徒教
弘質論之故有此奏而德裕結怨之深由此言也

六年春正月癸卯朔丁巳左散騎常侍致仕馮定卒贈工部尚書己未南詔契丹室韋渤海群柯昆明等國遣使入朝對于麟德殿兵部侍郎判度支盧商奏諸道兵討伐党項今差度支郎官一人往所在有糧料州郡先計度支給從之己丑渤海王子大之萼入朝東都太微宮修成立元皇帝立宗肅宗三聖容遣右散騎常侍裴章往東都薦獻監察元壽奏前彭州刺史李紱買本州龍興寺婢爲乳母違法貶隨州長史二月壬申朔癸酉以時雨愆候詔京城天下繫囚除官典犯贓持仗劫殺忤逆十惡外罪遞減一等並釋放征党項行營兵士不

得濫有殺傷丁丑左拾遺王龜以父興元節度使起年
高乞休官侍養從之是夜月犯畢大星相去三寸庚辰
以夏州節度使木暨充東北道招討党項使壬午右庶
子呂讓進狀亡兄溫女太和七年嫁左衛兵曹蕭敏生
二男開成三年敏心疾乖忤因而離婚今敏日愈却乞
與臣姪女配合從之乙酉前太子少保劉沔可太子太
保致仕前壽州刺史王鎮貶潞州長史丁亥夜月色少
光至一更一點犯熒惑相去四寸後良久其光燭地在
軫七度壬辰以翰林學士起居郎孫穀爲兵部員外郎
充職以旱停上巳曲江賜宴勅比緣錢重幣輕生人轉

困今新加鼓鑄必在流行通變救時莫切於此宜申先
甲之令以儆居貨之徒京城諸道宜起來年正月已後
公私行用並取新錢其舊錢權停三數年如有違犯同
用鉛錫錢例科斷其舊錢並沒納又勅諸道鑄錢已有
次第須令舊錢流例有布絹價值稍增文武百寮俸料
起三月一日並給見錢一半先給疋段對估時價皆給
見錢貶舒州刺史蘇滌爲連州刺史滌李宗閔黨前自
給事中爲德裕所斥累年郡守至是李紳言其無政故
也以邠寧節度使高承恭充西南面招討党項使丙申
夜月掩牛南星又犯歲星丁酉新羅使金國連入朝辛

丑夜東北流星如桃色赤其光燭地尾迹入大角西流
穿紫微垣三月壬寅上不豫制改御名炎帝重方士頗
服食修攝親受法錄至是藥躁喜怒失常疾旣篤旬日
不能言宰相李德裕等請見不許中外莫知安否人情
危懼是月二十三日宣遺詔以皇太叔光王柩前卽位
是日崩時年三十三諡曰至道昭肅孝皇帝廟號武宗
其年八月葬於端陵德妃王氏祔焉

史臣曰開成中王室寢卑政由闔寺及綴衣將變儲位
遽移昭肅以孤立維城副茲當璧而能雄謀勇斷振已
去之威權運策勵精拔非常之俊傑屬天驕失國潞孽

阻兵不惑盈庭之言獨納大臣之計戎車旣駕亂畧底
寧紀律再張聲名復振足以蹈彰武出師之迹繼元和
戡亂之功然後迂訪道之車築禮神之館棲心玄牝物
色幽人將致俗於大庭欲希蹤於姑射於是削浮圖之
法懲游惰之民志欲矯步丹梯求珠赤水徒見蕭衍姚
興之謬學不悟秦王漢武之非求蓋惑於左道之言偏
斥異方之說况身毒西來之教向欲干禳蚩蚩之民習
以成俗畏其教甚於國法樂其徒不異登僊如文身祝
髮之鄉久習而莫知其醜以吐火吞刃之戲乍觀而便
以爲神安可正之以威韶律之以章甫加以竿融何充

之佞代不乏人非荀卿孟子之賢誰與正論一朝隳殘
金狄燔棄胡書結怨於膜拜之流犯怒於鄙夫之口哲
王之舉不駭物情前代存而勿論實爲中道欲革斯弊
以俟河清昭肅明照聽斯弊矣

武宗本紀二月制穆宗妃韋氏追諡宣懿皇太后帝之母也○新書正月甲午追尊母爲皇太后

太常卿崔鄆戶部尚書判度支崔珙並本官同中書門下平章事○沈炳震曰崔珙之相新書在五月己卯又按崔鄆子開成四年七月己同平章事矣此乃兼官非入相也並字應誤

二年五月宰相李德裕兼守司徒○新書在三年六月辛酉

五年夏四月以戶部侍郎判戶部崔元式同平章事○

新書在大中元年三月沈炳震曰崔元略傳元式于
大中初始入相當從新書

舊唐書卷十八下

後晉司空同中書門下平章事劉 昫撰

本紀第十八下

宣宗

宣宗聖武獻文孝皇帝諱忱憲宗第十三子母曰孝明
皇后鄭氏元和五年六月二十二日生於大明宮長慶
元年三月封光王名怡會昌六年三月一日武宗疾篤
遺詔立爲皇太叔權勾當軍國政事翌日柩前卽帝位
改今名時年三十七帝外晦而內朗嚴重寡言視瞻特
異幼時宮中以爲不慧十餘歲時遇重疾沈綴忽有光

輝燭身蹶然而興正身拱揖如對臣寮乳媪以爲心疾
穆宗視之撫其背曰此吾家英物非心憊也賜以玉如
意御馬金帶常夢乘龍昇天言之於鄭后乃曰此不宜
人知者幸勿復言歷太和會昌朝愈事韜晦群居游處
未嘗有言文宗武宗幸十六宅宴集強誘其言以爲戲
劇謂之光叔武宗氣豪尤不爲禮及監國之日哀毀滿
容接待群寮決斷庶務人方見其隱德焉四月辛未釋
服尊母鄭氏曰皇太后以兵部侍郎翰林學士承旨白
敏中守本官同中書門下平章事以特進守太尉門下
侍郎同平章事上柱國衛國公食邑二千戶李德裕檢

校太尉同平章事江陵尹荆南節度使以中散大夫大
理卿馬植爲金紫光祿大夫刑部侍郎充諸道鹽鐵等
使以成德軍節度使王元逵檢校太保山南西道節度
使王起檢校司空魏博節度使何弘敬淮南節度使李
昇並檢校司空劍南西川節度使崔郾檢校尚書右僕
射同中書門下平章事並如故東都留守李石奏修奉
太廟畢所迎奉太微宮神主祔廟訖東都太廟者本武
后家廟神龍中中宗反正廢武氏廟主立太祖已下神
主祔之安祿山陷洛陽以廟爲馬廐棄其神主而協律
郎嚴郢收而藏之史思明再陷洛陽尋又散失賊平東

京留守盧正已又募得之廟已焚毀乃寄主於太微宮
大曆十四年留守路嗣恭奏重修太廟以迎神主詔百
官叅議紛然不定禮儀使顏真卿堅請歸祔不從會昌
五年留守李石因太微宮正殿圯侈以廢弘敬寺爲太
廟迎神主祔之又下百寮議皆言准故事無兩都俱置
之禮唯禮部侍郎陳商議云周之文武有鎬洛二廟今
兩都異廟可也然不宜置主於廟主宜依禮瘞於廟之
北墉下事未行而武宗崩宣宗卽位因詔有司迎太微
宮寓主祔廢寺之新廟而知禮者非之制皇長男溫可
封鄆王二男涇可封雅王第三男滋可封蘄王第四男

沂可封慶王五月左右街功德使奏准今日五日赦書
節文上都兩街舊留四寺外更添置八所兩所依舊名
興唐寺保壽寺六所請改舊名寶應寺改爲資聖寺青
龍寺改爲護國寺菩提寺改爲保唐寺清禪寺改爲安
國寺法雲尼寺改爲唐安寺崇敬尼寺改爲唐昌寺右
街添置八所西明寺改爲福壽寺莊嚴寺改爲聖壽寺
舊留寺二所舊名千福寺改爲興元寺化度寺改爲崇
福寺永泰寺改爲萬壽寺溫國寺改爲崇聖寺經行寺
改爲龍興寺奉恩寺改爲興福寺勅旨依奏誅道士劉
玄靖等十二人以其說惑武宗排毀釋氏故也今日五

日赦書節文吏部三銓選士祇憑資考多匪實才許觀察使刺史有奇才異政之士聞薦試用又觀察使刺史交代之時冊書所交戶口如能增添至千戶卽與超遷如逃亡至七百戶罷後三年內不得任使又徙流人在天德振武者管中量借糧種俾令耕田以爲業以劔南東川節度使檢校禮部尚書盧商爲兵部侍郎同平章事六月以戶部侍郎充諸道鹽鐵轉運使馬植本官同平章事七月以兵部尚書李讓夷爲劔南東川節度使十月勅太廟祫享合以功臣配其憲宗廟以裴度杜黃裳李愬高崇文等配享以荆南節度使李德裕爲東都

留守十一月有司享太廟其穆宗室文曰皇兄太常博士閔慶之奏夫禮有尊尊而不叙親親祝文稱弟未當請改爲嗣皇帝從之京兆府奏京師百司職田斛斗請准會昌三年例許人戶自送納京師所冀州縣無得欺隱從之以江西觀察使周墀爲義成軍節度使鄭滑觀察等使十二月刑部尚書判度支崔元式奏准七月二日勅綾紗絹等次弱疋段並同禁斷不得織造臣欲與鹽鐵戶部三司同條疏先勘左藏庫令分析出次弱疋段州府卽牒本道官搜索狹小機杼令焚毀其已納到次弱疋段具數以聞上從之

大中元年春正月戊戌朔宮苑使奏皇帝致齋行事內
諸宮苑門共九十四所並令鎖閉鑰匙進內候車駕還
宮則請領從之戊申皇帝有事於郊廟禮畢御丹鳳門
大赦改元制條曰古郎官出牧卿相治郡所以重親人
之官急爲政之本自澆風久扇此道稍消頡頏清途便
臻顯貴治人之術未嘗經心欲使究百姓艱危通天下
利病不可得也爲政之始思厚儒風軒墀近臣蓋備顧
問如其不知人疾苦何以膺朕眷求今後諫議大夫給
事中中書舍人未曾任刺史縣令或在任有贓累者宰
臣不得擬議守宰親人職當撫字三載考績著在格言

貞元年中屢下明詔縣令五考方得改移近者因循都
不遵守諸州或得五考畿府罕及二年以此字人若爲
成政道塗郡吏有迎送之勞鄉里庶民無蘓息之望自
今須滿三十六箇月永爲常式二月丁卯制憲宗第十
七子惕封彭王第十八子惴爲棣王第五子澤爲濮王
第六子潤爲鄂王勅修百福殿以檢校太尉東都留守
李德裕爲太子少保分司東都以給事中鄭亞爲桂州
刺史御史中丞桂管防禦觀察等使二月丁酉禮部侍
郎魏扶奏臣今年所放進士三十三人其封彥卿崔琢
鄭延休等三人實有詞藝爲時所稱皆以父兄見居重

位不得令中選詔令翰林學士承旨戶部侍郎韋瑋重
考覆勅曰彥卿等所試文字並合度程可放及第有司
考試祇在至公如涉請託自有朝典今後但依常例放
榜不得別有奏聞帝雅好儒士留心貢舉有時微行人
間採聽輿論以觀選士之得失每山池曲宴學士詩什
屬和公卿出鎮亦賦詩餞行凡對臣寮肅然拱揖鮮有
輕易之言大臣或獻章疏卽燒香盥手而覽之當時以
大中之政有貞觀之風焉又勅自今進士放榜後杏園
任依舊宴集有司不得禁制武宗好巡遊故曲江亭禁
人宴聚故也閏三月勅會昌季年併省寺宇雖云異方

之教無損致理之源中國之人久行其道釐革過當事
體未弘其靈山勝境天下州府應會昌五年四月所廢
寺宇有宿舊名僧復能修創一任住持所司不得禁止
四月積慶太后蕭氏崩諡曰貞獻文宗母也六月以義
成軍節度使周墀爲兵部侍郎判度支冊黠戛斯王子
爲英武誠明可汗命鴻臚卿李業入蕃冊拜以金紫光
祿大夫守太子少保分司東都上柱國奇章郡開國公
食邑二千戶牛僧孺守太子太師銀青光祿大夫行太
子賓客上柱國隴西郡開國公食邑二千戶李彥佐爲
太子太保並依前分司以左諫議大夫庾簡休爲虢州

刺史以正議大夫行尚書考功郎中知制誥上柱國崔
輿爲中書舍人以中散大夫前朔州刺史彭陽縣開國
男食邑三百戶令狐綯行尚書考功郎中知制誥秋七
月制以正議大夫尚書戶部侍郎知制誥翰林學士承
旨柱國賜紫金魚袋韋琮以本官同中書門下平章事
以太子少保分司東都衛國公李德裕爲人所訟貶潮
州司馬員外置同正員八月工部尚書中書侍郎平章
事盧商出爲鄂岳觀察使神策軍奏修百福殿成名其
殿曰雍和殿樓曰親親樓凡廊舍屋宇七百間以會諸
王子孫九月前永寧縣尉吳汝納詣闕稱寃言弟湘會

昌四年任揚州江都縣尉被節度使李紳誣奏湘贓罪
宰相李德裕曲情附紳斷臣弟湘致死詔下御史臺鞫
按

二年春正月壬戌宰臣率文武百寮上徽號曰聖敬文
思和武光孝皇帝御宣政殿受冊訖宣德音神策軍修
左銀臺門樓屋宇及南面城牆至睿武樓二月制劔南
西川節度光祿大夫檢校吏部尚書同平章事成都尹
上柱國隴西郡開國公食邑二千戶李回責授湖南觀
察使桂州刺史御史中丞桂管防禦觀察使鄭亞貶循
州刺史前淮南觀察判官魏錡貶吉州司戶陸渾縣令

元壽貶韶州司戶殿中侍御史蔡京貶澧州司馬御史
臺奏據三司推勘吳湘獄謹具逐人罪狀如後揚州都
虞候盧行立劉群於會昌二年五月十四日於阿顏家
喫酒與阿顏母阿焦同坐群自擬收阿顏爲妻妄稱監
軍使處分要阿顏進奉不得嫁人兼擅令人監守其阿
焦遂與江都縣尉吳湘密約嫁阿顏與湘劉群與押軍
牙官李克勳卽時遮欄不得乃令江都百姓論湘取受
節度使李紳追湘下獄計贓處死具獄奏聞朝廷疑其
寃差御史崔元藻往揚州按問據湘雖有取受罪不至
死李德裕黨附李紳乃貶元藻嶺南取淮南元申文案

斷湘處死今據三司使追崔元藻及淮南元推判官魏
鏘并關連人欵狀淮南都虞候劉群元推判官魏鏘典
孫貞高利錢倚黃嵩江都縣典沈頌臣宰節度押牙白
涉鎮遏使傅義左都虞候盧行立天長縣令張弘思典
張洙清陳迴右廂子巡李行璠典臣金弘舉送吳湘妻
女至澧州取受錢物人潘宰前揚府錄事叅軍李公佐
元推官元壽吳珙翁恭太子少保分司李德裕西川節
度使李回桂管觀察使鄭亞等伏候勅旨其月勅李回
鄭亞元壽魏鏘已從別勅處分李紳起此寃訴本由不
真今旣身歿無以加刑粗塞衆情量行削奪宜追奪三

任官告送刑部注毀其子孫稽於經義罰不及嗣並釋
放李德裕先朝委以重權不務絕其黨庇致使冤苦直
到于今職爾之由能無恨歎昨以李威所訴已經遠貶
俯全事體特爲從寬宜準去年勅令處分張弘思李公
佐卑吏守官制不由己不能守正曲附權臣各削兩任
官崔元藻曾受無辜之貶合從洗雪之條委中書門下
商量處分李恪詳驗欵狀蠹害最深以其多時須議減
等委京兆府決脊杖十五配流天德李克勲欲收阿顏
決脊杖二十配流硤州劉群據其欵狀合議痛刑曾効
職官不欲決脊決臀杖五十配流岳州其盧行立及諸

典吏委三司使量罪科放訖聞奏三月己酉兵部侍郎
判度支周墀本官平章事以禮部尚書鹽鐵轉運使馬
植本官同平章事日本國王子入朝貢方物王子善基
帝令待詔顧師言與之對手五月己未日有蝕之六月
己丑太皇太后郭氏崩謚曰懿安憲宗妃穆宗之母也
戶部侍郎兼御史大夫判度支崔龜從奏應諸司場院
官請却官本錢後或有欺隱欠負徵理須足不得苟從
恩蕩以求放免今後凡隱盜欠負請如官典犯贓例處
分縱逢恩赦不在免限從之七月戊午以前山南西道
節度使高元裕爲吏部尚書八月戊子朝散大夫中書

舍人充翰林學士上柱國平陰縣開國男食實封三百戶賜紫金魚袋畢誠爲刑部侍郎九月勅比有無良之人於街市投匿名文書及於箭上或旗幡上縱爲奸言以亂國法此後所由切加捉搦如獲此色便仰焚燼不得上聞十一月兵部侍郎判戶部事魏扶奏天下州府錢物斛斛文簿並委錄事叅軍專判仍與長史通判至交代時具數申奏如無懸欠量與減選注擬勅路隨等所修憲宗實錄舊本却仰施行其會昌新修者仰並進納如有抄錄得勅到並納史館不得輒留委州府嚴加搜捕以戶部侍郎判度支崔龜從本官同平章事銀青

光祿大夫門下侍郎兼禮部尚書同平章事韋琮爲太子詹事分司東都

三年春正月丙寅涇原節度使康季榮奏吐蕃宰相論恐熱以秦原安樂三州及石門等七關之兵民歸國詔太僕卿陸耽往喻旨仍令靈武節度使朱叔明邠寧節度使張景緒各出本道兵馬應接其來以太常卿封敖檢校兵部尚書爲興元尹山南西道節度使三月乙卯勅待詔官宜令與刑法官諫官次對銀青光祿大夫中書侍郎同平章事監修國史上柱國汝南縣開國子食邑五百戶周墀檢校刑部尚書梓州刺史充劔南東川

節度使四月以正議大夫守中書侍郎同平章事集賢
殿大學士賜紫金魚袋馬植爲太子賓客分司東都以
正議大夫守御史大夫上柱國博陵縣開國子食邑五
百戶賜紫金魚袋崔鉉可中書侍郎平章事正議大夫
行兵部侍郎判戶部事上柱國鉅鹿縣開國男食邑五
百戶賜紫金魚袋魏扶可本官平章事五月幽州節度
使檢校司徒平章事張仲武卒三軍以其子直方知留
後事六月癸未五色雲見于京師勅先經流貶罪人不
幸歿於貶所有情非惡逆任經刑部陳牒許令歸葬絕
遠之處仍量事官給棺槨康季榮奏收復原州石門驛

藏木峽制勝六盤石峽等六關訖邠寧張君緒奏今月
十三日收復蕭關御史臺奏義成軍節度使韋讓於懷
真坊侵街造屋九間已令毀拆訖勅於蕭關置武州改
長樂爲威州七月三州七關軍人百姓皆河隴遺黎數
千人見於闕下上御延喜門撫慰令其解辦賜之冠帶
共賜絹十五萬疋八月鳳翔節度使李玘奏收復秦州
制曰自昔皇王之有國也曷嘗不文以守成武以集事
叅諸二柄歸乎大寧朕猥荷丕圖思弘景運憂勤庶政
四載于茲每念河湟土疆絲亘遐闊自天寶末犬戎乘
我多難無力禦姦遂縱腥羶不遠京邑事更十葉時近

百年進士試能靡不竭其長策朝廷下議皆亦聽其直
詞盡以不生邊事爲永圖且守舊地爲明理荏苒於是
收復無由今者天地儲祥祖宗垂佑左衽輸欵邊壘連
降刷恥建功所謀必剋實樞衡妙算將帥雄稜副玄元
不爭之文絕漢武遠征之悔甌脫頓空於內地斥堠全
據於新封莫大之休指期而就况將士等櫛沐風雨暴
露郊原披荆棘而刁斗夜嚴逐豺狼而穹廬曉破動皆
如意古無與京念此誠勤宜加寵賞涇原宜賜絹六萬
疋靈武五萬疋鳳翔邠寧各四萬疋並以戶部產業物
色充仍待季榮叔明李玘君緒各迴戈到鎮度支差脚

支送四道立功將士各具名銜聞奏當議甄酬其秦威
原三州及七關側近訪聞田土肥沃水草豐美如百姓
能耕墾種蒔五年內不加稅賦五年已後重定戶籍便
任爲永業溫池鹽利可贍邊陲委度支制置聞奏鳳翔
邠寧靈武涇原守鎮將士如能於本戍處耕墾營田卽
度支給賜牛糧子種每年量得斛斗便充軍糧亦不限
約定數三州七關鎮守官健每人給衣糧兩分一分依
常年例支給一分度支加給仍二年一替換其家口委
長吏切加安存官健有莊田戶籍者仰州縣放免差役
秦州至隴州已來道路要置堡柵與秦州應接委李玘

與劉臯卽便計度聞奏如商旅往來官健父兄弟通傳家信關司並不得邀詰阻滯三州七關刺史關使將來訓練捍防有效能者並與超序官爵劔南西川沿邊沒蕃州郡如力能收復本道亦宜接借三州七關創置戍卒且要務靜如蕃人求市切不得通有來投降者申取長吏處分嗚呼七關要害三郡膏腴候館之殘趾可尋唐人之遺風尚在追懷往事良用興嗟夫取不在廣貴保其金湯得必有時詎計於遲速今則便務修築不進干戈必使足食足兵有備無患載洽亭育之道永致生靈之安中外臣寮宜體朕意九月辛亥西川節度使

杜棕奏收復維州制曰朕祗荷丕業思平泰階將分邪
正之源冀使華夷胥悅其有常登元輔久奉武宗深苞
禍心盜弄國柄雖已行譴斥之典而未塞億兆之言是
議再舉朝章式遵彝憲守潮州司馬員外置同正員李
德裕早藉門地叨踐清華累居將相之榮唯以姦傾爲
業當會昌之際極公台之榮騁諛佞而得君遂恣橫而
持政專權生事妬賢害忠動多詭異之謀潛懷僭越之
志秉直者必棄向善者盡排誣貞良造朋黨之名肆讒
構生加諸之釁計有踰於指鹿罪實見其欺天屬者方
處鈞衡曾無嫌避委國史於愛壻之手寵秘文於弱子

之身洎叅信書亦引親昵恭惟元和寶錄乃不刊之書
擅敢改張罔有畏忌奪他人之懿績爲私門之令猷又
附李紳之曲情斷成吳湘之寃獄凡彼簪纓之士遇其
取捨之途驕居自夸狡蠹無對擢爾之髮數罪未窮載
闕罔上之由益驗無君之意使天下之人重足而迹皆
讐懼奉面而慢易在心爲臣若斯於法何追於戲朕務
全大體久爲含容雖黜降其官榮尚蓋藏其醜狀而睥
睨未已兢惕無聞積惡旣彰公議難抑是宜移投荒服
以謝萬邦中外臣寮當知予意可崖州司戶叅軍所在
馳驛發遣縱逢恩赦不在量移之限以起居郎庾道蔚

禮部員外郎李文儒並充翰林學士十月辛巳京師地震河西天德靈夏尤甚戍卒壓死者數千人十一月東川節度使鄭涯鳳翔節度使李玘奏修文川谷路自靈泉至白雲置十一驛下詔褒美經年爲雨所壞又令封敖修斜谷舊路以刑部侍郎韋有翼爲御史中丞以職方員外郎鄭處誨兼御史知雜幽州軍亂逐其留後張直方軍人推其衙將周繼爲留後十二月追諡順宗曰至德大聖大安孝皇帝憲宗曰昭文彰武大聖孝皇帝初以河湟收復百寮請加徽號帝曰河湟收復繼成先志朕欲追尊祖宗以昭功烈白敏中等對曰非臣愚昧

所龍及至是上御宣政殿行事及冊出俯僂目送流涕
嗚咽崖州司戶叅軍李德裕卒於貶所

四年春正月以追尊二聖御正殿大赦天下徒流比在
天德者以十年爲限旣遇鴻恩例減三載但使循環添
換邊不闕人次第放歸人無怨苦其秦原威武諸州諸
關先准格徒流人亦量與立限止於七年如要住者亦
聽諸州府縣官如請工假一月已下權差諸廳判官一
月已上卽准勾當例其課料等據數每貫刻二百文與
見判案官添給有故意殺人者雖已傷未死已死更生
意欲殺傷偶然得免並同已殺人條處分二月皇女萬

壽公主出降右拾遺鄭顥以顥爲銀青光祿大夫行起居郎駙馬都尉三月己卯刑部奏監臨主守應將官物私自貸使并貸借人及以己物中納官司者并專知別當主掌所由有犯贓並同犯入己贓不在原赦之限從之以幽州節度副大使檢校工部尚書張直方爲左金吾衛將軍四月勅法司用刑或持巧詐分律兩端遂成其罪旣奸吏得計則黎庶何安自今後應書罪定刑宜直指其事不得舞文妄有援引又刑部奏准今年正月一日勅節文據會昌元年三月二十六日勅竊盜贓至一貫文處死宜委所司重詳定條目奏聞臣等檢校並

請准建中三年三月二十四日勅竊盜贓滿三疋已上
決殺如贓數不充量請科放從之七月丙子大理卿
濛奏古者懸法示人欲使人從善遠罪至於不犯以致
刑措准太和二年十月二十六日刑部侍郎高鉞條疏
准勘節目一十一件下諸州府粉壁書於錄事叅軍食
堂每申奏罪人須依前件節目歲月滋久文字湮淪州
縣推案多違漏節目今後請下諸道令刻石置於會食
之所使官吏起坐觀省記憶條目庶令案牘周詳從之
八月刑部侍郎御史中丞魏謩奏諸道州府百姓詣臺
訴事多差御史推劾臣恐煩勞州縣先請差度支戶部

鹽鐵院官帶憲銜者推劾又各得三司使申稱院官八

數不多例專掌院務課績不辦今諸道觀察與使幕中判

官少不下五六人請於其中帶憲銜者委令推劾如累

推有勞能雪冤滯御史臺關官便令奏用從之九月以

朝請大夫檢校禮部尚書孟州刺史河陽三城節度使

李拭爲太原尹北都留守河東節度等使幽州節度使

周繼卒軍人立其牙將張允伸爲留後十月中書侍郎

平章事魏扶罷知政事十一月己亥勅收復成維扶等

三州建立已定條令制置一切合同其已配到流人宜

准秦原威武等州流例七年放還以戶部侍郎判本司

事令狐綯爲兵部侍郎同平章事十二月以華州刺史周敬復爲光祿大夫檢校左散騎常侍兼洪州刺史江南西道團練觀察使賜金紫

五年春正月甲戌制皇第七子洽封懷王第八子涵爲昭王第九子汶爲康王勅兩京天下州府起大中五年正月一日已後三年內不得殺牛如郊廟享祀合用者卽與諸畜代二月戶部侍郎裴休充諸道鹽鐵轉運等使四月癸卯刑部侍郎劉瑑奏據今年四月十三日已前凡三百四十四年雜制勅計六百四十六門二千一百六十五條議輕重名曰大中刑法統類欲行用之五

月以太原尹河東節度使李拭爲鳳翔節度使李業檢
校戶部尚書太原尹北都留守充河東節度使守司空
門下侍郎太原郡開國伯食邑一千戶白敏中檢校司
徒同平章事邠州刺史充邠寧節度觀察東面招討党
項等使以戶部侍郎判戶部事魏謩本司同平章事七
月宰相監修國史崔龜從續柳芳唐曆二十二卷上之
八月勅公主邑司擅行文牒恐多影庇有紊條章今後
公主除錄徵封外不得令邑司行文書牒府縣如緣公
事令邑司中宗正寺與酌事體施行汝州刺史張義潮
遣兄義澤以瓜沙伊肅等十一州戶口來獻自河隴陷

蕃百餘年至是悉復隴右故地以義潮爲瓜沙伊等州

節度使九月勅條疏刺史交代須一一交割公事與知州官方得離任准會昌元年勅刺史只禁科率由抑配人戶至於使州公廨及雜利潤天下州府皆有規制不敢違越緣未有明勅處分多被無良人吏致使恐嚇或致言訟起今後應刺史下擔什物及除替後資送錢物但不率歛官吏不科配百姓一任各守州縣舊例色目支給如無公廨不在資送之限若輒有率配以入已贓論以正議大夫兵部侍郎諸道鹽鐵轉運使上柱國河東縣開國子裴休守禮部尚書進階金紫以前宣歙觀

察使大中大夫檢校左散騎常侍裴諗權知兵部侍郎
十月己亥京兆尹韋博奏京畿富戶爲諸軍影占苟免
府縣色役或有追訴軍府紛然請准會昌三年十二月
勅諸軍使不得強奪百姓入軍從之十一月中書侍郎
兼吏部尚書平章崔龜從檢校尚書左僕射汴州刺史
充宣武軍節度使沙州置歸義軍以張義潮爲節度使
太子詹事姚康獻帝王政纂十卷又撰統史三百卷上
自開闢下盡隋朝帝王美政詔令制置銅鹽錢穀損益
用兵利害下至僧道是非無不備載編年爲之國子祭
酒馮審奏文宣王廟始太宗立之睿宗書額武后竊政

之日改篆題大周二字請削之從之十二月盜斫景陵神門戟京兆尹韋博罰兩月俸貶宗正卿李文舉陸州刺史陵令吳閱岳州司馬奉先令裴讓隋州司馬是歲湖南大饑

六年春正月戊辰以隴州防禦使薛逵爲秦州刺史天雄軍使兼秦成階兩州經畧使二月右衛大將軍鄭光以賜田請免租稅宰相魏謩奏曰鄭光以國舅之親賜田可也免稅無以勸蒸民勅曰一依人戶例供稅三月隴州刺史薛逵奏修築定成關工畢四月丁酉勅常平義倉斛斗每年檢勘實水旱災處錄事叅軍先勘人戶

多少支給先貧下戶富戶不在支給之限以禮部尚書
諸道鹽鐵轉運等使裴休可本官同平章事五月勅天
下軍府有兵馬處宜選會兵法能弓馬等人充教練使
每年合教習時常令教習仍於其時申兵部御史臺奏
諸色刑獄有關連朝官者尚書省四品已上諸司三品
已上官宜先奏取進止如取諸色官狀卽申中書取裁
從之秋七月丙辰前淮南節度使金紫光祿大夫檢校
尚書左僕射兼揚州大都督府長史御史大夫上柱國
贊皇郡開國公食邑一千五百戶李珣卒贈司空勅犯
賊人平賊據律以當時物價上旬估請取所犯之處其

月內上旬時估平之從之檢校司空太子少師上柱國
范陽郡開國公食邑二千戶盧鈞可太原尹北都留守
河東節度使九月勅起居郎轉官月限宜以二十箇月
七年春正月壬辰金紫光祿大夫守太子少傅分司上
柱國晉陵郡開國公食邑二千戶歸融卒贈右僕射宗
正卿李文舉貶睦州刺史四月以御史大夫鄭朗爲中
書侍郎同平章事五月左衛率府倉曹張戣集律令格
式條件相類一千二百五十條分一百二十一門號曰
刑法統類上之七月以正議大夫尚書左丞上柱國賜
紫金魚袋崔瑊爲刑部尚書以銀青光祿大夫行兵部

侍郎知制誥充翰林學士蘓滌爲尚書左丞權知戶部
侍郎崔璵可權知兵部侍郎十月尚書左僕射門下侍
郎平章事大清宮使弘文館大學士崔鉉進續會要四
十卷修撰官楊紹復崔瑑薛逢鄭言等賜物有差

八年春正月陝州黃河清二月南蠻進犀牛詔還之三
月勅以旱詔使疏決繫囚宰相監修國史魏謩修成文
宗實錄四十卷上之修史官給事中盧耽太常少卿蔣
偕司勳員外郎王渢右補闕盧吉頒賜銀器錦綵有差
以山南東道節度使檢校戶部尚書襄州刺史上柱國
酒泉縣開國子食邑三百戶李景讓爲吏部尚書五月

以中書舍人翰林學士韋澳爲京兆尹以戶部侍郎翰林學士承旨上柱國武功縣開國子食邑三百戶蘇滌檢校兵部尚書兼江陵尹御史大夫充荆南節度管內觀察處置等使七月銀青光祿大夫守門下侍郎同平章事魏謩兼戶部尚書八月以司農卿鄭助爲檢校左散騎常侍兼夏州刺史御史大夫上柱國滎陽縣開國男食邑三百戶夏綏銀宥等州節度營田觀察處置押蕃落安撫平夏党項等使

九年春正月辛巳銀青光祿大夫秘書監許昌縣開國男陳商卒贈工部尚書二月中書侍郎兼禮部尚書同

平章事裴休檢校吏部尚書兼汴州刺史御史大夫充
宣武軍節度使汴宋亳穎觀察處置等使三月試宏詞
舉人漏泄題目爲御史臺所劾侍郎裴諗改國子祭酒
郎中周敬復罰兩月俸料考試官刑部郎中唐枝出爲
處州刺史監察御史馮顥罰一月俸料其登科十人並
落下其吏部東銓委右丞盧懿權判以吏部侍郎鄭涯
檢校禮部尚書兼定州刺史御史大夫充義武軍節度
易定州觀察處置北平軍等使御史臺據正月八日禮
部貢院提到明經黃續之趙弘成全質等三人偽造堂
印堂帖兼黃續之偽著緋衫將偽帖入貢院令與舉人

虞蒸胡簡覺贊等三人及第許得錢一千六百貫文據
勘黃續之等罪款具招造僞所許錢未曾入手便事欺
奉勅並准法處死主司以自獲姦人並放七月以河東
節度使檢校司空太原尹北都留守上柱國范陽郡開
國公食邑二千戶盧鈞守尙書右僕射八月以門下侍
郎守尙書右僕射監修國史博陵縣開國伯食邑一千
戶崔鉉檢校司空同平章事兼揚州大都督府長史充
淮南節度副大使知節度使事宣宗宴餞賦詩以賜之
九月昭義節度使檢校禮部尙書兼潞州大都督府長
史御史大夫上柱國賜紫金魚袋鄭涓檢校刑部尙書

太原尹比都留守御史大夫充河東節度管內觀察處
置等使十一月以河南尹劉瑑檢校工部尙書汴州刺
史兼御史大夫充宣武軍節度宋亳汴穎觀察處置等
使以中書舍人鄭顥爲禮部侍郎

十年春正月乙巳以正議大夫華州刺史潼關防禦鎮
國軍等使上柱國隴西縣開國男食邑三百戶賜紫金
魚袋李訥檢校左散騎常侍兼越州刺史御史大夫浙
江東道都團練觀察等使二月中書門下奏據禮部貢
院見置科目開元禮三禮三傳三史學究道舉明算童
子等九科近年取人頗濫曾無實藝可採徒添入仕之

門須議條疏俾精事業臣已於延英面論伏奉聖旨將文字來者其前件九科臣等商量望起大中十年權三年滿後至時赴科試者令有司據所舉人先進名令中書舍人重覆問過如有本業稍通堪備朝廷顧問卽作等第進名候勅處分如有事業荒蕪不合送名數者考官卽議朝責其童子近日諸道所薦送者多年齒已過僞稱童子考其所業又是常流起今日後望令天下州府薦送童子並須實年十一十二已下仍須精熟一經問皆全通兼自能書寫者如違制條本道長吏亦議懲法從之四月癸丑以刑部郎中盧搏爲廬州刺史以給

事中渤海郡開國公食邑二千戶高少逸檢校禮部尚書華州刺史潼關防禦鎮國軍等使六月以兵部郎中裴夷直爲蘇州刺史九月以中書舍人杜審權知禮部貢舉十月以邠寧慶節度使檢校禮部尚書邠州刺史上柱國賜紫金魚袋畢誠爲檢校兵部尚書潞州大都督府長史御史大夫充昭義節度副大使知節度使潞邢洺等州觀察使桂管觀察使令狐楚卒贈禮部尚書十一年春正月以銀青光祿大夫守吏部尚書上柱國酒泉縣開國男食邑三百戶李景讓爲御史大夫以朝請大夫守御史中丞兼尚書右丞上柱國賜紫金魚袋

夏侯孜爲戶部侍郎判戶部事以朝散大夫守京兆尹
上柱國扶風縣開國男食邑三百戶賜紫金魚袋韋澳
檢校工部尚書孟州刺史御史大夫充河陽三城節度
孟懷澤觀察處置等使先是車駕將幸華清宮兩省官
進狀論奏詔曰朕以驪山近宮真聖廟貌未嘗修謁自
謂闕然今屬陽和氣清中外事簡聽政之暇或議一行
蓋崇禮敬之心非以逸遊爲事雖申勅命兼慮勞人卿
等職備禁闈志勤奉上援據前古列狀上章載陳懇到
之詞深覩盡忠之節已允來請所奏以劔南西川節度
副大使知節度事管內觀察處置統押近界諸蠻及西

山八國雲南安撫等使特進檢校司徒同中書門下平章事兼成都尹上柱國太原郡開國公食邑二千戶白敏中以本官兼江陵尹充荆南節度管內觀察處置等使二月以夏綏銀宥節度使通議大夫檢校左散騎常侍夏州刺史御史大夫上柱國滎陽縣開國男食邑三百戶賜紫金魚袋鄭助爲檢校工部尙書邠州刺史充邠寧慶節度管內營田觀察處置兼充慶州南路救援鹽州及當道汭路鎮寨糧料等使以右金吾衛將軍田在賓檢校右散騎常侍兼夏州刺史代鄭助爲夏綏銀宥節度等使以荆南節度使銀青光祿大夫檢校兵部

尚書兼江陵尹御史大夫上柱國武功郡開國男食邑
三百戶蘇滌爲太常卿以銀青光祿大夫守門下侍郎
兼戶部尚書同平章事監修國史上柱國魏謩檢校戶
部尚書同平章事兼成都尹充劔南西川節度副大使
知節度事以太中大夫守工部尚書上柱國賜紫金魚
袋崔慎由爲中書侍郎同平章事以成德軍節度鎮冀
深趙觀察處置等使起復雲麾將軍守左金吾衛大將
軍同正檢校兵部尚書鎮州大都督府長史王紹鼎爲
銀青光祿大夫檢校尚書右僕射餘官如故以通議大
夫守中書門下侍郎兼禮部尚書同平章事集賢殿大

學士上柱國賜紫金魚袋鄭朗可監修國史太中大夫
守工部尚書同平章事上柱國賜紫金魚袋崔慎由可
集賢院大學士三月起復朝請大夫深州刺史御史大
夫兼成德軍節度判官王紹懿可檢校左散騎常侍鎮
府左司馬知府事充成德軍節度副使兼充都知兵馬
使以成德軍中軍兵馬使銀青光祿大夫檢校太子賓
客兼監察御史上柱國王景胤可本官深州刺史本州
團練守捉使檢校左散騎常侍右神武大將軍知軍事
王紹孚可落起復依前右神武大將軍紹懿紹孚鎮州
王紹鼎之弟也景胤紹鼎子也以朝請大夫檢校刑部

尚書華州刺史上柱國鄜縣開國男食邑三百戶賜紫金魚袋蕭俶爲太子賓客分司東都四月以職方郎中知制誥裴坦爲中書舍人以朝議大夫權知京兆尹崔郢爲濮王傅分司東都以決殺府吏也以江西觀察使洪州刺史御史中丞上柱國賜紫金魚袋張毅夫爲京兆尹以鳳翔節度使正議大夫檢校戶部尚書兼鳳翔尹上柱國襲晉國公食邑三千戶襲實封一百五十戶裴識可許州刺史充忠武軍節度陳許蔡觀察等使以吏部侍郎盧懿檢校工部尚書兼鳳翔尹御史大夫鳳翔隴右節度使以中書舍人鄭憲爲洪州刺史御史中

丞江南西道都團練觀察處置等使仍賜紫金魚袋以
安南宣慰使右千牛衛大將軍宋涯爲安南都護御史
中丞本管經畧招討處置等使以幽州節度使張允伸
弟允中爲荊州刺史允千檀州刺史允辛安塞軍使允
舉納降軍使並兼御史中丞以前邠寧節度使朝議大
夫檢校工部尙書邠州刺史上柱國賜紫金魚袋柳憇
可檢校禮部尙書河南尹五月以職方郎中李玄爲壽
州刺史六月以朔方靈武定遠等城節度使朝散大夫
檢校左散騎常侍靈州大都督府長史上柱國賜紫金
魚袋劉潼爲鄭州刺史馳驛赴任以給邊兵糧不及時

也以安南都護宋涯爲容州刺史容管經畧招討處置
等使制皇第三男灌封衛王第十一男灘封廣王以朝
散大夫守尙書兵部侍郎判度支上柱國彭縣開國男
食邑三百戶賜紫金魚袋蕭鄴本官同平章事判度支
以右監門將軍知內府省事清河公崔巨淙爲淮南監
軍以特進檢校司空兼太子太傅分司東都上柱國扶
風郡開國公食邑二千戶杜棕本官判東都尙書省兼
御史大夫充東都留守東畿汝都防禦使七月以飛龍
使宮闈局令王歸長守內侍省內常侍知省事充內樞
密使責授邠州員外司馬張直方爲右驍衛大將軍八

月成德軍節度使檢校尚書右僕射王紹鼎卒贈司空
賻布帛三百段以皇子昭王泖爲開府儀同三司守鎮
州大都督府長史成德軍節度鎮冀深趙觀察等大使
以成德軍節度副使都知兵馬使左司馬知府事御史
中丞王紹懿爲成德軍副使留後以義武軍節度易定
觀察等使檢校禮部尚書定州刺史上柱國滎陽縣開
國男食邑三百戶鄭涯檢校戶部尚書汴州刺史上柱
國充宣武軍節度副大使知節度事朱毫觀察亳州大
清宮等使以四鎮北庭行軍涇原渭武節度使銀青光
祿大夫檢校右散騎常侍涇州刺史御史大夫上柱國

范陽縣開國男食邑三百戶盧簡求可檢校工部尙書
定州刺史義武節度使易定觀察北都天平軍等使以
鹽州防禦押蕃落諸軍防秋都知兵馬使度支烏池權
稅等使檢校右散騎常侍鹽州刺史上柱國賜紫金魚
袋陸航代簡求爲涇原節度使以翰林學士朝散大夫
中書舍人賜紫金魚袋曹確權知河南尹汝州防禦使
令狐緒有善政郡人詣闕請立德政碑頌緒以弟緝在
中書上表乞寢從之以太常卿蘇滌爲兵部尙書權知
吏部銓事以銀青光祿大夫守散騎常侍上柱國渤海
郡開國伯食邑七百戶封敖爲太常卿是月熒惑犯東

并九月以秦州刺史李承勛爲朝散大夫檢校工部尙書涇州刺史充四鎮北庭涇原渭武節度等使以禮部郎中楊知溫充翰林學士以中散大夫尙書禮部侍郎上柱國賜紫金魚袋杜審權爲陝州大都督府長史兼御史大夫陝虢都防禦觀察處置等使以銀青光祿大夫檢校司空兼太子太師上柱國范陽郡開國公食邑二千戶盧鈞爲檢校司空同中書門下平章事興元尹充山南西道節度等使右補闕陳懃左拾遺王譜右拾遺薛廷傑上疏諫遣中使往羅浮山迎軒轅先生詔曰朕以萬機事繁躬親庶務訪聞羅浮山處士軒轅集善

能攝生延齡益壽乃遣使迎之或冀有少保理也朕每
觀前史見秦皇漢武爲方士所惑常以之爲誠卿等位
當論列職在諫司閱示來章深納誠意仍謂崔慎由曰
爲吾言於諫官雖少翁欒大復生不能相惑如聞軒轅
生高士欲與之一言耳宰相鄭朗累月請告三章求免
是月乙未彗出於房初度長三尺十月制通議大夫守
中書侍郎禮部尙書同平章事監修國史上柱國賜紫
金魚袋鄭朗可檢校尙書右僕射兼太子少保以山南
西道節度使中散大夫檢校禮部尙書興元尹上柱國
賜紫金魚袋蔣係權知刑部尙書宰相崔慎由兼修國

史蕭鄴兼集賢殿大學士以華州刺史高少逸爲左散
騎常侍以蘇州刺史裴夷直爲華州刺史潼關防禦鎮
國軍等使以太常少卿崔鈞爲蘓州刺史入迴鶻冊禮
使衛尉少卿王端章貶賀州司馬副使國子禮記博士
李潯爲郴州司馬判官河南府士曹李寂永州司馬端
章等出塞黑車子阻路而迴故也以成德軍觀察留後
御史中丞賜紫金魚袋王紹懿檢校工部尙書兼鎮州
大都督府長史御史大夫充成德軍節度鎮冀深趙觀
察等使以中書舍人李藩權知禮部貢院十一月太子
少師鄭朗卒贈司空銀青光祿大夫檢校尙書左僕射

兼太子太保充右羽林統軍御史大夫上柱國滎陽縣
開國男食邑三百戶鄭光卒輟朝三日贈司徒仍令百
官奉慰上之元舅也宰相崔愼由爲中書侍郎兼禮部
尙書尙書蕭鄴兼工部尙書餘並如故十二月以昭義
軍節度使朝議大夫檢校工部尙書上柱國平陰縣開
國男食邑三百戶畢誠爲太原尹北都留守河東節度
使朝議大夫檢校禮部尙書兼太原尹北都留守上柱
國賜紫金魚袋劉瑑爲尙書戶部侍郎判度支以翰林
學士承旨通議大夫守尙書戶部侍郎知制誥上護軍
賜紫金魚袋蔣伸爲兵部侍郎充職以金紫光祿大夫

守太子少保分司東都上柱國河東縣開國男食邑五百戶裴休檢校戶部尙書兼潞州大都督府長史昭義軍節度副大使知節度事潞磁邢洺觀察等使以正議大夫行尙書兵部侍郎上柱國河東縣開國男食邑三百戶賜紫金魚袋柳仲郢本官兼御史大夫充諸道鹽鐵轉運使以正議大夫檢校戶部尙書兼太子賓客上柱國賜紫金魚袋孔溫業本管分司東都以病請告故也禮部郎中楊知溫本官知制誥充翰林學士以幽州中軍使檢校國子祭酒幽府左司馬知府事御史中丞張簡真檢校右散騎常侍允伸之子也以中散大夫權

知刑部尙書上柱國賜紫金魚袋蔣係檢校戶部尙書
鳳翔尹御史大夫鳳翔隴右節度觀察處置等使是歲
舒州吳塘堰有衆禽成巢濶七尺高七丈而水禽山鳥
鷹隼鷲雀之類無不馴狎又有鳥人面綠毛爪喙皆紺
色其聲曰甘人呼爲甘蟲

十二年春正月以晉陽令鄭液爲通州刺史羅浮山人
軒轅集至京師上召入禁中謂曰先生遐壽而長生可
致乎曰徹聲色去滋味哀樂如一德施周給自然與天
地合德日月齊明何必別求長生也留之月餘堅求還
山三月以前鄉貢進士于琮爲秘書省校書郎尋尙皇

女廣德公主改銀青光祿大夫守右拾遺駙馬都尉以
安南本管經畧招討處置使朝散大夫檢校左散騎常
侍安南都護御史大夫賜紫金魚袋李弘甫爲宗正卿
以中大夫守京兆尹上柱國賜紫金魚袋張毅夫爲鄂
州刺史御史大夫鄂岳蘄黃申等州都團練觀察使以
太中大夫福州刺史御史中丞上柱國賜紫金魚袋揚
發檢校右散騎常侍廣州刺史御史大夫充嶺南東道
節度觀察處置等使以朝散大夫守康王傅分司東都
上柱國襲魏郡開國公食邑二千戶賜紫金魚袋王式
爲安南都護兼御史中丞充安南本管經畧招討處置

等使以朝請大夫前守太子賓客分司東都上柱國鄆
縣開國男食邑三百戶賜紫金魚袋蕭俶守太子少保
分司以朝請大夫檢校左散騎常侍右金吾大將軍充
右街使上柱國襲太原郡開國公食邑二千戶賜紫金
魚袋王鎮爲檢校左散騎常侍使持節都督福州諸軍
事兼福州刺史御史大夫充福建等州都團練觀察處
置等使以翰林學士朝議郎守尚書司勳郎中知制誥
賜緋魚袋孔溫裕爲中書舍人充職以右驍衛上將軍
李正源守大內皇城留守以朝議大夫守尚書戶部侍
郎判度支上柱國賜紫金魚袋劉瑑本官同平章事依

前判度支以太中大夫守中書侍郎兼禮部尙書同平章事監修國史上柱國賜紫金魚袋崔慎由檢校禮部尙書梓州刺史御史大夫劔南東川節度副大使知節度事代韋有翼以有翼爲吏部侍郎二月以前邕管經畧招討處置使朝議郎邕州刺史御史中丞賜紫金魚袋段文楚爲昭武校尉右金吾衛將軍以朝議郎守中書舍人權知禮部貢舉上柱國賜緋魚袋李藩爲尙書戶部侍郎以朝散大夫守工部尙書同平章事充集賢殿大學士上柱國彭城縣開國男食邑三百戶賜紫金魚袋蕭鄴爲監修國史以朝議大夫守戶部侍郎同平

章事判度支上柱國賜紫金魚袋劉瑑可充集賢院學士以渤海國王弟權知國務大虔晃爲銀青光祿大夫檢校秘書監忽汗州都督冊爲渤海國王以兵部侍郎柳仲郢爲刑部尙書以朝議大夫守尙書戶部侍郎判戶部事上柱國賜紫金魚袋夏侯孜爲兵部侍郎充諸道鹽鐵轉運使以朝請大夫權知刑部侍郎賜紫金魚袋杜勝爲戶部侍郎判戶部事以光祿大夫守左領軍衛大將軍分司東都上柱國會稽縣開國公食邑一千五百戶康季榮可檢校尙書右僕射兼左衛上將軍分司貶前利州刺史杜倉爲賀州司戶蔡州刺史李叢郢

州司馬以工部郎中知制誥于德孫庫部郎中知制誥
苗恪並可中書舍人依前翰林學士以前右金吾衛將
軍鄭薄璋前鴻臚少卿鄭漢卿並起復授本官國舅光
之子也以銀青光祿大夫行給事中駙馬都尉衛洙爲
工部侍郎前濮王傅分司皇甫權爲康王傅分司以庫
部員外郎史館修撰李渙爲長安令閏二月以司農少
卿盧籍爲代州刺史前江陵少尹杜暉爲司農少卿以
河東馬步都虞候段威爲朔州刺史充天寧軍使兼興
唐軍沙陁三部落防遏都知兵馬使五月以兵部侍郎
鹽鐵轉運使夏侯孜本官同平章事六月南蠻攻安南

府八月洪州賊毛合宣州賊康全大攻掠郡縣詔兩浙兵討平之十二月太子少保魏謩卒贈司徒

十三年春正月以號陝觀察使杜審權爲戶部侍郎判戶部事三月宰相蕭瑒罷知政事守吏部尙書四月以翰林學士承旨兵部侍郎知制誥蔣伸本官同平章事五月上不豫月餘不能視朝八月七日宣遺詔立鄴王爲皇太子勾當軍國事是日崩于大明宮聖壽五十詔門下侍郎平章事令狐綯攝冢宰群臣上諡曰聖武獻文孝皇帝廟號宣宗十四年二月葬於貞陵

史臣曰臣嘗聞黎老言大中故事獻文皇帝器識深遠

久歷艱難備知人間疾苦自寶曆已來中人擅權事多
假借京師豪右大擾窮民洎大中臨馭一之日權豪歛
迹二之日姦臣畏法三之日闍寺讐氣由是刑政不濫
賢能效用百揆四嶽穆若清風十餘年間頌聲載路上
宮中衣澣濯之衣常膳不過數器非母后侑膳輒不舉
樂歲或小饑憂形於色雖左右近習未嘗見怠惰之容
與群臣言儼然煦接如待賓僚或有所陳聞虛襟聽納
舊時人主所行黃門先以龍腦鬱金藉地上悉命去之
宮人有疾醫視之旣瘳卽袖金賜之誠曰勿令勅使知
謂予私於侍者其恭儉好善如此季年風毒召羅浮山

人軒轅集訪以治國治身之要其伎術詭異之道未嘗措言集亦有道之士也十三年春堅求還山上曰先生少留一年候於羅浮山別創一道館集無留意上曰先生捨我亟去國有災乎朕有天下竟得幾年集取筆寫四十字而十字挑上乃十四年也興替有數其若是乎而帝道皇猷始終無缺雖漢文景不足過也惜乎簡籍遺落舊事十無三四吮墨揮翰有所慊然

贊曰李之英主實惟獻文糝糶盡去淑慝斯分河隴歸地朔漠消氛到今遺老謠詠明君

舊唐書卷十八下

舊唐書卷十八下考證

宣宗本紀六月以戶部侍郎充諸道鹽鐵轉運使馬植
本官同平章事○新書馬植入相在會昌二年五月
七月以兵部尚書李讓夷爲劍南東川節度使○

臣德

潛
按新書讓夷于三月拜司空未嘗罷相爲兵部尚
書也此處闕同平章事文

大中元年二月制憲宗第十七子愒封彭王○新書在
三年十一月己卯舊書傳同

第十八子惲封棣王○新書在六年十一月舊書傳同
第五子澤封濮王○新書在二年三月舊書傳同

第六子潤封鄂王。○新書在五年六月舊書傳同

二年六月己丑太皇太后郭氏崩。○新書在五月己卯

七月戊午以前山南西道節度使高元裕爲吏部尚書

○沈炳震曰元裕傳大中初爲刑部尚書三年檢校

吏部尚書山南東道節度使此尚書兼東道之拜非

自西道遷吏部尚書也且本傳亦無節度西道文疑

誤

十一月以戶部侍郎判度支崔龜從本官同平章事。○

新書在四年六月戊申本傳同當從新書

三年十一月幽州軍亂逐其留後張直方軍人推其衙

將周繝爲留後○沈炳震曰新書在四年八月軍人
逐直方卽以張允伸爲留後無周繝綱目同舊書

四年冬十月中書侍郎同平章事魏扶罷知政事○臣

德潛

按新書六月戊申扶已書薨則十月中不應罷
知政事兩書必有一誤也而扶無傳可考未知孰是

綱目與舊書同

五年春正月制皇第七子洽封懷王第八子泐封昭王
第九子汶封康王○新書在八年九月舊書傳同

八月沙州刺史張義潮遣其兄義澤以瓜沙伊肅等十

一州戶口來獻○臣宗萬

按河湟自天寶末陷沒吐

蕃百有餘年至是始悉復故地實錄正月壬戌天德
軍奏沙州刺史張義潮差使上表請以沙州降十月
遣義澤以瓜沙伊肅等十一州地圖戶籍來獻唐年
補錄舊紀義潮降在五年八月新書五年十月沙州
人張義潮以十一州歸于有司又傳擢義潮沙州防
禦使據此則舊書八月本唐年補錄舊紀新書十月
本實錄均統爲一事也通鑑從實錄分晰正月請降
十月獻地當從通鑑至義潮官名舊書本實錄書刺
史通鑑同新傳則書防禦使兩書互異十一州者瓜
沙伊肅鄯甘河西蘭岷廓是也

十年春正月以華州刺史李訥檢校左散騎常侍兼越

州刺史浙東都團練觀察等使○

臣德潛

按新書九

年七月浙東軍亂已逐觀察使李訥矣而舊書于十年始遷浙東觀察使未知孰是綱目與新書同

十一年六月皇第三男灌封衛王○沈炳震曰本傳宣宗第三男滋已封夔王灌非第三男應誤

十三年三月宰相蕭鄴罷知政事守吏部尚書○新書在十一月懿宗卽位後當從新書

史臣論臣嘗聞黎老言云云○異代史官稱臣非體亦仍舊文未訂正也

舊唐書卷十八下考證

舊唐書卷十九上

後晉司空同中書門下平章事劉 昫撰

本紀第十九上

懿宗

懿宗昭聖恭惠孝皇帝諱漼宣宗長子母曰元昭皇太后
晁氏太和七年十一月十四日生於藩邸會昌六年
十月封鄆王本名溫大中十三年八月七日宣遺詔立
爲皇太子監國改今名十三日柩前卽帝位年二十七
帝姿貌雄傑有異稠人藩邸時常經重疾郭淑妃侍醫
藥見黃龍出入於臥內旣間妃以異告帝曰慎勿復言

又嘗大雪數尺而帝寢室之上獨無人皆異之宣宗制秦邊陲樂曲詞有海晏咸通之句又大中末京城小兒疊布漬水紐之向日謂之拔暈帝果以鄆王卽大位以咸通爲年號九月釋服追尊母后晁氏爲太后諡曰元昭十月癸未制以門下侍郎守左僕射同平章事令狐綯守司空門下侍郎兵部尚書同平章事蕭勣兼尚書右僕射中書侍郎禮部尚書平章事夏侯孜兼兵部尚書中書侍郎平章事蔣伸兼工部尚書並依前知政事又以兵部侍郎鄭顥爲河南尹以昭義軍節度潞邢磁洺觀察等使光祿大夫檢校吏部尚書兼潞州大都督

府長史上柱國河東縣開國子食邑五百戶裴休爲太原尹北都留守河東節度管內觀察處置等使以河中節度使檢校尚書左僕射畢誠爲汴州刺史充宣武軍節度宋亳觀察等使以中書舍人裴坦權知禮部貢舉十二月以戶部侍郎翰林學士杜審權爲檢校禮部尚書河中晉絳節度等使

咸通元年春正月上御紫宸殿受朝對室韋使二月葬宣宗皇帝於貞陵以右拾遺劉鄴充翰林學士以河中節度使杜審權爲兵部侍郎判度支尋以本官同平章事以門下侍郎守司徒同平章事令狐絢檢校司徒同

平章事出鎮河中尚書左僕射諸道鹽鐵轉運使杜恂
同平章事浙東觀察使王式斬草賊仇甫浙東郡邑皆
平八月以河東節度使裴休爲鳳翔尹鳳翔隴右節度
使以鳳翔隴右節度使銀青光祿大夫檢校刑部尚書
盧簡求爲太原尹北都留守河東節度使十一月丙午
朔丁未上有事於郊廟禮畢御丹鳳門大赦改元以中
書舍人薛肫權知貢舉

二年春二月吏部尚書蕭鄴檢校尚書右僕射太原尹
北都留守河東節度觀察等使鄭滑節度使檢校工部
尚書李福奏屬郡潁州去年夏大雨沉丘汝陰潁上等

縣平地水深一丈田稼屋宇淹沒皆盡乞蠲租賦從之
以中書侍郎兼工部尚書蔣伸兼刑部尚書右僕射門
下侍郎杜棕爲左僕射依前知政事四月以前婺州刺
史裴閔爲潁州刺史充本州團練鎮遏等使以駕部郎
中王鐸本官知制誥八月以中書舍人衛洙爲工部侍
郎尋改銀青光祿大夫檢校禮部尚書兼滑州刺史御
史大夫駙馬都尉充義成軍節度鄭滑潁觀察處置等
使洙奏狀稱蒙恩除授滑州刺史官號內一字與臣家
諱音同雖文字有殊而聲韻難別請改授閑官者勅曰
嫌名不諱著在禮文成命已行固難依允以兵部侍郎

曹確判度支以兵部員外郎楊知遠司勳員外郎穆仁裕試吏部宏詞選人九月以前兵部侍郎判度支畢誠爲工部尚書同平章事蔣伸罷知政事林邑蠻寇安南府遣神策將軍康承訓率禁軍及江西湖南之兵赴援三年春正月左僕射門下侍郎平章事杜悰率百寮上徽號曰睿文明聖孝德皇帝五月勅嶺南分爲五管誠已多年居常之時同資禦捍有事之際要別改張邕州西接南蠻深據黃洞控兩江之獷俗居數道之游民比以委人太輕軍威不振境連內地不並海南宜分嶺南爲東西道節度觀察處置等使以廣州爲嶺南東道邕

州爲嶺南西道別擇良吏付以節旄其所管八州俗無耕桑地極邊遠近罹盜擾尤甚凋殘將盛藩垣宜添州縣宜割桂州管內夔州象州容州管內藤州巖州並隸嶺南西道收管宰臣杜棕兼司空畢誠兼兵部尚書駕部郎中知制誥王鐸爲中書舍人以邕管經略使鄭愚爲廣州刺史充嶺南東道節度觀察處置等使將軍宋戎爲嶺南西道節度使夏淮南河南蝗旱民饑南蠻陷交趾徵諸道兵赴嶺南詔湖南水運自湘江入洿渠西造地麩粥以饋行營湘灘泝運功役艱難軍屯廣州乏食潤州人陳礪石詣闕上書言江西湖南泝流運糧不

濟軍師士卒食盡則散此宜深慮臣有奇計以饋南軍
天子召見礪石因奏臣弟聽思曾任雷州刺史家人隨
海船至福建往來大船一隻可致千石自福建裝船不
一月至廣州得船數十艘便可致三萬石至廣府矣又
引劉裕海路進軍破盧循故事執政是之以礪石爲鹽
鐵巡官往楊子院專督海運於是康承訓之軍皆不闕
供七月徐州軍亂以浙東觀察使王式檢校工部尚書
徐州刺史御史大夫武寧軍節度徐泗濠觀察等使初
王智興得徐州召募克豪之卒二千人號曰銀刀鸞旗
門搶挾馬等軍番宿衙城自後凌驕節度使姑息不暇

田牟鎮徐日每與驕卒雜坐酒酣撫背時把板爲之唱歌其徒日費萬計每有賓宴必先厭食飮酒祁寒暑雨卮酒盈前然猶誼譟邀求動謀逐帥前年壽州刺史溫璋爲節度使驕卒素知璋嚴酷深負憂疑璋開懷撫諭終爲猜貳給與酒食未嘗瀝口不期月而逐璋上是以式代璋時式以忠武義成之師三千平定仇甫便詔式率二鎮之師渡淮徐卒聞之懼其勢無如之何至大彭館方來迎謁居三日犒勞兩鎮兵令還旣環甲執兵卽命環驕卒殺之徐卒三千餘人是日盡誅繇是寇徒悉殄九月以戶部侍郎李晦檢校工部尚書兼興元尹山

南西道節度使十一月遣將軍蔡襲率禁軍三千會諸道之師赴援安南以吏部侍郎鄭處誨蕭倣吏部員外郎楊儼戶部員外郎崔彥昭等試宏詞選人十二月以吏部侍郎蕭倣權知禮部貢舉

四年春正月甲子朔庚午上有事于圓丘禮畢御丹鳳樓大赦中外官宜准建中元年勅授官後三日舉一人自代州牧令錄上佐官在任須終三考河東節度使檢校刑部尚書盧簡方以病求罷詔以太子少師致仕歸東都以昭義節度使檢校禮部尚書上柱國賜紫金魚袋劉潼爲太原尹北都留守御史大夫充河東節度觀

察處置等使二月以左散騎常侍李荀檢校工部尚書滑州刺史義成軍節度鄭滑觀察等使三月以兵部侍郎判度支楊收本官同平章事以刑部侍郎曹汾爲河南尹以戶部侍郎李蟻檢校禮部尚書潞州大都督府長史充昭義節度觀察處置等使四月勅徐州罷防禦使爲文都隸兗州七月朔制安南寇陷之初流人多寄溪洞其安南將吏官健走至海門者人數不少宜令宋式李良瓌察訪人數量事救卹安南管內被蠻賊驅劫處本戶兩稅丁錢等量放二年候收復後別有指揮其安南溪洞首領素推誠節雖蠻寇竊據城壁而酋豪各

守土疆如聞溪洞之間悉藉嶺北茶藥宜令諸道一任商人興販不得禁止往來廉州珠池與人共利近聞本道禁斷遂絕通商宜令本州任百姓採取不得止約其徐州銀刀官健其中先有逃竄者累降勅旨不令捕逐其今年四月十八日草賊頭首已抵極法其餘徒黨各自奔逃所在更勿捕逐是月東都許汝徐泗等州大水傷稼初大中末安南都護李琢貪暴侵刻獠民羣獠引林邑蠻攻安南府三年大徵兵赴援天下騷動其年冬蠻竟陷交州赴安南諸軍並令抽退分保嶺南東西道十一月長安縣尉集賢校理令狐滈爲左拾遺制出左

拾遺劉蛻起居郎張雲上疏論漉父絢秉權之日廣納
賂遺受李琢賄除安南致生蠻寇漉不宜居諫諍之列
時絢在淮南上表論訴乃貶雲興元少尹蛻華陰令漉
改詹事司直以中書舍人王鐸權知禮部貢舉以兵部
侍郎判度支曹確同平章事以中書侍郎平章事畢誠
檢校吏部尚書河中尹晉絳慈隰節度使就加幽州張
允伸檢校司徒以兵部侍郎高璩本官同平章事以戶
部侍郎裴寅判本司事

五年春正月戊午朔以用兵罷元會諫議大夫裴坦上
疏論天下徵兵財賦方匱不宜過興佛寺以困國力優

詔荅之二月以兵部尚書牛叢檢校兵部尚書兼成都
尹劔南西川節度副大使知節度事徐州處置觀察防
禦使以門下侍郎兵部尚書平章事杜審權爲潤州刺
史浙江西道節度使三月以兵部郎中高湜員外于懷
試吏部平判選人四月右僕射平章事夏侯孜增爵五
百戶以中書舍人王鐸爲禮部侍郎以晉州刺史孟球
檢校工部尚書兼徐州刺史南蠻寇邕管以秦州經略
使高駢率禁軍五千赴邕管會諸道之師禦之五月丁
酉制朕以寡昧獲承高祖太宗之不構六載於茲矣罔
敢遊是娛罔聲色是縱罔刑戮是濫罔邪佞是惑夙夜

悚惕以憂以勤庶幾乎八表用康兆人以泰而西戎欵
附北狄懷柔獨惟南蠻姦宄不率侵陷交趾突犯朗寧
爰及嵩州亦用攘寇勞我士卒興吾甲兵騷動黎元役
力飛輓每一軫念閔然疚懷顧惟生人罹此愁苦宜布
自天之澤俾垂及物之仁如聞湖南桂州是嶺路係口
諸道兵馬綱運無不經過頓遞供承動多差配凋傷轉
甚宜有特恩潭桂兩道各賜錢三萬貫文以助軍錢亦
以充館驛息利本錢其江陵江西鄂州三道比於潭桂
徭配稍簡宜令本道觀察使詳其閒劇准此例興置本
錢邕州已西黎雋界內昨因蠻寇互有殺傷宜令本道

收拾埋瘞量設祭醑徐州土風雄勁甲士精強比以制馭乖方頗致騷擾近者再置額却領四州勞逸旣均人心甚泰但聞比因罷節之日或有被罪奔逃雖朝廷頻下詔書並令一切不問猶恐尚懷疑懼未委招攜結聚山林終成詿誤况邊方未靜深藉人才宜令徐泗團練使選揀召募官健三千人赴邕管防戍待嶺外事寧之後卽與替代歸還仍令每召滿五百人卽差軍將押送其糧料賞給所司準例處分淮南兩浙海運虜隔舟船訪聞商徒失業頗甚所由縱捨爲弊實深亦有搬貨財委於水次無人看守多至散亡嗟怨之聲盈於道路宜

令三道據所搬米石數牒報所在鹽鐵巡院令和雇入海艚船分付所司通計載米數足外輒不更有隔奪妄稱貯備其小舸短船到江口使司自有船不在更取商人舟船之限如官吏妄行威福必議痛刑於戲萬方靡安寧忘於罪已百姓不足敢怠於責躬用伸欽恤之懷式表憂勤之旨壬寅制以中書侍郎平章事楊收爲門下侍郎兼刑部尚書以中書侍郎平章事曹確兼工部尚書兵部侍郎平章事高璩爲中書侍郎知政事餘並如故秋七月壬子延資庫使夏侯孜奏鹽鐵戶部生積欠當使咸通四年已前延資庫錢絹三百六十九萬餘

貫匹內戶部每年合送錢二十六萬四千一百八十貫
匹從大中十二年至咸通四年九月已前除納外欠一
百五十萬五千七百一十四萬貫匹當使緣戶部積欠
數多先具申奏請於諸道州府場監院合納戶部所收
八十文除陌錢內割一十五文屬當使自收管勅命雖
行送納稽緩今得戶部迭稱所收管除陌錢絹外更有
諸雜物貨延資庫徵收不便請起今年合納延資庫錢
絹一時便足其已前積欠候物力稍充積漸填納其所
割一十五文錢卽當司仍舊收管又緣累歲以來嶺南
用兵多支戶部錢物當使不欲堅論舊欠請依戶部商

量合納今年一年額色錢絹須足明年卽依舊制三月
九月兩限送納畢其以前積欠仍令戶部自立填納期
限者勅旨依之十月丙辰以中書舍人李蔚權知禮部
貢舉十一月乙酉以大同軍防禦使盧簡方檢校工部
尚書滄州刺史御史大夫充義昌軍節度滄濟德觀察
等使乙未以兵部侍郎蕭實本官同中書門下平章事
六年正月癸未朔丁亥制以河東節度使檢校刑部尚
書孔溫裕爲鄆州刺史天平軍節度鄆曹棣觀察處置
等使二月制以御史中丞徐商爲兵部侍郎同平章事
高彥罷知政事以吏部尚書崔慎由吏部侍郎鄭從讓

吏部侍郎王鐸兵部員外郎崔瑾張彥遠等考宏詞選
入金部員外郎張又思大理少卿董賡試拔萃選人以
給事中楊巖爲工部侍郎尋召爲翰林學士四月西川
節度使牛叢奏於蠻界築新城安城遏戎州功畢時南
詔蠻入寇姚嵩陳許大將顏復戍嵩州新築二城其年
秋六姓蠻攻遏戎州爲復所敗退去兵部侍郎平章事
徐商蕭寘轉中書侍郎知政事五月以左丞相楊知溫
爲河南尹以神策大將軍馬舉爲秦州經略招討使以
右金吾大將軍李宴元爲夏州刺史朔方節度等使安
南都護高駢奏於邕管大敗林邑蠻七月以右衛大將

軍薛綰檢校工部尚書徐州刺史充徐泗團練觀察防禦等使九月以中書舍人趙騶權知禮部貢舉以吏部侍郎蕭倣檢校禮部尚書滑州刺史御史大夫充義成軍節度鄭滑潁觀察等使十二月太皇太后鄭氏崩諡曰孝明是歲秋高駢自海門進軍破蠻軍收復安南府自李琢失政交趾湮沒十年蠻軍北寇邕容界人不聊生至是方復故地

七年春正月戊寅朔以太皇太后喪罷元會三月成德軍節度鎮冀深趙等州觀察處置等使金紫光祿大夫檢校司空鎮州大都督府長史御史大夫太原縣開國

伯食邑七百戶襲食實封一百戶王紹懿卒贈司徒紹
鼎之弟俱壽安公主之子也三軍推紹鼎子景崇知兵
馬留後事就加幽州張允伸兼太保平章事進封燕國
公以吏部侍郎鄭從讜檢校禮部尚書兼太原尹北都
留守御史大夫上柱國滎陽縣開國男食邑三百戶充
河東節度管內觀察處置等使四月壽安公主上表請
入朝詔曰志興奏汝以景崇未降恩命欲來朝覲事具
悉景崇素聞孝悌頗有義方洽三軍愛戴之情荷千里
折衝之寄纘廼舊服綽有令猷朝廷獎能續有處分緣
孝明太后園寢有日庶事且停候耐廟禮成當允誠請

七月沙州節度使張義潮進甘峻山青骹鷹四聯延慶
節馬二匹吐蕃女子二人僧曇延進大乘百法門明論
等八月鎮州王景崇起復忠武將軍左金吾衛將軍同
正檢校右散騎常侍兼鎮州大都督府左司馬知府事
御史中丞充成德軍節度觀察留後上柱國賜紫金魚
袋中書侍郎平章事徐商兼工部尚書十月沙州張義
潮奏差迴鶻首領僕固俊與吐蕃大將尚恐熱交戰大
敗蕃寇斬尚恐熱傳首京師右僕射門下侍郎平章事
夏侯孜檢校司空平章事兼成都尹劔南西川節度等
副大使知節度事安南高駢奏蠻寇悉平十一月十日

御宣政殿大赦以復安南故也以翰林學士承旨戶部侍郎路巖爲兵部侍郎同平章事義成軍節度蕭倣就加檢校兵部尚書褒能政也以禮部郎中李景溫吏部員外郎高湘試拔萃選人

八年春正月壬寅朔丁未河中晉絳地大震廬舍壓仆傷人有死者三月安南高駢奏南至邕管水路湍險巨石便塗令工人開鑿訖漕船無滯者降詔褒之制以門下侍郎兼戶部尚書平章事上柱國晉陽縣開國男食邑三百戶賜紫金魚袋楊收檢校兵部尚書充浙江西道觀察使以浙西觀察使杜審權守尚書左僕射以兵

部侍郎于棕本官同平章事九月丁酉延資庫使曹確
奏戶部每年合送當使三月九月兩限絹二十一萬四
千一百匹錢萬貫自大中八年已後至咸通四年積欠
一百五十萬五千七百餘貫匹前使杜棕申奏起請咸
通五年正月以後於諸道州府場監院合送戶部八十
文除陌錢內割十五文當使收管以填積欠續據戶部
牒稱州府除陌錢有折色零碎請起咸通五年所合送
延資庫錢絹逐年兩限須足其除陌十五文當司仍舊
收管前使夏侯孜具事由申奏且請依戶部論請期限
其咸通五年錢絹戶部已送納自六年至八年其錢絹

依前旋納又積欠三十六萬五千五百七貫匹者伏以
所置延資庫初以備邊爲名至大中三年始改今號若
財貨不充則名額虛設當制置之時所令三司逐年分
減送當使收管元勅只有錢數但令本司減割送庫不
定色目以此因循漸隳舊制年月旣久積欠漸多旣無
計以徵收乃指色以取濟稍稱備邊名號得遵元勅指
揮乃割戶部除陌八十文內十五文收管及戶部請逐
年送庫須且稟從今旣積欠又多終慮不及期限臣今
酌量諸道州府場監院合送戶部錢絹內分配令勒留
下合送延資庫數目令本處別爲綱運與戶部綱同送

上都直納延資庫則戶部免有逋懸不至累年積欠從之十月丙寅兵部侍郎判度支崔彥昭奏當司應收管江淮諸道州府咸通八年已前兩稅權酒及支米價并二十文除陌諸色屬省錢準舊例逐年商人投狀便換自南蠻用兵已來置供軍使當司在諸州府場監錢猶有商人便換齋省司便換文牒至本州府請領皆被諸州府稱准供軍使指揮占留以此商人疑惑乃致當司支用不充乞下諸道州府場監院依限送納及給還商人不得託稱占留者勅旨從之宰相門下侍郎戶部尚書曹確兼吏部尚書門下侍郎禮部尚書路巖兼戶部

尚書中書侍郎工部尚書徐商兼刑部尚書兵部侍郎
平章事于棕爲中書侍郎以中書舍人劉允章權知禮
部貢舉以吏部侍郎盧匡吏部侍郎李蔚兵部員外郎
薛崇司勳員外郎崔殷夢考吏部宏詞選人

九年春正月丙申以吏部侍郎李蔚檢校刑部尚書汴
州刺史御史大夫充宣武節度汴宋毫觀察處置等使
幽州節度使張允伸就加檢校太傅以兵部員外郎焦
瀆司勳員外郎李嶽考宏詞選人七月戊戌白虹橫亘
西方其月徐州赴桂林戍卒五百人官健許佶趙可立
殺其將王仲甫以糧料判官龐勛爲都頭剽掠湘潭衡

山兩縣有衆千人擅還本鎮九月辛卯朔甲午龐勛陷
宿州知州判官焦潞奔歸于徐乙未龐勛陷徐州殺節
度使崔彥曾判官焦潞李稅溫延皓崔蘊韋廷乂惟免
監軍張道謹遂出徐宿官庫錢帛召募兇徒不旬日其
徒五萬勛抗表請罪仍命羣兇邀求節鉞上遣中使因
而撫之賊令別將梁伍守宿州以姚周爲柳子寨主又
遣劉行及丁景琮吳迥攻圍泗州十月詔徵河南河東
山南諸道之師貶浙西觀察使楊收爲端州司馬同正
收弟前浙東觀察使越州刺史御史中丞巖爲韶州刺
史檢校工部尚書洪州刺史鎮南節度江南西道觀察

處置等使嚴譔長流嶺南賊攻泗州勢急淮南節度使
令狐絢慮失泗口爲賊奔衝乃令大將李湘赴援爲賊
所誘示弱乞降乘其無備爲賊所襲舉軍皆沒湘與都
監郭厚本俱爲賊所執送徐州十一月庚寅朔丁酉戌
時妖星初出如匹練亘空化爲雲沒在楚分吳迥旣執
李湘乃令小將張行簡吳約攻滁州城內無兵有淮南
遊奕兵三百人在州界見賊至徑來奔郡賊乘之遂陷
滁州張行簡執刺史高錫望手刃之屠其城而去行簡
又進攻和州刺史崔雍登城樓謂吳迥曰城中玉帛女
子不敢惜只勿取天子城池賊許之遂剽城中居民殺

判官張琢以琢城壕故也龐勛又令將劉贄攻濠州陷之囚刺史盧望回於廵車館望回鬱憤而死僕妾數人皆爲賊蒸而食之十二月庚辰朔將軍戴可師率沙陁吐渾部落二萬人於淮南與賊轉戰賊黨屢敗盡棄淮南之守是歲江淮蝗食稼大旱龐勛奏當道先發戍嶺南兵士三千人春冬衣今欲差人送赴邕管鄂岳觀察使劉允章上書言龐勛聚徒十萬今若遣人達嶺表如戍卒與勛合勢則禍難非細尋詔龐勛止絕兼令江淮諸道紀綱捕之

十年春正月己未朔以徐州用兵罷元會癸亥以右拾

遣韋保衡爲銀青光祿大夫守起居郎駙馬都尉尚皇女同昌公主出降之日禮儀甚盛以神武大將軍王曼權檢校工部尚書徐州刺史御史大夫充武寧軍節度徐泗濠觀察兼徐州北路行營招討等使智興之從子也以將軍朱克誠充北路招討都虞候王宥北路招討前軍使以翰林學士戶部侍郎劉瞻守本官同平章事
中書侍郎兼戶部尚書平章事蔣伸爲太子太保罷知政事病免也以門下侍郎兼刑部尚書同平章事徐商檢校兵部尚書江陵尹荆南節度使以右神策大將軍知軍使兼御史大夫上柱國龍陽縣開國伯食邑一千

戶康承訓可金紫光祿大夫檢校刑部尚書兼右神策
大將軍御史大夫上柱國扶風郡開國公食邑一千五
百戶充徐泗行營都招討使又以將軍李邵爲徐州南
路行營招討都虞候以將軍史忠用爲潁州行營都知
兵馬使將軍馬澹爲徐州行營都知兵馬使將軍董濤
充廬州行營都知兵馬使將軍戴可師充漕州行營招
討使將軍朱耶赤心充太原行營招討使沙陀三部落
等軍使將軍王建充淮泗行營招討使將軍曹翔充充
海節度行營招討使將軍馬舉爲揚州都督府司馬充
淮南行營招討使將軍高羅銳爲楚荆刺史本州行營

招討使將軍秦匡謨爲濠州刺史本州行營招討使將軍李播爲宿州刺史赴廬州行營招討使以將軍孟彪爲太僕卿充都糧料使凡十八將分董諸道之兵七萬三千一十五人正月一日進軍攻徐州魏博何弘敬奏當道點檢兵馬一萬三千赴行營時賊將劉行及丁景琮吳迥攻圍泗州可師乘勝救之屯於石梁驛賊自退去可師追擊生擒劉行及賊保都梁城乃斷行及之指懸於城下以示賊賊登城拜曰見與都頭謀歸朝可師旣知其窘乃退軍五里其城西面有水三面天軍賊乃夜中涉水而遁明早開城門惟病嫗數人而已王師入

壘未整翌日詰旦重霧賊軍大至可師方大醉單馬奔
出爲虹縣人郭真所殺一軍盡沒惟忠武太原沙陀之
騎軍保全而退副將王健爲賊所擒劉行及却爲賊將
吳迥所得吳迥乃進軍復圍泗州自是梯衝雲合內外
不通龐勛恃其驟勝遣人上表詞語不恭又與康承訓
書指斥朝政王晏權者智興之猶子也故授以武寧節
制以招之以冀招懷徐人怨王式之誅相扇構亂數月
招攜啗之以利民闕卒無革心者康承訓大軍攻宿州
賊將梁伾出戰屢敗乃授承訓檢校尚書右僕射兼滑
州刺史義成軍節度使責授端州司馬楊收長流驩州

與嚴譔並賜死於路其黨楊公慶嚴季實楊全益史明
廉遂何師玄李孟勲馬全祐李羽王彥復等長流儋崖
播等州判官朱侂常潏閻均等配流嶺南以河中節度
使開府儀同三司檢校司徒平章事上柱國譙郡開國
公食邑二千戶夏侯孜爲太子少保分司東都時南平
蠻寇西川責孜在蜀日失政也二月己丑龐勛急攻泗
州遣牙將李員入城見刺史杜悛曰留後知中丞名族
不敢令軍士失禮但開城門令百姓存活無相疑也悛
執而殺之詔司農卿薛瓊使淮南廬壽楚等州點集鄉
兵以自固四月康承訓奏大敗柳子寨賊詔監軍楊玄

价與康承訓商量拔汴河水以灌宿州六月丁亥朔戊戌制曰動天地者莫若精誠致和平者莫若修政朕顧惟庸昧託于王公之上于茲十一年矣祇荷丕構寅畏小心慕唐堯之欽若昊天遵周王之昭事上帝念茲夙夜靡替虔恭同馭朽之憂勤思納隍之軫慮內戒奢靡外罷畋遊匪敢期於雍熙所自得於清淨止望寰區無事稼穡有年然而燭理不明涉道唯淺氣多理鬱誠未感通早暵是虞蟲螟爲害蠻蜚未賓於遐裔寇盜復蠹於中原尚駕戎車益調兵食俾黎元之重困每宵盱而忘安今盛夏驕陽時雨久曠憂勤兆庶旦夕焦勞內修

香火以虔祈外罄牲玉以精禱仰俟玄貺必致甘滋而
油雲未興秋稼闕望因茲愆亢軫于誠懷矧復暴政煩
刑強官酷吏侵漁蠹耗陷害孤煢致有冤抑之人構災
沴之氣主守長吏無忘奉公伐叛興師蓋非獲已除奸
討逆必使當辜苟或陷及平人自然風雨愆候凡行營
將帥切在審詳昭示惻憫之心敬聽勤卹之旨應京城
天下諸州府見禁囚徒除十惡忤逆官典犯贓故意殺
人合造毒藥放火持仗開劫墳墓及關連徐州逆黨外
並宜量罪輕重速令決遣無久繫留雷雨不同田疇方
瘁誠宜愍物以示好生其京城未降雨間宜令坊市權

斷屠宰昨陝虢中使迴方知蝗旱有損處諸道長史分
憂共理宜各推公共思濟物內有饑歉切在慰安哀此
蒸人毋俾艱食徐方寇孽未殄師旅有征凡合誅鋤審
分淑慝無令脅從橫死元惡偷生宜申告伐之文使知
逆順之理於戲每思禹湯之罪已其庶成康之措刑孰
謂德信未孚教化猶梗咨爾多士俾予一人旣引過在
躬亦漸幾于理布告中外稱朕意焉賊將鄭鎰急攻壽
州詔南面招討使馬舉救之賊解圍而去康承訓悉兵
攻賊小雖寨不利而退七月康承訓攻賊柳子寨垂剋
而賊將王弘立救至王師大敗承訓退保宋州龐勛乘

勝自率徐州勁卒併攻泗州留其都將許佶守徐州詔南面招討使馬舉爲行營都招討使代承訓率諸軍以援泗州八月和州防虞行官石侔等一百三十人狀訴刺史崔雍稱賊初劫烏江縣雍令步奏官二人探知雍猶不信二人並被枷扭續差人探見賊已去州十里賊尋逼州城崔雍與賊頭吳約於鼓角樓上飲酒許與賊州又認軍事判官李譙爲親弟表狀驅使官張立爲男只乞二人并身其餘將士一任處置便令押衙李詞等各脫下衣甲防虞官健束手被斬者八百餘人行官石瓊脫衣甲稍遲便被崔雍遣賊處斬其崔雍所有料錢

并家口累差人押送往采石今在潤州豈有將一千人
兵士之命贖拔已之一身不惟辜其神明實亦生負聖
主兼科配軍州官吏修葺城池妄稱出料錢修城者勅
曰臣子之節無如盡忠士人之風宜當遠恥崔雍任居
牧守賊犯州城禦扞曾不發言從容乃與命酒况石瓊
未脫衣甲志在當鋒不能獎其赤誠翻令擒送賊所原
其深意與賊通和臣節全虧情狀可見欲行朝典宜更
推窮其崔雍家口並在宣州宜令宣歙觀察使追崔雍
收禁速勘逐具事由申奏是月馬舉率師解泗州之圍
賊黨遁去勅曰當崔雍守郡之日是龐勛肆逆之初屬

狂寇奔衝望風和好置酒以邀賊將啟關而納竟徒城
內不許持兵皆令解甲致使三軍百姓拔血相視連頭
受誅初聞奏陳深駭觀聽錫望守城而死已有追榮杜
悃孤壘獲全尋加殊獎旣褒忠節難赦罪人玉石固分
懲勸斯在將垂誠於四海當何愛於一夫其崔雍宜差
內養孟公度專往宣州賜自盡公度至雍死於陵陽館
其男黨兒歸僧配流康州錮身遞送司勳郎中崔原貶
柳州司戶比部員外郎崔福昭州司戶長安縣令崔朗
澧州司戶左拾遺崔庚連州司戶荆南觀察支使崔序
衡州司戶皆雍之親黨也九月賊宿州守將張玄稔以

城降有兵萬人馬舉率師赴之龐勛聞之遂急攻玄稔
玄稔賊之勁將出遂與舉合勢急圍徐州許佶登城拒
守者三日佶敗走出玄稔收復徐州龐勛方來赴援聞
城已拔欲南趨濠州馬舉追及濶河擊敗之勛溺水而
死蕭縣主將又斬許佶首來降徐寇悉平初龐勛據徐
州倉庫素無貯蓄乃令羣兇四出於楊楚廬壽滁和兗
海沂密曹濮等州界剽牛馬輓運糧糗以夜繼晝招致
亡命有衆二十萬男女十五已上皆令執兵其人皆舒
鋤鈎爲兵號曰霍錐首尾周歲十餘郡生靈受其酷毒
至是盡平與玄稔詔曰去歲災興分野毒起徐方蕞爾

庸夫稱兵犯命招諭不復猖狂罔悛脅從三州之人汚染萬姓之俗逆順之理邪正坐分果有忠臣悉殲逆黨再清郡邑不舉干戈此皆衆人協心闔州受福但以首尾周歲取制克威里閭不安農桑失業言念於此倍積憂懷已有詔指揮令授立稔銀青光祿大夫檢校右散騎常侍兼右驍衛大將軍御史大夫賜分帛五千匹金盞一枚蓋碗一具金腰帶一條軍將張臯已下二十人等第優給今差高品李志承押領宣賜制曰朕以眇身獲承丕業虔恭惕厲十一載于茲况荷十七聖之鴻休紹三百年之慶祚將求理本敢忘宵衣雖誠信未孚而

寅畏不怠旣絕意於苑囿固無心於畋遊業業兢兢日
慎一日休徵罔應沴氣潛生南蠻將罷於戰爭徐寇忽
孤於惠養招諭不至虐暴滋深竊弄干戈擅攻州鎮將
邀符印輒恣克殘不畏神祇自貽覆滅股肱之臣以罪
惡之難捨腹心之衆謂悖逆之可誅爰徵甲兵用救塗
炭上將宣力內臣協心選用皆得於良材掃盪纔及於
周歲誅干紀反常之噍類懲亂臣賊子之奸謀今則已
及偃戈重康庶黎疇庸之典在絲髮以無私懋賞之時
貴纖毫之必當其四面行營節度使旣成茂勲宜加酬
獎並取別勅處分應諸道行營都將已下節度及軍將

各委本道具功勞名銜分析聞奏當續有處分被堅執
銳冒涉寒暄解甲橐弓還鄉復業頒繒帛之賜免差役
之征應四面行營將士今既平寧宜令次第放歸本道
其賞賜匹段已從別勅處分到本道後仍令節度使各
犒宴放歸私第便令歇息未用差使如行營人並免差
科色役如本廂本將今後有節級員闕且以行營軍健
量材差置用酬征伐之勤臨敵用命力屈殞身須慰傷
魂以彰忠節超與職事仍加任使如無父兄子弟卽有
妻女者卽委州使厚加贈卹常令安撫如是都將至都
虞候陣亡者與贈官應陣亡將士有父兄子弟願入軍

者便令本道填替如無父兄子弟仍且與給衣糧三年
因戰陣傷損手足永廢者終身不得停給如將士被賊
殺害者委所在州縣量事救接重與改瘞勿令暴露兼
與設祭王者以仁恕爲本拯濟是謀元惡旣已誅鋤脅
從宜從寬宥除龐勛親屬及桂州廻戈逆黨爲賊脅從
及因戰陣拒敵官軍招諭不悛懼法逃走皆非本惡蓋
鋒刃所驅今並釋放一切不問應舊軍將軍吏節及所
由旣已歸還征賦先宜蠲免其徐宿濠泗等州應合徵
秋夏兩稅及諸色差科色役一事已上宜放十年已後
蠲放三年待三年後續議條疏處分編疇失業丘井無

人桑柘枌榆鞠爲茂草應行營處百姓田宅產業爲賊
殘毀燒焚者今旣平寧並許識認各還本主諸色人不
得妄有侵占九原可作千載不忘尚禁樵蘇寧傷丘壠
應有先賢墳墓碑記爲人所知被賊毀廢者卽與掩藏
仍量致祭自用兵已來郡邑皆罹攻劫遠念驚撓尤在
慰安今遣右散騎常侍劉異兵部郎中薛崇等往彼宣
撫於戲朕以四海爲家兆人爲子一物失所每軫納隍
之憂一方未寧常負阡危之戒今元克就戮逆黨誅夷
載戢干戈永銷氛祲庶平妖氣允洽嘉祥遐邇臣寮當
體予意制以徐州南面招討使檢校尚書左僕射右神

武大將軍權知淮南節度事扶風縣開國伯食邑一千
戶馬舉可檢校司空兼揚州大都督府長史淮南節度
副大使知節度事以右武衛大將軍徐州東南面招討
使曹翔檢校兵部尚書兼徐州刺史御史大夫徐泗濠
團練防禦等使以前淮南節度使檢校司空平章事上
柱國京國公食邑三千戶令狐絢爲太子太保分司東
都魏博節度使檢校太傅同平章事何弘敬卒三軍立
其子全暉爲兵馬留後十一月南詔蠻驃信坦綽酋龍
率衆二萬寇嶺州定邊軍節度都頭安再榮守清溪關
爲賊所攻再榮退保大渡河北去清溪關二百里隔水

相射凡九日八夜定邊軍節度使竇滂勒兵拒之十二
月驃信遣清平官十餘人來僞和與竇滂語次蠻軍船
楫競渡忠武武寧軍兵士結陣抗之接戰自午及申蠻
軍稍却竇滂自縊于帳中徐州將苗全緒解之謂滂曰
都統何至於是但安心全緒與再榮弘節等血戰取勝
全緒三人率兵而出滂乃單騎宵遁其夜蠻軍營於山
下全緒等謀曰彼衆我寡若明日對陣吾屬敗矣可夜
擊之令其軍亂自解去忠武武寧之師乃夜入蠻軍弓
弩亂發蠻衆大駭全緒等三將保軍而去蠻軍乘勝進
攻西川城朝廷以顏慶復爲大渡河制置劔南應接等

使宋威爲行營都知兵馬使將兵數萬與忠武武寧之師合與蠻軍戰于漢州之毗橋大捷解西川之圍明日蠻軍遁走西川平以蜀王佶爲開府儀同三司成都尹劔南西川節度副大使知節度事不出閤以盧耽知節度事詔河東節度使鄭從讜赴闕以義成軍節度使光祿大夫檢校尚書左僕射同平章事滑州刺史上柱國會稽縣開國伯食邑二千戶康承訓以本官兼太原尹北都留守充河東軍節度使以吏部侍郎楊知溫吏部侍郎于德孫李玄考官司封員外郎盧堯刑部侍郎楊戴考試宏詞選人以虞部郎中宋震前昭應主簿胡德

融考科目舉人詔以兵戈纒罷且務撫寧其禮部貢舉
宜權停一年付中書行勅指揮其兩省官等不用論奏
勅荆南節度使杜棕據司天奏有小孛星氣經歷分野
恐有外夷兵水之患緣邊藩鎮最要隄防宜訓習師徒
增築城堡凡關制置具事以聞制以魏博節度使何全
暉起復檢校司空同平章事

十一年春正月甲寅朔制尚書右僕射杜審權爲檢校
司徒河中尹絳慈隰節度觀察處置等使丙午制宰相
門下侍郎吏部尚書曹確可兼尚書左僕射門下侍郎
戶部尚書路巖可兼右僕射中書侍郎于棕可兼戶部

尚書平章事劉瞻可中書侍郎知政事餘並如故己酉
制河東節度使康承訓將門瑣質戎壘微才曾不知兵
謬膺重祿憂韜鈴以効任畜奸惡以事君幾授鉞於戎
藩嘗執金以徼道謂其盡節委以專征屬者徐部匪寧
敢干紀律俾護諸將坐覆危巢罄國幣以佐軍頒王爵
而賞士而玩寇莫戰按甲不前立法未學於穰苴申令
頓虧於孫子况部伍不戰逼撓無謀人數空多軍威何
振使農夫釋耒工女下機始凝望於天誅翻有思於賊
至洎元兇自潰立稔効忠彭門洞開爾功何有而負恩
已甚瀆貨是求叨榮苟幸於一時遺患遂逾於積歲爰

行國典俾傳戎藩可蜀王傳分司東都再貶恩州司馬

同正馳驛發遣以檢校左散騎常侍泗州刺史杜悛檢

校工部尚書滑州刺史義成軍節度鄭滑觀察等使以

河東行營沙陀三部落羌渾諸部招討使檢校太子賓

客監察御史朱邪赤心爲檢校工部尚書單于大都護

御史大夫振武節度麟勝等州觀察等使仍賜姓名曰

李國昌以吏部尚書蕭鄴吏部侍郎于德孫吏部侍郎

楊知溫考官司勳員外郎李耀禮部員外郎崔澹等考

試應宏詞選人以河陽三城節度孟懷澤觀察使中散

大夫檢校禮部尚書孟州刺史御史大夫崔彥昭爲金

紫光祿大夫檢校刑部尚書太原尹北都留守河東節
度觀察等使以兵部侍郎翰林學士承旨扶風縣開國
子食邑五百戶駙馬都尉韋保衡本官同平章事以兵
部侍郎劉鄴判度支左僕射門下侍郎同平章事曹確
以病求免授檢校司空同平章事兼潤州刺史充浙江
西道觀察等使魏博節度使何全皞酷政爲衙軍所殺
推其大將韓君雄爲留後四月癸未朔戊子勅去年屬
以用軍之際權停貢舉一年今旣去戈却宜仍舊來年
宜別許三十人及第進士十人明經二十人已後不得
援例八月辛巳朔己酉同昌公主薨追贈衛國公主諡

日文懿主郭淑妃所生主以大中三年七月三日生成
通九年二月二日下降上尤鍾念悲惜異常以待詔韓
宗紹等醫藥不効殺之收捕其親族三百餘人繫京兆
府宰相劉瞻京兆尹溫璋上疏論諫行法太過上怒叱
出之九月丙辰制以正議大夫守中書侍郎兼刑部尚
書同平章事充集賢殿大學士上柱國彭城縣開國侯
食邑一千戶賜紫金魚袋劉瞻檢校刑部尚書同平章
事兼江陵尹充荆南節度等使翰林學士戶部侍郎知
制誥上柱國賜紫金魚袋鄭畋爲梧州刺史正議大夫
御史中丞上柱國賜紫金魚袋孫瑋爲汀州刺史將仕

郎右諫議大夫柱國賜紫金魚袋高湘爲高州刺史中散大夫比部郎中知制誥柱國賜紫金魚袋楊知至爲瓊州司馬將仕郎守禮部郎中魏管爲春州司馬朝議大夫行兵部員外郎判度支案柱國張顏爲播州司戶朝議大夫行刑部員外郎柱國崔顏融爲雷州司戶並坐劉瞻親善爲韋保衡所逐也京兆尹溫璋貶振州司馬制出之夜璋仰藥而死劉瞻再貶康州刺史十月以給事中薛能爲京兆尹以中書舍人高湜權知禮部貢舉十一月己酉朔辛亥制以禮部尚書王鐸本官同平章事丁卯勅徐州地當沛野軍本驍雄寔爲壯國之都

固協建侯之制况山河素異土俗甚殷豈欲削卑挫其繁盛蓋緣比因稔禍或至亂常罪由已招孽非天作桂林叛卒繼有逆謀塗炭生靈首尾周歲殺傷黎庶汚染忠良所不忍言尋加剪滅是以卑其鎮額隸彼藩方近屬大兵已來饑年荐至且聞軍人百姓深恥前非願行舊規却希建節朕每深軫念思致小康特示渥恩復其軍額宜賜宣徽軍綾絹十萬匹助其宴犒必獲周豐其徐州都團練使改爲感化軍節度徐宿濠泗等州觀察處置等使以吏部侍郎鄭從讜檢校戶部尚書兼外州刺史御史大夫充宣武軍節度使代李蔚以蔚檢校吏

部尚書揚州大都督府長史兼淮南節度副大使知節度事

十二年春正月戊申宰相路巖率文武百寮上徽號曰睿文英武明德至仁大聖廣孝皇帝御含元殿冊禮畢大赦辛酉葬衛國公主於少陵原先是詔百寮爲挽歌詞仍令韋保衡自撰神道碑京兆尹薛能爲外監護供奉楊復瓌爲內監護威儀甚盛上與郭淑妃御延興門哭送幽州節度使張允伸病請以子簡會爲節度副大使權知兵馬事詔從之三月以吏部尚書蕭鄴吏部侍郎歸仁晦李當考官司封郎中鄭紹業兵部員外郎陸

勲等考試宏詞選人四月以左僕射門下侍郎同平章
事路巖檢校司徒兼成都尹劔南西川節度等使五月
庚申勅愼恤刑獄太易格言語曰如得其情卽哀矜而
勿喜而獄吏苛刻務在舞文守臣因循罕聞視事以此
械繫之輩溢於狴牢追捕之徒繁於簡牘實傷和氣因
致沴氛况時屬燔蒸化先茂育並赦罪戾式順生成應
天下所禁繫罪人除十惡忤逆故意殺人合造毒藥持
仗行劫開發墳墓外餘並宜疎理釋放或信任人吏多
有生情繫留續察訪得知本道觀察使判官州府本曹
官必加懲譴以誠慢易到後十日內速疎理分析聞奏

上幸安國寺賜講經僧沉香高座七月辛丑中書門下
奏准今年六月十二日勅釐革諸道及在京諸司奏官
并請章服事者其諸道奏州縣官司錄縣令錄事叅軍
或見任公事敗闕不理切要替換及前任實有勞効并
見有闕員卽任各舉所知每道奏請仍不得過兩人其
河東潞府邠寧涇原靈武鹽夏振武天德鄜坊滄德易
定三川等道觀察防禦等使及嶺南五管每道每年除
令錄外許量奏簿尉及中下州判司及縣丞共三人福
州不在奏州縣官限其黔中所奏州縣官及大將管內
官卽任準舊例處分在京諸司及諸道帶職奏官或非

時僉替考限未滿並却與本資官諸道節度及都團練防禦使下將校奏轉試官及憲御等令諸節度事每年量許五人都團練防禦量許三人爲定不得更於其外奏請其御史中丞已下卽準勅文條疏須有軍功方可授任自今後如顯立戰伐功勞者任具事績申奏如檢甚不虛當別與商量處分以外輒不得更有奏請其幽鎮魏三道望且準承前舊例處分勅旨從之十二月以檢校戶部尚書汴州刺史御史大夫宣武軍節度使鄭從讜爲廣州刺史嶺南東道節度觀察處置等使

十三年春正月壬寅朔甲戌制以兵部侍郎判度支劉

鄴本官同平章事幽州盧龍等軍節度使檢校司徒同

平章事幽州大都督府長史上柱國燕國公食邑三千

戶張允伸卒贈太尉諡曰忠烈允伸鎮幽州二十三年

二月幽州牙將張公素奪留後張簡會軍政自稱留後

丁巳制以尚書右僕射門下侍郎同平章事于琮檢校

司空襄州刺史充山南東道節度觀察處置等使以御

史中丞趙隱爲戶部侍郎本官同平章事三月以吏部

尚書蕭鄴吏部侍郎獨孤雲考官職方郎中趙蒙駕部

員外郎李超考試宏詞選人試日蕭鄴替差右丞孔溫

裕權判五月庚午朔辛未勅檢校尚書左僕射守左羽

林軍統軍御史大夫張直方貶康州司馬同正以其部

下爲盜故也乙亥國子司業韋殷裕於閣門進狀論淑

妃弟郭敬述陰事上怒甚卽日下京兆府決殺殷裕籍

沒其家殷裕妻崔氏音聲人鄭羽客王燕客婢微娘紅

子等九人配入掖庭閣門使田獻鈺奪紫配於橋陵閣

門司閤敬直決十五配南衙爲受殷裕文狀故也給事

中杜裔休貶端州司馬中書舍人崔沆循州司戶殷裕

妻兄也太僕少卿崔元闕州司戶殷裕妻父也前河陰

院官韋君卿爲愛州宋平尉殷裕季父也以前大理正

万俟鎔爲國子司業前興元少尹馮彭爲普州刺史前

大理正陽瑄爲昌州刺史丙子制開府儀同三司檢校
尚書左僕射兼襄州刺史御史大夫充山南西道節度
觀察等使于琮可正議大夫守普王傅分司東都辛巳
勅尚書左丞李當貶道州刺史吏部侍郎王珣貶漳州
刺史左散騎常侍李郁貶賀州刺史前中書舍人封彥
卿貶湖州司戶翰林學士承旨兵部侍郎知制誥張昺
貶封州司馬右諫議大夫楊塾貶和州司戶工部尚書
嚴祁貶彬州刺史給事中李貺蘄州刺史給事中張鐸
藤州刺史左金吾衛大將軍充左街使李敬伸儋州司
戶前青州刺史平盧軍節度使于涓爲涼王府長史分

司東都前湖南觀察使于環爲袁州刺史涓環琮之兄也于藹于蕘亦配流自李當已下皆于琮之親黨也爲韋保衡所逐以天德防禦使檢校左散騎常侍段文楚爲雲州刺史大同軍防禦使六月義成軍節度使檢校工部尚書杜悛奏當管潁州僧道百姓舉留刺史宗回勅曰回清幹臨人自有月限方藉綏輯未議替移六月

中書門下奏今月十七日延英面奉聖旨令誠約天下州府應有逃亡戶口其賦稅差科不得攤配見在人戶上者伏以諸道州府或兵戈之後災沴之餘戶口逃亡田疇荒廢天不敷佑人多艱危鄉閭屢困於征徭帑藏

因茲而耗竭遂使從來經費色額太半空系簿書緩徵
歛則闕於供須促期限則迫於貧苦言念凋弊勞乃憂
勤不降明文孰知聖念其逃亡戶口賦稅及雜差科等
須有承佃戶人方可依前應役如將闕稅課額攤於見
在人戶則轉成逋債重困黎元或富者有連阡之田貧
者無立錫之地欲令均一固在公平若令狡猾之徒得
以昇降由已望其完葺不亦難乎全由長史竭誠方便
疲忙漸泰臣等商量令諸道州府準此條疏應有逃亡
戶口稅賦并雜色差科等並不得輒更攤配於見存務
人戶之上設法招攜多方撫御乘茲豐稔重獲昭蘇苟

致安寧自當遷陟不遵詔令必舉典刑從之七月以前
義昌軍節度使盧簡方爲太僕卿十二月以振武節度
李國昌爲檢校右僕射雲州刺史大同軍防禦等使國
昌恃功頗橫專殺長史朝廷不能平乃移鎮雲中國昌
稱病辭軍務乃以太僕卿盧簡方檢校刑部尚書雲州
刺史充大同軍防禦等使上召簡方於思政殿謂之曰
卿以滄州節鎮屈轉大同然朕以沙陀羌渾撓亂邊鄙
以卿曾在雲中惠及部落且忍屈爲朕此行具達朕旨
安慰國昌勿令有所猜嫌也是月李國昌小男克用殺
雲中防禦使段文楚據雲州自稱防禦留後制追諡宣

宗爲元聖至明成武獻文睿智章仁神聰懿道大孝皇帝

十四年春正月丙寅朔御史中丞韋蟾奏應諸州刺史除授正衙辭謝後託故陳牒請假實爲容易自今後如實有故爲衆所知者三日外不在陳牒之限應內外除官入京合便朝謝如遇假日且合在都亭驛近日多因請假便歸私家旣犯條章頗乖禮敬自今已後望準故事如未朝謝須於都亭驛如違越臺司勘當申奏從之辛未以雲朔暴亂代北騷動賜盧簡方詔曰李國昌久懷忠赤顯著功勞朝廷亦三受土疆兩移旌節其爲寵

遇實寡比倫昨者徵發兵師又令克讓將領惟嘉節義同絕嫌疑近知大同軍不安殺害段文楚推國昌小男克用主領兵權事雖出於一時心豈忘於長久段文楚若實刻剝自結怨嫌但可申論必行朝典遽至傷殘性命剝剔肌膚慘毒憑凌殊可驚駭况忠烈之後節義之門致茲橫亡尤悚觀聽若克用暫勿主兵務束手待朝廷除人則事出權宜不足猜慮若便圖軍柄欲奄有大同則患繫久長故難依允料國昌輸忠効節必當已有指揮知卿兩任雲中恩及國昌父子敬憚懷感不同常人宜悚與書題深陳禍福殷勤曉諭劈析指宜切令大

節無虧勿使前功併棄簡方準詔諭之國昌不奉詔乃詔太原節度使崔彥昭幽州節度使張公素帥師討之三月以新除大同軍使盧簡方爲單于大都護振武節度麟勝等州觀察等使時李國昌據振武簡方至嵐州而卒自是沙陀侵掠代北諸軍鎮庚午詔兩街僧於鳳翔法門寺迎佛骨是日天雨黃土徧地四月八日佛骨至京自開遠門達安福門綵棚夾道念佛之音震地上登安福門迎禮之迎入內道場三日出於京城諸寺士女雲合威儀盛飾古無其比制曰朕以寡德纘承鴻業十有四年頃屬寇猖狂王師未息朕憂勤在位愛育生

靈遂乃尊崇釋教至重立門迎請真身爲萬姓祈福今
觀觀之衆隘塞路岐載念徃牢寢興在慮嗟我黎人陷
於刑辟况漸當暑毒繫於縲紲或積幽凝滯有傷和氣
或關連追擾有妨農務京畿及天下州府縣禁囚徒除
十惡忤逆故意殺人官典犯贓合造毒藥放火持仗開
發墳墓外餘罪輕重節級遞減一等其京城軍鎮限兩
日內疎理訖聞奏天下州府勅到三日內疎理聞奏以
吏部侍郎蕭倣爲兵部侍郎同平章事六月帝不豫七
月癸亥朔戊寅疾大漸庚午制立晉王儼爲皇太子權
勾當軍國政事辛巳遺詔曰朕祇事九廟君臨四海夕

惕如厲宵分靡寧必求政化之源思建大中之道至於
懷柔夷貊偃戢干戈皆以德綏亦自馴致冀清淨之爲
理庶洽平之可臻自秋已來忽爾安疹坐朝旣闕踰旬
未瘳六疾斯侵萬機多曠醫和無驗以至彌留嗚呼數
災有窮聖賢之所必同明於斯言是爲達節載申顧命
式叶典謨皇太子權勾當軍國事儼性稟寬和生知忠
孝德苞睿哲聖表徇齊必能揚祖宗之重光荷邦家之
丕構宜令所司具禮於柩前卽皇帝位以司空門下侍
郎平章事韋保衡攝冢宰軍國務殷豈可久曠况易月
之制行之自古皇帝宜三日而聽政二十七日釋服諸

道節度觀察團練防禦等使及監軍諸州刺史受寄至重並不得離任赴哀文武常叅官朝晡之臨十五舉音宮中當臨者非時無得擅哭天下人吏百姓告哀後出臨三日皆釋服勿禁食肉飲酒婚姻祭祀釋服之後無禁當舉薄葬之禮宜遵漢魏之文其山陵制度切在儉約並不得以金銀錦繡文飾喪具五坊鷹犬等除蒐狩外餘並解放其醫官段璲趙玘符虔休馬及等並釋放咨爾將相卿士中外臣寮竭力盡忠匡予令嗣送往事居無違朕志是日崩于咸寧殿聖壽四十一百寮上諡曰睿文昭聖恭惠孝皇帝廟號懿宗十五年二月葬于

簡陵

史臣曰臣常接咸通耆老言恭惠皇帝故事當大中時四海承平百職修舉中外無疵政府庫有餘貲年穀屢登封疆無擾恭惠始承丕構頗亦勵精延納讜言尊崇耆德數稔之內洋洋頌聲然器本中庸流於近習所親者巷伯所昵者桑門以蠱惑之侈言亂驕淫之方寸欲無怠忽其可得乎及釁結蠻陬奸生戍卒發五嶺之轉輸寰海動搖徵二蜀之扞防蒸人盪覆徐寇雖殄河南幾空然猶削軍賦而飾伽藍困民財而修淨業以諛佞爲愛已謂忠諫爲妖言爭趨險詖之途罕勵貞方之節

見豕負塗之愛豎非次寵昇焦頭爛額之輔臣無辜竄
逐是以干戈布野蟲旱彌年佛骨纔入於應門龍輻已
泣於蒼野報應無必斯其驗歟土德凌夷禍階於此雖
有文景之英繼難以興焉自茲龜玉之不昌固其宜矣
黃髮遺叟言之涕零

贊曰邦家治亂在君聽斷恭惠驕奢賢良貶竄凶豎當
國儉人滿朝奸雄乘釁貽謀道消

舊唐書卷十九上考證

懿宗本紀咸通四年夏四月勅徐州防禦使爲文都隸
兗州○沈炳震曰按文都唐無此官疑團練使之譌
又隸兗州新書方鎮表在咸通三年

六年夏四月兵部侍郎同平章事徐商蕭寘轉中書侍
郎知政事○臣德潛按新書三月蕭寘薨不應四月

復轉中書侍郎必有一誤而兩書俱無寘傳未知孰
是

五月安南都護高駢奏於邕管大敗林邑蠻○臣宗甫

按通鑑注曰林邑在海南自至德後號環王與中國

久絕劉昫但見南蠻則謂之林邑誤也新書南詔傳亦云駢以選士五千渡江敗林邑兵於邕州亦承此而誤也

七年十月安南高駢奏蠻寇患平十一月十日御宣政殿大赦以復安南故墟○臣宗萬按六年紀曰是歲

秋高駢自海門進軍破蠻軍收復安南府若然則六年已收復安南豈有七年始奏而行大赦之理則安南之復實在七年明矣劉昫蓋因駢於六年秋發海門遂云復安南耳

八年三月以浙西觀察使杜審權守尚書左僕射○沈

炳震曰審權傳龐勛之亂審權猶在浙西而本紀八年已遷左僕射則去九年九月龐勛之反一年有餘不應遷而未去也此疑有誤

十年春正月中書侍郎兼戶部尚書同平章事蔣伸爲太子太保罷知政事○臣德潛按伸于二年九月已

罷政矣此疑錯簡于此

魏博節度使何弘敬卒三軍立其子全暉爲兵馬留後
○新書在七年六月

十三年十二月李國昌小男克用殺雲中防禦使段文楚自稱防禦留後○新書在僖宗乾符五年二月綱

目同新書

十四年四月迎佛骨至京制或積幽寧掃有傷和氣云
云○寧掃乃凝滯之誤也已改正

舊唐書卷十九下

後晉司空同中書門下平章事劉 昫撰

本紀第十九下

僖宗

僖宗惠聖恭定孝皇帝諱儼懿宗第五子母曰惠安皇后王氏咸通三年五月八日生於東內初封普王名儼十四年七月懿宗大漸其月十八日制曰朕守大器之重居兆人之上日慎一日如履如臨旰昃勞懷寢興思理涉道猶淺導化未孚而攝養乖方寒暑成癘實有慮於闕政且無暇於怡神恙未少瘳日加寢劇萬務凡總

須有主張考思舊章謀于卿士思闡鴻業式建皇儲第五男普王儼改名儼孝敬溫恭寬和博厚日新令德天假英姿言皆中規動必由禮俾崇邦本允協人心宜立爲皇太子權勾當軍國政事咨爾中外卿士泊于腹心之臣敬保予膺輔成予志各竭乃心以安黎庶布告中外知朕意焉是日懿宗崩二十日卽皇帝位于樞前時年十二左軍中尉劉行深右軍中尉韓文約居中執政並封國公八月皇帝釋服冊聖母王氏爲皇太后河南大水自七月雨不止至釋服後方霽九月守司空門下侍郎平章事韋保衡貶賀州刺史以岳州刺史于琮爲

太子少傅緣琮貶逐者並放還循州司戶崔沆復爲中書舍人前戶部侍郎知制誥翰林學士承旨鄭畋爲左散騎常侍前兵部侍郎知制誥翰林學士張昺爲太子賓客前諫議大夫高湘復爲諫議大夫前宣歙觀察使楊嚴復爲給事中十月左僕射門下侍郎平章事劉鄴檢校左僕射同平章事兼揚州大都督府長史充淮南節度觀察副大使知節度事十一月以光祿大夫守太子少傅駙馬都尉于琮檢校尚書左僕射兼襄州刺史御史大夫充山南東道節度觀察等使十二月雷震義成軍節度使檢校刑部尚書杜慆就加兵部尚書

乾符元年春正月辛酉朔乙丑左僕射門下侍郎平章事蕭倣兼右僕射門下侍郎吏部尚書平章事王鐸檢校吏部尚書同平章事兼汴州刺史充宣武軍節度宋亳觀察等使二月葬懿宗于簡陵三月以河東節度使檢校尚書右僕射崔彥昭爲尚書兵部侍郎充諸道鹽鐵轉運等使以銀青光祿大夫京兆尹上柱國岐山郡開國公食邑三千戶竇澣檢校戶部尚書太原尹北都留守御史大夫充河東節度管內觀察處置等使以中書侍郎刑部尚書同平章事趙隱檢校吏部尚書潤州刺史浙江西道都團練觀察等使四月崔彥昭本官同

平章事領使如故以前淮南節度使李蔚爲吏部尚書
以天平軍節度使檢校尚書右僕射兼鄆州刺史高駢
檢校司空兼成都尹充劔南西川節度副大使知節度
事以右散騎常侍韋荷爲吏部侍郎前同州刺史崔璞
爲右散騎常侍右領軍衛上將軍渾僖檢校吏部尚書
左千牛衛上將軍以侍御史盧胤征爲司封員外郎判
戶部案五月以吏部侍郎鄭畋爲兵部侍郎同平章事
戶部侍郎知制誥翰林學士賜紫金魚袋盧攜本官同
平章事太子右庶子李嶧爲太僕卿侍御史裴渥爲起
居郎以嶺南東道節度使檢校刑部尚書鄭從讜爲刑

部尚書以吏部侍郎韋荷檢校禮部尚書廣州刺史嶺南東道節度使七月以禮部侍郎裴瓚爲檢校左散騎常侍潭州刺史御史大夫湖南觀察使故湖南觀察使李庾贈禮部尚書十月以中書舍人崔沆爲中書侍郎右諫議大夫崔胤爲給事中十一月丙戌朔庚寅上有事於宗廟禮畢御丹鳳門大赦改元爲乾符宰相蕭倣兼司空弘文館大學士太清宮使兵部侍郎崔彥昭爲中書侍郎兵部侍郎鄭畋爲集賢殿大學士以宣慰沙陀六州部落檢校兵部尚書李鈞爲靈武節度制曰朕以沙陀驍勇重累戰功六州蕃渾沐浴王化念其出於

猜貳互有傷殘而克璋報仇其意未已被我君臨之德軫吾子育之心爰擇良能俾之宣撫惟爾先王嘗鎮北門待國昌以雄傑之才置國昌於濟活之地旣藉奕葉之舊又懷任土之觀是用付以封疆委之軍旅必集王事無墜家聲初鈞父業鎮太原能安集代北部落時李國昌父子據大同振武吐渾契苾幽州諸道之軍攻之不利故假鈞靈武節鉞率師招諭之以長安令李壁爲諫議大夫以吏部員外郎徐彥若爲長安令兵部郎中盧鄩爲楚州刺史十二月党項迴鶻寇邊以左司郎中崔原爲兵部郎中江州刺史李可仁爲右司郎中權知

工部尚書牛蔚爲禮部尚書太子賓客于派爲工部尚書是冬南詔蠻寇蜀詔河西河東山南西道東川徵兵赴援西川節度使高駢奏奉勅抽發長武鄜州河東等道兵士赴劔南行營者伏以西川新軍舊軍差到已衆况蠻蜚小醜必可枝梧今以道路崎嶇館驛窮困更有軍頓立見流移所謂望一處完全而百處俱破且兵不在衆而在於和其左右神策長武鎮鄜州河東所抽甲馬兵士人數不少况備辦軍食費損尤多又緣三道藩鎮盡扼羌戎邊鄙未寧望不差發如已在道路並請降勅勒廻詔荅曰蠻蜚如尚憑凌固須倍兵禦敵若已奔

退卽要併力追擒方藉北軍助平南寇其三處兵士宜
委高駢候到蜀日分布驅使具務多多之辦寧亂整整
之師其河東一千二百人令竇滸不要差發時駢扞蠻
已退長武兵士竟至蜀而還議者惜其勞費而虛邀出
入之賞也右軍中尉韓文約以疾乞休致從之

二年春正月乙酉朔己丑宰相崔彥昭率文武百寮上
尊號上御正殿受冊以知內樞密田令孜爲右軍中尉
南蠻驃信遣使乞盟許之以鳳州刺史郭弘業爲左金
吾衛將軍庫部郎中韋岫爲泗州刺史都官員外郎李
頻爲建州刺史二月以兵部侍郎充諸道鹽鐵轉運使

王凝爲秘書監以所補吏職罪也以吏部侍郎裴坦爲兵部侍郎充諸道鹽鐵轉運使以翰林學士崔澹爲中書舍人翰林學士徐仁嗣爲司封郎中學士如故以容管經略招討使高秦檢校戶部尚書太府卿李嶧爲宗正卿湖州刺史張搏爲廬州刺史庫部員外郎楊堪爲吏部員外郎三月以右補闕鄭勤爲起居郎度支推官牛徽爲右補闕以戶部郎中崔彥融爲長安令都官郎中楊知退爲戶部郎中左司員外郎唐嶠爲刑部郎中刑部員外郎畢紹顏爲左司員外郎侍御史鄭頊爲刑部員外郎四月海賊王郢攻剽浙西郡邑以殿中侍御

史李燭爲禮部員外郎以太子賓客張昺爲吏部侍郎
前淮南節度使李蔚爲太常卿成德軍節度使王景崇
加開府儀同三司秘書監蕭峴爲國子祭酒汝州刺史
崔彥冲爲太子賓客分司新除吏部侍郎張昺爲京兆
尹東川點檢兵馬使吳行魯可金紫光祿大夫檢校兵
部尚書兼梓州刺史御史大夫充劔南東川節度等使
以東川節度使檢校戶部尚書崔充爲河南尹河南尹
李晦檢校左散騎常侍兼福州刺史福建都團練觀察
使以鳳翔隴西節度使檢校司徒同平章事上柱國京
國公食邑三千戶令狐絢進封趙國公五月濮州賊首

王仙芝聚於長垣縣其衆三千剽掠閩井進陷濮州俘
丁壯萬人鄭州節度使李種出兵擊之爲賊所敗以殿
中少監薛瑄爲衛州刺史國子司業裴拙爲洋州刺史
中書舍人崔沆爲禮部侍郎兵部郎中裴虔餘爲太常
少卿六月以司勳員外郎薛邁爲兵部郎中戶部員外
郎鄭就爲司勳員外郎倉部員外郎鄭縻爲戶部員外
郎主客員外郎王鐔爲倉部員外郎秋七月以大理卿
蔡行爲澧州刺史天德軍都防禦使大理卿張彥遠爲
大理卿以京兆尹張昺檢校戶部尚書兼鄆州刺史御
史大夫充天平軍節度鄆曹濮觀察等使以左司勳員

外郎杜貞符爲都官郎中吏部員外郎牛循爲金州刺史司封員外郎盧胤征爲吏部員外郎十月以秘書少監李貺爲諫議大夫以前大同軍及雲朔都防禦營田供軍等使李璫檢校左散騎常侍澧州刺史充天德軍澧州西城中城都防禦使本管押蕃落等使以考功員外郎趙蘊爲吏部員外郎戶部員外郎盧莊爲起居員外郎禮部員外郎蕭邁爲考功員外郎十一月以起居郎劉崇龜爲禮部員外郎殿中侍御史孔綸爲戶部員外郎是月雷震電左僕射王鐸兼門下侍郎同平章事

復輔政

三年春正月己卯朔司空門下侍郎同平章事蕭倣以病求免罷爲太子太傅浙西奏誅王郢徒黨以左金吾衛大將軍右街使齊克讓檢校兵部尚書兼充沂海等州節度使三月以吏部尚書歸仁晦吏部侍郎孔晦吏部侍郎崔堯試宏詞選人考功郎中崔庾考功員外郎周仁舉爲考官以太常卿李蔚本官同平章事奉天鎮上言金龍晝見自河昇天門下侍郎崔彥昭太清宮使弘文館大學士中書侍郎刑部尚書平章事鄭畋監修國史以右武衛大將軍墨冲謙爲左金吾衛大將軍以黎州刺史杜岡爲雅州刺史五月以江西觀察使獨孤

雲爲太子少傅金州刺史東鄉勳爲嘉州刺史六月勅
福建觀察使李播荊州刺史楊權古蔚州刺史王龜範
璧州刺史張贄濮州刺史韋浦施州刺史婁傅會邢州
刺史王回撫州刺史崔理黃州刺史計信卿等刺史親
人之官苟不諳詳豈宜除授比爲朕養百姓非獨榮爾
一身每念疲羸實所傷歎李播等九人授官之時衆詞
不可王回等三人到郡無政惟務貪求實汚方州並宜
停任以檢校右散騎常侍衛尉卿李鐸爲太府卿以涼
王傅分司裴思謙爲衛尉卿撫王府長史劉允章涼王
傅主客郎中崔福爲汾州刺史荆南節度副王慥爲主

客卿中六月以門下侍郎刑部尚書平章事太清宮使
弘文館大學士判度支崔彥昭兼左僕射中書侍郎鄭
畋兼門下侍郎太常卿平章事李蔚爲中書侍郎以歙
州刺史蕭騫爲右司員外郎右司員外郎崔潼爲歙州
刺史七月草賊王仙芝寇掠河南十五州其衆數萬是
月賊逼潁許攻汝州下之虜刺史王鐐刑部侍郎劉承
雍在郡爲賊所害賊遂南攻唐鄧安黃等州時關東諸
州府兵不能討賊但守城而已以戶部郎中李節爲駕
部郎中金部郎中王慥爲戶部郎中主客郎中鄭誠爲
金部郎中金部員外郎張譙爲主客郎中屯田員外郎

竇瑒爲金部員外郎京兆司錄趙曄爲屯田員外郎工部侍郎崔朗爲同州刺史左軍擗仗使左監門衛上將軍西門思恭爲右威衛上將軍以右諫議大夫知制誥魏瓘爲中書舍人九月以右丞崔蕤權知吏部侍郎禮部侍郎崔沆爲尚書右丞中書舍人高湘權知禮部侍郎京兆尹楊知至爲工部侍郎兵部尚書兼太常卿李璿檢校尚書右僕射太常衛尉卿蕭寬爲鴻臚卿充閑廐使以宰相崔彥昭男保謙爲秘書省校書郎右僕射門下侍郎平章事崔彥昭加特進門下侍郎禮部尚書平章事鄭畋可特進太中大夫平章事盧攜可銀青光

祿大夫銀青光祿大夫平章事李蔚可金紫光祿大夫以太府卿李嶧檢校工部尚書滑州刺史御史大夫充義成軍節度鄭滑潁觀察處置等使雄州自六月地震至七月未止壓傷人頗衆詔河南藩鎮舉兵討賊以刑部郎中李磻爲戶部郎中分司東都戶部郎中鄭誠爲刑部郎中戶部郎中知制誥翰林學士王徽爲中書舍人戶部員外郎翰林學士蕭邁爲戶部郎中學士並如故諫議大夫趙蒙爲給事中商州刺史張同爲諫議大夫十一月以司門員外郎鄭堯爲池州刺史水部員外郎樊充爲工部員外郎汴宋度支使杜孺休爲水部員

外郎太常少卿崔渾貶康州刺史揚州左司馬鄭祥澧
州刺史度支分巡院使李仲章爲建州刺史十二月以
右金吾衛將軍張簡會爲左金吾大將軍充右街使右
龍武將軍李弼爲右金吾將軍前陝西號觀察使陸墉
爲太子賓客

四年春正月癸酉朔丁丑降制赦天下繫囚及徒流人
放還以諫議大夫李湯爲給事中以兵部郎中崔厚爲
諫議大夫大理少卿王承顏爲鹽州刺史明州刺史殷
僧辯爲大理卿以吏部尚書鄭從讜吏部侍郎孔晦吏
部侍郎崔蕤考宏詞選人三月以開府行內侍監致仕

劉行深爲內侍省觀軍容守內侍監致仕以判鹽鐵案
檢校考功郎中鄭澂爲司封員外郎充轉運判官兵部
員外郎裴渥爲蘄州刺史職方員外郎盧澄爲兵部員
外郎以草賊大寇河南山南詔曰亂常干紀天地所不
容伐罪弔人帝王之大典歷觀往代徧數前朝其有怙
衆稱兵憑兇構孽或疑迷於郡縣或殘害於生靈初則
狐假鴟張自謂驍雄莫敵旋則烏焚魚爛無非破敗而
終蓋以逆順相懸幽明共怒近者龐勛拒命王郢挺災
結聚至多猖狂頗甚尋則身膏原野家受誅夷亦有方
從叛亂能自徊翔移吉凶於反掌之間變禍福於立談

之際則諸葛愛今爲刺史朱實見存將軍弘霸郎受職
於禁營宋再雄策名於淮海莫不身名光顯家族輝榮
近準諸道奏報草賊稍多江西淮南宋亳曹潁或攻郡
縣或掠鄉村雖命兵師且令招撫朕以寬弘爲理慈愍
居心每念蒼生皆同赤子恨不能均其衣食令致荒饑
寧忍迫以鋒鏑斷其身首如王仙芝及諸賊頭領能洗
心悔過散卒休兵所在州府投降便令具名聞奏朝廷
當議獎升如諸賊頑傲不悛克強自恃卽宜令諸道兵
師犄角誅剪若諸軍全捕得一火草賊數至三百人已
上者超授將軍賞錢一千貫如鄉村有幹勇才略而能

率合義徒驅除草寇者本處以聞亦與重賞如鄭鑑湯
羣之輩已爲刺史朝廷故不食言勅到宜令諸道明行
宣諭令知朕意青州節度使宋威上表請步騎五千特
爲一使兼率本道兵士所在討賊必立微功以酬聖獎
優詔嘉之乃授威諸道招討草賊使仍給禁兵三千甲
馬五百匹仍諭河南方鎮曰王仙芝本爲鹽賊自號草
軍南至壽盧北經曹宋半年燒劫僅十五州兩火轉鬪
踰七千衆諸道發遣將士同共討除日月漸深煙塵未
息蓋以遞相觀望虛費糒糧州縣罄於供承鄉村泣於
侵暴今平盧軍節度使宋威深憤萑蒲請行誅討朕以

威前時蜀部破南詔之全軍比歲徐州摧龐勛之大陣官階甚貴可以統諸道之都頭驍勇素彰足以破伏戎之草寇今已授指揮諸道兵馬招討草賊使候宋威到本道日供給犒設並取上供錢支給仍命指揮都頭凡攻討進退取宋威處分時賊渠王仙芝尚君長在安州宋威自青州與副使曹全晟進軍攻討所在破賊是月冤胸賊黃巢聚萬人攻鄆州陷之逐節度使薛崇五月幽州節度使李茂勳上表乞致仕以其男可舉權知兵馬事制以壽王傑爲開府儀同三司幽州經略盧龍等軍節度觀察押奚契丹等使以幽州節度副使權知兵

馬事李可舉檢校左散騎常侍幽州大都督府左司馬
充幽州兵馬留後制以幽州盧龍節度使檢校工部尚
書李茂勲守尚書左僕射致仕以前綿州刺史皇甫鏞
爲秘書少監以陳州刺史許珂爲睦州刺史以右衛將
軍程可復爲左衛大將軍黃巢賊陷沂州六月以宣歙
觀察使高駢檢校司空兼潤州刺史鎮海軍節度蘇常
杭潤觀察處置江淮鹽鐵轉運江西招討等使以汝州
防禦使李鈞檢校尚書右僕射潞州大都督府長史充
昭義軍節度潞邢洺磁觀察等使幽州留後李可舉請
以本軍討沙陀三部落從之七月黃巢自沂海其徒數

萬趨潁蔡入查牙山遂與王仙芝合七月賊陷隨州執
刺史崔休徵羣賊屯於白洑是月江州賊首柳彥璋聚
徒陷江州殺刺史陶祥八月以中書舍人崔澹權知貢
舉沙陀大寇雲朔十月詔昭義節度李鈞幽州李可舉
吐渾赫連鐸白義誠沙陀安慶薛葛部落合兵討李國
昌父子於蔚州十一月賊王仙芝率衆渡漢攻江陵節
度使楊知溫嬰城拒守知溫本非禦侮之才城無宿備
賊急攻之十二月賊陷江陵之郭知溫窮蹙求援於襄
陽山南東道節度使李福悉其師援之時沙陀軍五百
騎在襄陽軍次荆門騎軍擊賊敗之賊盡焚荆南郭郭

而去

五年春正月丁酉朔沙陀首領李盡忠陷遮虜軍太原節度使竇滌遣都押衙康傳圭率河東土團二千人屯代州將發求賞呼謀殺馬步軍使鄧虔竇滌自入軍中安慰仍借率富戶錢五萬貫以賞之朝廷以滌非禦侮才以前昭義節度使曹翔檢校尚書右僕射兼太原尹北都留守河東節度使又以左散騎常侍支謨爲河東節度副使二月王仙芝餘黨攻江西招討使宋威出軍屢敗之仍宣詔書諭仙芝仙芝致書於威求節鉞威僞許之仙芝令其大將尚君長蔡溫玉奉表入朝威乃斬

君長溫玉以徇仙芝怒急攻洪州陷其郭宋威赴援與賊戰大敗之殺仙芝傳首京師尚君長弟尚讓爲黃巢黨以兄遇害乃大驅河南山南之民其衆十萬大掠淮南其鋒甚銳侍中晉國公王鐸請自督衆討賊天子以宋威失策殺君長乃以王鐸檢校司徒兼侍中門下侍郎江陵尹荆南節度使充諸道兵馬都統三月王鐸奏兗州節度使李係爲統府左司馬兼潭州刺史充湖南都團練觀察使黃巢之衆再攻江西陷虔吉饒信等州自宣州渡江由浙東欲趨福建以無舟船乃開山洞五百里由陸趨建州遂陷閩中諸州以吏部尚書鄭從謹

吏部侍郎崔沆考宏詞選人七月滑州忠武昭義諸道之師會于太原大同軍副使支謨爲前鋒先趨行營八月沙陀陷岢嵐軍曹翔自率軍赴忻州翔至軍中風而卒諸軍皆退太原大懼閉城門昭義兵士爲亂劫坊市九月門下侍郎吏部尚書平章事李蔚檢校尚書左僕射充東都留守以吏部尚書鄭從讜本官同平章事十月司空平章事崔彥昭罷爲太子太傅十一月制以河東宣慰使權知代北行營招討崔季康檢校戶部尚書兼太原尹北都留守充河東節度代北行營招討使沙陀攻石州崔季康救之十二月季康與北面行營招討

使李鈞與沙陀李克用戰于岢嵐軍之洪谷王師大敗鈞中流矢而卒戊戌代州昭義軍亂爲代州百姓所殺殆盡以中書舍人張讀權知禮部貢舉

六年春正月辛卯朔河東節度使崔季康自靜樂縣收合餘衆迴軍軍亂殺孔目官石裕季康委衆遁歸行營衙將張錯郭肫率其衆歸太原兵士鼓譟攻東陽門入使衙季康父子皆被害三月以吏部侍郎崔沆崔澹試宏詞選人駕部郎中盧蒞刑部郎中鄭頊爲考官制以邠寧節度使李侁檢校戶部尚書兼太原尹北都留守充河東節度等使四月黃巢陷桂管五月賊圍廣州仍

與廣南節度使李巖浙東觀察使崔璆書求保薦乞天
平節鉞璆巖上表論之詔公卿議其可否宰相鄭畋盧
攜爭論於中書詞語不遜俱罷爲太子賓客分司東都
以吏部侍郎崔沆爲兵部侍郎戶部侍郎翰林學士豆
盧瑑並本官同平章事黃巢陷廣州大掠嶺南郡邑八
月制以特進檢校司空東都留守李蔚爲檢校司徒同
平章事兼太原尹北都留守河東節度觀察兼代北行
營招討供軍等使十月制以鎮海軍節度浙江西道觀
察處置等使高駢檢校司徒同平章事揚州大都督府
長史充淮南節度副大使知節度事江淮鹽鐵轉運江

南行營招討等使進封燕國公食邑三千戶初駢在浙西遣大將張璘梁績等大破黃巢於浙東賊進寇福建踰嶺表故移鎮揚州時賊北踰大庾嶺朝廷授駢諸道行營兵馬都統太原節度使李蔚卒以禮部侍郎張讀權知左丞事十一月制以銀青光祿大夫檢校右散騎常侍河東行軍司馬鴈門代北制置等使石嶺鎮北兵馬代北軍等使上柱國康傳圭檢校工部尚書兼太原尹北都留守河東節度使時傳圭已率兵在代州是月自行營赴任兩都虞候張錯郭肫迎於烏城驛並殺之軍中震悚又制以神策大將軍周寶檢校尚書左僕射

兼潤州刺史鎮海軍節度浙江西道觀察等使以定州
已來制置內閑廐宮苑等使金紫光祿大夫檢校刑部
尚書上柱國太原縣開國伯食邑七百戶王處存檢校
戶部尚書兼定州刺史充義武軍節度易定觀察處置
北平軍等使十二月制以河東馬步軍都虞候朱玫爲
代州刺史以太子賓客分司盧攜爲兵部尚書同平章
事太子賓客鄭畋檢校左僕射鳳翔尹充鳳翔節度使
廣明元年春正月乙卯朔上御宣政殿制曰朕祗膺寶
祚嗣守宗祧夙夜一心勤勞八載實欲驅黎元於仁壽
致華夏之昇平而國步猶艱羣生寡遂災迤荐起寇孽

仍臻竊弄干戈連攻郡邑雖輸降款未息狂謀江右海
南瘡痍既甚湖湘荆漢耕織屢空言念疲羸良深軫惻
我心未濟天道如何賴近者嚴勅師徒稍聞勝捷皆明
聖之潛祐寧菲德以言功屬節變三陽日當首歲乃御
正殿爰命改元况及發生是宜在宥自古繼業守文之
主握圖御宇之君必自正月吉辰發號施令所以垂千
年之懿範固萬代之洪基莫不由斯道也可改乾符七
年爲廣明元年近日東南州府頻奏草賊結連本是平
人迫於饑饉驅之爲盜情不願爲委所在長吏子細曉
諭如自首歸降保非詐僞便須撫納不要勘問如未倒

戈卽登時剪撲東南州府遭賊之處農桑失業耕種不
時就中廣州荆南湖南盜賊留駐人戶逃亡傷夷最甚
自廣明已前諸色稅賦宜令十分減四其河中府太原
府遭賊寇掠處亦宜準此吏部選人粟錯及除駁放者
除身名渝濫欠考外並以此遠殘闕收注入仕之門兵
部最濫全無根本頗壞紀綱近者武官多轉入文官依
資除授宜懲僭倖以辨品流自今後武官不得轉入文
官選改所冀輪轅各適秩序區分其內司不在此限沙
陀部落踰鴈門關進逼忻州二月沙陀逼太原陷大谷
康傳圭遣大將伊釗張彥球蘇弘軫分兵拒之於秦城

驛爲沙陀所敗傳圭怒斬蘇弘軫張彥球部下兵士爲亂倒戈攻太原殺傳圭監軍使周從寓安慰方定是月制以開府儀同三司門下侍郎兼兵部尚書同平章事充太清宮使弘文館大學士延資庫使上柱國滎陽郡開國公食邑三千戶鄭從讜檢校司空同平章事兼太原尹北都留守充河東節度管內觀察處置兼行營招討供軍等使黃巢賊軍自衡永州下頓陷湖南江西屬郡時都統王鐸前鋒都將李係守潭州有衆五萬并諸團結軍號十萬賊自桂陽編木爲棧數千其衆乘暴水沿湘而下徑至潭州急攻其城一日而陷李係僅以身

免兵士五萬皆爲賊所殺流屍塞江賊將尚讓乘勝沿流而下進逼江陵王鐸聞係軍敗乃棄城奔襄陽別將劉漢宏大掠江陵之民剽剝不勝其酷士民亡竄山谷江陵焚剽殆盡半月餘賊衆方至江陵三月賊悉衆欲寇襄陽江西招討使曹全晷與襄陽節度使劉巨容謀拒之時營於荆門賊軍一萬屯於團林驛全晷命巨容悉以精甲陣於林薄之中自以騎軍挑戰僞不勝而遁賊大乘之比至荆門其徒不成列巨容發伏擊之賊大潰而走全晷鐵騎急追之比至江陵十俘七八黃巢尚讓以餘衆徒濟江全晷方渡江襲賊遽詔至以段彥謀

爲江南節度使全旼乃還賊遂率舟軍東下攻鄂州陷其郛全旼救至賊遂轉戰江西陷江西饒信杭衢宣歙池等十五州全旼在江西朝廷以王鐸統衆無功乃授淮南節度使高駢爲諸道兵馬行營都統駢令大將張璘渡江討賊屢捷賊衆疫癘其將李罕之以一軍投淮南其衆稍沮是月沙陀寇忻代詔以汝州防禦使諸葛爽爲北面行營副招討率東都防禦兵士赴代州四月甲申朔大雨雹大風拔兩京街樹十二三東都長夏門內古槐十拔七八宮殿鴟尾皆落丁酉制以檢校吏部尚書前太常卿上柱國隴西郡開國公食邑三千戶李

琢爲光祿大夫檢校尚書右僕射御史大夫充蔚朔等
州諸道行營都招討使應東北面行營李孝昌李元禮
諸葛爽王重盈朱玫等兵馬及忻代州土團並取琢處
分以內常侍張存禮充都糧料使判官崔鋌充制置副
使六月代北行營招討使李琢幽州節度使李可舉吐
渾首領赫連鐸等軍討李克用於雲州時克用令其大
將軍傅文達守蔚州高文集守朔州吐渾赫連鐸遣人
說高文集令歸國文集與沙陀首領李友金薩葛都督
米海萬安慶都督史敬存以前蔚州歸款於李琢時克
用率衆禦燕軍於雄武軍九月沙陀三部落李友金等

開門迎天軍克用聞之亟來赴援爲李可舉之兵追擊大敗於藥兒嶺李琢赫連鐸又擊敗于蔚州降文達李克用部下皆潰獨與國昌及諸兄弟北入遼靺部乃以吐渾都督赫連鐸爲雲州刺史大同軍防禦使吐渾白義誠爲蔚州刺史薩葛米海萬爲朔州刺史加李可舉檢校司徒同平章事七月黃巢之衆渡江寇淮南是歲春末賊在信州疫癘其徒多喪淮南將張璘急擊之賊懼以金啗璘仍致書高駢乞保命歸國駢信之厚待其使許求節鉞時昭義武寧義武等軍兵馬數萬赴淮南駢欲收功於已乃奏賊已將殄不在諸道之師並遣還

北賊知諸軍已退以求節鉞不獲暴怒與駢絕請戰駢怒令張璘整軍擊之爲賊所敗臨陣殺璘賊遂乘勝渡江攻天長六合等縣駢不能拒但決陳登水自固而已朝廷聞賊復振大怒詔河南諸道之師屯于澠水官軍大集賊未北渡時兗州節度使齊克攘屯汝州九月徐州兵三千人赴澠水途經許許州節度使薛能前爲徐帥得軍民情徐軍吏至請館能以徐軍懷惠令館於州內許軍懼徐人見襲許州大將周岌自澠水以其戍卒還逐薛能自據其城徐軍以至河陰聞許軍亂徐將時溥亦以戍兵還徐逐節度使支詳齊克讓懼兵見襲亦

還兗州激水諸軍皆散賊聞之十月乃悉衆渡淮黃巢自號率土大將軍其衆富足自淮已北整衆而行不剽財貨惟驅丁壯爲兵耳十一月辛亥朔己巳賊陷東都留守劉允章率分司官屬迎謁之賊供頓而去坊市晏然壬申陷虢州丙子攻潼關守關諸將望風自潰十二月庚辰朔辛巳賊據潼關時左軍中尉田令孜專政宰相盧攜曲事之相與誤謀以至傾敗令孜恐衆罪加己請貶攜官命學士王徽裴徹爲相甲申宣制以戶部侍郎翰林學士王徽裴徹本官同平章事貶右僕射門下侍郎平章事盧攜爲太子賓客攜聞賊至仰藥而死是

日上與諸王妃后數百騎自子城由含光殿金光門出
幸山南文武百官察不之知並無從行者京城晏然是
日晡晚賊入京城時右驍衛大將張直方率武官十餘
迎黃巢於坡頭壬辰黃巢據大內僭號大齊稱年號金
統悉陳文物據丹鳳門僞赦以太常博士皮日休進士
沈雲翔爲學士爲僞赦書云揖讓之儀廢已久矣竄遁
之迹良用憮然朝臣三品已上並停見任四品已下宜
復舊位以趙章爲中書令尚讓爲太尉崔璆爲中書侍
郎平章事時宰相豆盧瑑崔沆故相左僕射劉鄴太子
少師裴諗御史中丞趙蒙刑部侍郎李溥故相于琮皆

從駕不及匿於閭里爲賊所捕皆遇害將作監鄭棊庫部郎中鄭係義不臣賊舉家雉經而死

中和元年春正月庚戌朔車駕在興元以翰林學士承旨尚書戶部侍郎知制誥蕭邁爲兵部侍郎充諸道鹽鐵轉運等使尋以本官同平章事領使如故以宿州刺史劉漢宏爲越州刺史領東軍節度浙江東道觀察處置等使詔太原節度使鄭從讜發本道之師與北面行營招討副使諸葛爽代州刺史北面行營馬步都虞候朱玫夏州將李思恭等行營諸軍並赴京師討賊河中馬步都虞候王重榮逐其帥李郁自稱留後二月代州

北面行營都監押陳景思率沙陀薩葛安慶等三部落
與吐渾之衆三萬赴援關中次絳州沙陀首領翟稽俘
掠絳州叛還景思知不可用遣使詣行在請赦李國昌
父子令討賊以贖罪從之三月陳景思賫詔入達靺召
李克用軍屯蔚州克用因大掠鴈門已北軍鎮以鳳翔
節度使鄭畋守司空門下侍郎同平章事充京西諸道
行營都統與涇原節度使程宗楚秦州經略使仇公遇
鄜延節度使李孝恭夏州節度使拓拔思恭等同盟起
兵傳檄天下黃巢遣大將林言尚讓率衆數萬寇鳳翔
鄭畋率師逆擊大敗賊衆於龍尾陂四月以前大同軍

防禦使李克用檢校工部尚書兼代州刺史鴈門已北
行營兵馬節度等使五月李克用赴代州遂率蕃漢兵
萬人南出石嶺關稱準詔赴難長安丁巳沙陀軍至太
原鄭從讜供給糧料辛酉沙陀求發軍賞錢從讜與錢
千貫米千石克用怒縱兵大掠從讜求援於振武契苾
通自率兵來赴與沙陀戰於晉王嶺沙陀敗走陷榆次
陽曲而退是日大風天雨土特進尚書右僕射趙隱卒
贈司空六月沙陀退還代州車駕幸成都府西川節度
使陳敬瑄自來迎奉七月丁未朔乙卯車駕至西蜀丁
巳御成都府廨改廣明二年爲中和元年大赦天下以

兵部侍郎判度支韋昭度本官同平章事以侍中王鐸
檢校太尉中書令兼滑州刺史義成軍節度鄭滑觀察
處置兼充京城四面行營都統以太子太保崔安潛爲
副觀軍容使西門思恭爲天下行營兵馬都監押中書
侍郎平章事諸道鹽鐵轉運等使韋昭度爲供軍使時
淮南節度使高駢爲諸道行營都統自車駕出幸中使
相繼促駢起軍駢託以周寶劉漢宏不利於已遷延半
歲竟不出軍乃以鐸爲都統以河中節度使王重榮爲
京城北面都統義武軍節度使王處存爲京城東面都
統鄜延節度使李孝章爲京城西面都統朔方軍節度

使拓拔思恭爲京城南面都統以忠武監軍使楊復光爲天下行營兵馬都監代西門思恭許王鐸以便宜從事遣郎官御史分行天下徵兵赴關內八月代北行營兵馬使諸葛爽朱玫拓拔思恭等軍屯渭橋朱玫屯興平爲賊將王璠所擊退保奉天諸葛爽降賊僞署爽河陽節度使許州牙將秦宗權奏破賊於汝州乃授宗權蔡州防禦使昭義節度使高潯與賊將李詳戰于石橋爲賊所敗退歸河中賊乘勝陷同州九月澤潞高潯牙將劉廣擅還據潞州是月潯天井關戍將孟方立率戍卒攻劉廣殺之方立遂自稱留後仍移軍鎮於邢州制

以京城四面催陣使守兵部尚書王徽檢校左僕射兼
潞州大都督府長史昭義節度潞邢洺磁觀察等使貶
高潯端州刺史楊復光王重榮以河西昭義忠武義成
之師屯武功鳳翔節度使鄭畋以病徵還行在以鳳翔
大將李昌言代畋爲節度使兼京城西面行營都統十
月青州軍亂逐節度使安師儒立其行營將王敬武爲
留後十二月行營都統王鐸率禁軍山南東川之師三
萬至京畿屯於盤屋

二年春正月甲辰朔天下勤王之師雲會京畿京師食
盡賊食樹皮以金玉買人於行營之師人獲數百萬山

谷避亂百姓多爲諸軍之所執賣二月涇原大將唐弘夫大敗賊將林言於興平俘斬萬計王處存率軍二萬徑入京城賊僞遁去京師百姓迎處存歡呼叫譟是日軍士無部伍分占第宅俘掠妓妾賊自灞上分門復入處存之衆蒼黃潰亂爲賊所敗黃巢怒百姓歡迎處存凡丁壯皆殺之坊市爲之流血自是諸軍退舍賊鋒愈熾三月前蔚州刺史蘇祐爲沙陀所敗棄郡投鎮州至靈壽部人爲盜祐爲王景崇所殺七月辛丑朔丙午夜西北方赤氣如絳虹竟天賊將尚讓攻宜君若雨雪盈尺甚寒賊兵凍死者十二三八月庚子賊同州防禦使

朱溫殺其監軍嚴實與大將胡真謝曠等來降王鐸承制拜華州刺史潼關防禦鎮國軍等使魏博節度韓簡自率軍三萬攻河陽僞署節度使諸葛爽棄城而去簡遣大將守河橋而還九月賊以黃鄴爲華州刺史初賊以李詳守華州詳與朱溫素善及溫歸河中黃巢遣闖官後冗率功臣馬千匹至華殺詳以鄴代歸太原諸山桃杏有花實十月西北方無雲而雷名天狗墜以嵐州刺史湯羣爲懷州刺史時羣倚沙陀爲援朝廷疑而易之鄭從讜遣人傳官告授羣羣怒殺使者據城內沙陀魏博節度使韓簡以兵攻鄆州節度使曹全晟拒之爲

簡所敗執而殺之全最大將朱瑄以餘衆保鄆州乞和於簡簡捨之而去十一月沙陀李克用監軍陳景思以部落之衆一萬七千騎自嵐石州路赴河中賊將李詳下牙隊斬華州守將歸明王鐸用其部將王遇爲華州刺史十二月己亥朔庚戌成德軍節度鎮冀深趙觀察處置等使開府儀同三司檢校太尉中書令上柱國常山郡王食邑六千戶王景崇卒贈太傅諡曰忠穆遺表請以子鎔續繼戎事遂以鎔爲兵馬留後

三年春正月戊辰朔車駕在成都府鴈門節度使檢校工部尚書李克用率師至河中己巳沙陀軍進屯沙苑

之乾坑二月沙陀攻華州刺史黃勣出奔至石堤谷追
擒之魏博節度使韓簡再興兵討河陽諸葛爽遣大將
李罕之拒之於武陟逆擊之魏軍大敗而還大將樂彥
貞先據魏州韓簡爲部下所殺推彥貞爲留後就加李
克用檢校尚書左僕射忻代雲蔚等州觀察處置等使
三月丁卯朔壬申沙陀軍與賊將趙章尚讓戰于成店
賊軍大敗追奔至良天坡橫屍三十里王重榮築屍爲
京觀四月丁酉朔庚子沙陀忠武義成義武等軍趨長
安賊悉衆拒之於渭橋大敗而還李克用乘勝追之已
卯黃巢收其殘衆由藍田關而遁庚辰收復京城天下

行營兵馬都監楊復光上章告捷行在曰頃者妖興霧
帀嘯聚叢祠而岳牧藩侯備盜不謹謂大同之運常可
容姦謂無事之秋縱其長惡賊首黃巢因得充盈窟穴
蔓延萑蒲驅我蒸黎徇其兇逆展鉏鶴以成鋒刃殺耕
牛以恣燔炮魑魅晝行虺蜴夜噬自南海失守湖外喪
師養虎災深馴梟逆大物無不害惡靡不爲豺狼貽朝
市之憂瘡痍及腹心之痛遂至毒流萬姓盜污兩京衣
冠銜塗炭之悲郡邑起丘墟之歎萬方共怒十道齊攻
仗九廟之威靈殄積年之兇醜河中節度使王重榮神
資壯烈天賦機謀誓立功名志安家國至於屯田待敵

率士當衝收百姓十萬餘家降賊黨三萬餘衆法能持
重功遂晚成久稽原野之刑未決雷霆之怒自收同華
進逼京師夕烽高照於國門遊騎頻臨於灞岸旣知四
隅斷絕百計奔衝如窮鳥觸籠似飛蛾赴焰鴈門節度
使李克用神傳將略天付忠貞機謀與武藝皆優臣節
共本心相稱殺賊無非手刃入陣率以身先可謂雄才
得名飛將統領本軍南下與臣同力前驅雖在寢興不
忘寇孽今月八日遣衙隊將前鋒守宗河中騎將白志
遷橫野軍使滿存躡雲都將丁行存朝邑鎮將康師貞
忠武黃頭軍使龐從等三十二都隨李克用自光泰門

先入京師力摧寬逆又遣河中將劉讓王瓌冀軍武孫
珙忠武大將喬從遇鄭滑將韓從威荆南大將申屠棕
滄州大將賈滔易定大將張仲慶壽州大將張行方天
德大將顧彥朗左神策弩手甄君楚公孫佐橫衝軍使
楊守亮躡雲都將高周彝忠順都將胡貞絳州監軍毛
宣伯聶弘裕等七十都繼進賊尚爲堅陣來抗官軍李
克用率勵驍雄整齊金革叫譟而聲將動瓦喑鳴而氣
欲吞沙寬列戈矛麾軍夾擊自卯至申兇徒大敗自望
春宮蹙殺至昇陽殿合圍戈不濫揮矢無虛發其賊卽
時奔遁散入商山徒延漏刃之生佇作飲頭之器伏自

收平京國三面皆立大功若破敵摧鋒鴈門實居其首
其餘將佐同効驅馳兼臣所部二萬餘人數歲櫛風沐
雨旣茲盪定並錄以聞報至從官稱賀五月制以河中
節度使檢校尚書右僕射王重榮檢校司空同平章事
餘如故鴈門已北行營節度忻代蔚朔等州觀察處置
等使檢校尚書左僕射代州刺史上柱國食邑七百戶
李克用檢校司空同平章事兼太原尹北京留守充河
東節度管內觀察處置等使義武軍節度使檢校司空
王處存檢校司徒同平章事餘如故以檢校尚書右僕
射華州刺史潼關防禦等使朱溫檢校司空兼汴州刺

史御史大夫充宣武節度觀察等使仍賜名全忠京城西北營都統充金紫光祿大夫檢校司空邠州刺史邠寧節度使朱玫就加同平章事進封吳興縣侯食邑一千戶鄜坊節度使金紫光祿大夫檢校尚書右僕射東方達就加同平章事王鐸罷行營都統依前檢校太師中書令進封晉國公加食邑二千戶節度觀察使如故時中尉田令孜用事自負帷幄之功以鐸用兵無功而由楊復光建策召沙陀成破賊之効欲權歸北司乃黜王鐸而悅復光也就加諸道行營兵馬都監楊復光開府儀同三司弘農郡開國公食邑三千戶充同華等州

管內制置使仍賜號資忠耀武匡國平難功臣六月乙未朔甲子楊復光卒於河中其部下忠武八都都頭鹿晏弘晉暉王建韓建等各以其衆散去時復光兄復恭知內樞密田令孜以復光立破賊功憚而惡之故賊平賞薄及聞復光死甚悅復擯復恭罷樞密爲飛龍使是月黃巢圍陳州營於州北五里初賊出藍田關遣前鋒將孟楷攻蔡州刺史秦宗權以兵逆戰爲楷所敗宗權勢窘與賊通和孟楷移兵攻陳州刺史趙犇示弱伏兵擊之臨陣斬楷楷賊之愛將深惜之黃巢怒悉衆攻陳州時黃巢與宗權合從縱兵四掠遠近皆罹其酷時仍

歲大饑民無積聚賊俘人爲食其炮炙處謂之春磨寨
白骨山積喪亂之極無甚於斯賊攻城急徐州節度使
時溥許州周岌汴州朱全忠皆出師護援之七月制以
西川節度使開府儀同三司守太尉同平章事成都尹
上柱國潁州郡王食邑三千戶實封四百戶陳敬瑄賜
鐵券詔鄭從讜赴行在八月李克用赴鎮太原制以前
振武節度檢校司空兼單于都護御史大夫李國昌爲
檢校司徒代州刺史鴈門已北行營節度蔚朔等州觀
察等使十月李國昌卒十一月蔡賊秦宗權圍許州十
二月詔河東李克用赴援陳許忠武大將鹿晏弘陷興

元逐節度使牛蔚自爲留後

四年春正月癸亥朔車駕在成都府二月河東節度使李克用將出師援陳許河陽節度使諸葛爽以兵屯澤州拒之三月壬戌朔甲戌克用移軍自河中南渡東下洛陽四月辛卯朔甲寅沙陀軍次許州節度使周岌監軍田從異以兵會戰賊將尚讓屯太康黃鄴屯西華稍有芻粟已未沙陀分兵攻太康西華賊砦庚申尚讓黃鄴遁去官軍得其芻粟黃巢亦退保郾城以兵部侍郎判度支鄭昌凝以本官同平章事五月辛酉朔癸亥沙陀追黃巢而北丁卯次尉氏戊辰大雨平地水深三尺

溝河漲溢賊至中牟臨汴河欲渡沙陀遽至賊大駭其
黨分潰殺傷溺死殆半尚讓一軍降時溥別將楊能李
讜霍存葛從周張歸霸等降朱全忠李周楊景彪以殘
衆走封丘己巳沙陀渡汴河趨封丘黃巢兄弟悉力拒
戰李克用擊敗之獲所俘男女五萬口牛馬萬餘并僞
乘輿法物符印寶貨戎仗等三萬計得巢幼子年六歲
黃巢旣敗以其殘衆東走庚午李克用急躡黃巢一日
夜行二百里馬疲乏死者殆半宿寃胸糧運不及騎軍
至寡乃與忠武監軍田從異班師甲戌次汴州節度使
朱全忠館克用于上源驛全忠以克用兵力寡弱大軍

在遠乃圖之是夜置酒郵舍克用既醉全忠以兵圍驛縱火燒之雷雨驟作平地水深尺餘克用踰垣僅免其部下三百餘人及監軍使史敬思書紀任珪皆被害丙子克用至許州率本軍還太原庚辰徐州將李師悅陳景思率兵萬人追黃巢於兗州六月鄆州節度使朱瑄奏大敗賊於合鄉秋七月己未朔癸酉賊將林言斬黃巢黃揆黃秉三人首級降時溥初徐將李師悅與賊戰于瑕丘賊殊死戰其衆殆盡林言與巢走至太山狼虎谷之襄王村懼追至併命乃斬賊降師悅壬午捷書至行在從官稱賀河東節度使李克用累表訴屈請討汴

州天子優詔和解之就加克用階特進封隴西郡王以
悅之自是全忠克用有尋戈之怨九月山南西道節度
使鹿晏弘爲禁軍所討棄城擁衆東出襄鄧大掠許州
晏弘大將王建韓建張造晉暉李師泰各率本軍歸朝
田令孜以建等楊復光故將薄之皆授諸衛將軍惟以
王建爲壁州刺史十月關東諸鎮上章請車駕還京十
一月鹿晏弘陷許州殺周岌自稱留後尋爲秦宗權所
攻制以義成軍節度檢校太師中書令上柱國晉國公
王鐸爲滄州刺史義昌軍節度滄德觀察處置等使十
二月丁亥朔大明宮留守權知京兆尹御史大夫京畿

制置等使王徽與留司百官上表請車駕還宮詔以來年正月還京新除滄德節度使王鐸爲魏博節度使樂彥禎害之於漳南縣之高雞泊行從三百餘人皆遇害光啟元年春正月丁巳朔車駕在成都府己卯僖宗自蜀還京二月丁亥朔丙申車駕次鳳翔三月丙辰朔丁卯車駕至京師己巳御宣政殿大赦改元光啟時李昌符據鳳翔王重榮據蒲陝諸葛爽據河陽洛陽孟方立據邢洛李克用據太原上黨朱全忠據汴滑秦宗權據許蔡時溥據徐泗朱瑄據鄆齊曹濮王敬武據淄青高駉據淮南八州秦彥據宣歙劉漢宏據浙東皆自擅兵

賦迭相吞噬朝廷不能制江淮轉運路絕兩河江淮賦不上供但歲時獻奉而已國命所能制者河西山南劔南嶺南西道數十州大約郡將自擅常賦殆絕藩侯廢置不自朝廷王業於是蕩然蔡賊秦宗權侵寇藩鄰制以徐州節度使時溥爲鉅鹿王充蔡州四面行營兵馬都統宗權將秦賢攻汴鄭不已以汴州刺史朱全忠爲沛郡王充蔡州西北面行營都統杭州刺史董昌大敗劉漢宏之衆進攻越婺台明等州下之遂以昌爲越州刺史鎮東軍節度浙江東道觀察等使以杭州大將錢鏐爲杭州刺史閏三月鎮冀節度使王鎔獻耕牛千頭

農具九千兵仗十萬四月乙卯朔以開府儀同三司右金吾衛上將軍左街功德使齊國公田令孜爲左右神策十軍使時自蜀中護駕令孜招募新軍五十四都都千人左右神策各二十七都分爲五軍令孜總領其權時軍旅旣衆南衙北司官屬萬餘三司轉運無調發之所度支惟以關畿稅賦支給不充賞勞不時軍情咨怨舊日安邑解縣兩池榷鹽稅課鹽鐵使特置鹽官以總其事自黃巢亂離河中節度使王重榮兼領榷務歲出課鹽三千車以獻朝廷至是令孜以親軍闕供計無從出乃舉廣明前舊事請以兩池榷務歸鹽鐵使收利以

瞻禁軍詔下重榮上章論訴言河中地窘悉籍鹽課供軍五月制以河中節度使檢校司徒同平章事河中尹上柱國琅邪郡王王重榮爲檢校太傅同平章事兼兗州刺史兗沂海節度觀察處置等使代齊克讓以克讓檢校司徒兼定州刺史御史大夫充義武節度觀察北平軍等使代王處存以處存依前檢校太傅同平章事河中尹河中晉慈隰節度觀察等使是月宰臣蕭遘率文武百寮上徽號曰至德光烈孝皇帝御宣政殿受冊大赦六月甲寅朔丙辰定州王處存奏幽州節度使李可舉鎮州節度使王鎔各令大將率領兵士侵攻當道

臣並已殺退時李可舉乘天子播越中原大亂以河朔三鎮休戚事同惟易定二郡爲朝廷所有乃同議攻處存以分其地會燕將李全忠有奪帥之志軍情相疑全忠方圍易州處存出奇騎以擊之燕軍大敗是月全忠收合殘衆攻幽州李可舉舉室登樓自焚而死全忠自稱留後滄州軍亂逐其帥楊令孜立衙將盧彥威爲留後制以保鑾都將檢校司徒兼黔州刺史黔中節度觀察等使曹誠檢校太保兼滄州刺史充義昌軍節度滄德觀察等使河中王重榮累表論列數令孜離間方鎮令孜遣邠寧節度使朱玫會合鄜延靈夏之師討河中

九月朱玫屯沙苑王重榮求援於太原十月李克用率太原軍南出陰地關十一月河中太原之師與禁軍對壘於沙苑十二月辛亥朔癸酉官軍合戰爲沙陀所敗朱玫走還邠州神策軍潰散遂入京師肆掠乙亥沙陀逼京師田令孜奉僖宗出幸鳳翔初黃巢據京師九衢三內宮室宛然及諸道兵破賊爭貨相攻縱火焚剽宮室居市間里十焚六七賊平之後令京兆尹王徽經年補葺僅復安堵至是亂兵復焚宮闕蕭條鞠爲茂草矣二年春正月辛巳朔車駕在鳳翔李克用旋師河中與朱玫王重榮同上表請駕駐蹕鳳翔仍數田令孜之罪

乃以飛龍使楊復恭復知內樞密事戊子田令孜迫乘輿請幸興元庚寅車駕次寶雞授刑部尚書孔緯兼御史大夫令率從官赴行在時車駕夜出宰相蕭邁裴徹鄭昌圖及文武百寮不之知扈從不及故令孔緯促之蕭邁惡令孜弄權再亂京國因邠州奏事判官李松年至鳳翔乃令亟召朱玫迎奉癸巳朱玫引步騎五千至鳳翔令孜聞邠州軍至奉帝入散關令禁軍守靈壁玫至禁軍潰散遂長驅追駕至尊途驛嗣襄王熅疾爲玫所得時興元節度使石君涉聞車駕入關乃毀徹棧道柵絕險要車駕由他道僅達爲邠州軍踵後崎嶇危殆

者數四二月辛亥朔以十軍觀軍容使開府田令孜爲
劍南西川節度監軍以內樞密使楊復恭爲神策左軍
中尉三月庚辰朔戊午興元節度使石君涉棄城入朱
玫軍內丙申車駕至興元戊辰以翰林學士承旨兵部
尚書知制誥杜讓能爲兵部侍郎刑部尚書御史大夫
孔緯爲兵部侍郎充諸道鹽鐵轉運等使並以本官同
平章事保鑾都將李鋌楊守亮楊宗守等敗邠州軍於
鳳州四月庚戌朔是夜熒惑犯月角壬子朱玫李昌言
迫宰相蕭遘等於鳳翔驛舍請嗣襄王熾權監軍國事
玫自爲大丞相兼左右神策十軍使遂驅率文武百寮

奉襄王還京師五月己卯朔庚辰襄王僭卽皇帝位年號建貞以蕭邁初沮襄王監國之命罷知政事爲太子少師以朱玫爲侍中諸道鹽鐵轉運使以裴徹爲門下侍郎右僕射同平章事判度支中書侍郎刑部尚書平章事鄭昌圖判戶部事蕭邁移疾歸河中之丞樂僞制加諸侯官爵以淮南節度使檢校太尉兼侍中高駢爲太師中書令江淮鹽鐵轉運諸道行營兵馬都統又以淮南右都押衙和州刺史呂用之檢校兵部尚書兼廣州刺史嶺南東道節度使令戶部侍郎柳涉往江淮宣諭戶部侍郎夏侯潭河北宣諭諸藩節將多授其僞署

惟定州太原宣武河中拒而不受是月星孛於箕尾歷
北斗攝提荆南襄陽仍歲蝗旱米斗三十千人多相食
楊復恭兄弟於河中太原有破賊連衡之舊乃奏遣諫
議大夫劉崇望賫詔宣諭達復恭之旨王重榮李克用
欣然聽命尋遣使貢奉獻縑十萬匹願殺朱玫自贖崇
望使還君臣相賀六月己酉朔以扈蹕都將楊守亮爲
金州刺史金商節度京畿制置使守亮率師二萬趨金
州與王重榮李克用掎角進軍時朱玫遣將王行瑜率
邠寧河西之師五萬屯鳳州保鑾都將李鋌李茂貞陳
珣等抗之於大唐峰七月戊寅朔蔡賊秦宗權陷許州

殺鹿晏弘以金商節度使楊守亮檢校司徒兼興元尹
充南山西道節度等使王行瑜急攻興州守亮出師擊
敗之八月幽州節度使李全忠卒三軍立其子匡威爲
留後九月楊守亮復敗邠州軍於鳳州軍容楊復恭密
遣人說王行瑜令謀歸國十月壬子朔滑州軍亂逐其
帥安師儒推衙將張驍主留後軍務師儒奔汴州朱全
忠殺之遂以兵攻滑斬張驍以告行在朝廷以汴帥全
忠兼領義成軍節度使壬辰夜白虹見西方十一月蔡
賊孫儒陷鄭州刺史李璠遁免儒引軍攻河陽十二月
乙巳朔是月朱玫愛將王行瑜受密詔自鳳州率衆還

長安辛酉行瑜斬朱玫及其黨與數百人縱兵大掠是冬苦寒九衢積雪兵入之夜寒冽尤劇民吏剽剝之後僵凍而死蔽地裴徹鄭昌圖及百官奉襄王奔河中王重榮給稱迎奉執李煜斬之械裴徹鄭昌圖於獄文武官寮遭戮者殆半重榮函襄王首赴行在刑部奏請御興元城南門閱俘馘受賀下禮院定儀注博士殷盈孫奏曰伏以僞煜違背宗社僭竊乘輿欺天之禍旣盈盜國之罪斯重果至覆敗以就誅夷九重之妖祲旣除萬國之生靈共慶宜陳賀禮以顯皇猷然物議之間有所未允臣按禮經公族有罪獄旣具有司聞於公曰某之

罪在大辟君曰赦之如是者三有司走出致刑君復使謂之曰雖然固當赦之有司曰不及矣君爲之素服不樂三月左傳衛君在晉衛臣元咺立衛君之弟叔武衛君入國叔武爲前驅所殺衛君哭之左氏書焉今僞熅皇族也雖犯殊死之罪宜就屠戮其可以朝羣臣而受賀乎臣以爲熅亂係金枝名標玉牒迫脅之際不能守節効死而乃甘心逆謀罪實滔天刑不可赦已爲軍前處置宜卽黜爲庶人絕其屬籍其首級仍委所在以庶人禮收葬大捷之慶當以朱玫首級到日稱賀爲得其宜上不軫于宸衷下無傷於物體協禮經之旨祛中外

之疑遂罷賀禮及朱玫傳首至乃御樓受俘馘是月蔡賊孫儒陷河陽諸葛爽奔歸汴州別將李罕之出據澤州張全義據懷州

三年春正月乙亥朔車駕在興元府制以邠州都將王行瑜檢校刑部尚書兼邠州刺史邠寧慶節度使保鑾都將李鋌檢校司空黔州刺史黔中節度觀察使扈蹕都頭李茂貞爲檢校尚書左僕射洋州刺史武定軍節度使扈蹕都頭楊守宗爲金州刺史金商節度等使保鑾都將陳珮檢校尚書右僕射爲宣州刺史宣歙觀察使兵部侍郎諸道租庸使張濬本官同平章事二月乙

已朔潤州牙將劉浩度支使薛朗同謀逐其帥周寶劉浩自稱留後三月乙亥朔甲申車駕還京次鳳翔以宮室未完節度使李昌符請駐蹕以俟畢工河中械送僞宰相裴徹鄭昌圖命斬之於岐山縣太子少師致仕蕭遘賜死於永樂縣以特進監修國史門下侍郎吏部尚書平章事孔緯領諸道鹽鐵轉運使以集賢殿大學士中書侍郎兵部尚書平章事杜讓能進封襄陽郡公增食邑三千戶四月甲辰朔揚州牙將畢師鐸自高郵率戍兵攻揚州下之囚高駢於別室自總軍政蔡賊秦賢攻汴州周列三十六砦朱全忠乞師於兗鄆朱瑾率師

來赴屯封禪寺朱瑄屯靜戎鎮五月甲戌朔乙亥秦宗
權自率衆來應秦賢壬午鄆兗汴三鎮之師大破蔡賊
於邊孝村宗權退走孫儒聞秦賢敗盡驅河陽之人殺
之投尸於河焚燒間井而去王師收孟洛許汝懷鄭陝
虢等州詔以扈駕都頭楊守宗權知許州事汴將孟從
益權知鄭州事諸葛爽舊將李罕之自澤州收河陽懷
州刺史張全義收洛陽揚州牙將畢師鐸召宣州觀察
使秦彥入揚州推爲節度使六月癸卯朔戊申天威軍
都頭楊守立與李昌符爭道麾下相歐上命中使諭之
不止是夜嚴兵爲備己酉守立以兵攻昌符戰于通衢

昌符兵敗出保隴州命扈駕都將李茂貞攻之甲寅河中牙將常行儒殺其帥王重榮推重榮兄重盈爲兵馬留後丙辰太常禮院奏太廟十一室并祧廟八室孝明太后等別廟三室自車駕再幸山南並經焚毀神主失墜今大駕還京宜先葺宗廟神主然後還宮遂詔修奉太廟使宰相鄭延昌修奉是時宮室未完國力方困未暇舉行舊制延昌請權以少府監大廳爲太廟太廟凡十一室二十三間間十一架今監五間請添造成十一間以備十一室之數勅曰敬依典禮七月壬申朔隴州刺史薛知籌以城降李茂貞遂拔隴州斬李昌符昌仁

等傳首獻于行在丙子制以武定軍節度使檢校尚書
左僕射兼洋州刺史御史大夫上柱國隴西郡公食邑
一千五百戶李茂貞檢校司空同平章事兼鳳翔尹鳳
翔隴右節度等使九月辛未朔淮南節度使高駢爲其
牙將畢師鐸所殺楊行密急攻廣陵蔡賊秦宗權遣其
將孫儒將兵三萬渡淮爭揚州城中食盡十一月秦彥
畢師鐸潰圍奔于孫儒軍行密入據揚州秦彥引孫儒
之兵攻廣陵行密遣使求援于朱全忠制授全忠檢校
太尉侍中兼揚州大都督府長史充淮南節度觀察等
使行營兵馬都統汴將李璠率師至淮口以援之十二

月己巳朔東川節度使顧彥朗壁州刺史王建連兵五萬攻成都陳敬瑄告難于朝詔中使諭之

文德元年春正月己亥朔車駕在鳳翔制故鳳翔隴右節度觀察處置等使檢校司徒同平章事兼鳳翔尹上柱國榮陽郡開國公食邑三千戶鄭畋贈司徒諡曰文昭蔡賊孫儒斬秦彥畢師鐸于高郵二月己巳朔壬午車駕在鳳翔至京師魏博軍亂逐其帥樂彥禎彥禎子相州刺史從訓率衆攻魏州牙軍立其小校羅宗弁爲留後出兵拒之從訓求援於汴朱全忠遣將朱珍渡河赴之戊子上御承天門大赦改元文德宰相韋昭度兼

贊曰運曆將窮人君幼冲塵飛巨盜波駭羣雄天旣降
喪人罕輸忠廻鑿返正禁旅之功

舊唐書卷十九下

舊唐書卷十九下考證

僖宗本紀乾符元年十二月詔具務多上之辦寧亂整
上之師○臣德潛按二上字誤以重點爲上乃多多
之辦整整之師也已改正

二年春正月宰相崔彥昭率文武百僚上尊號上御正
殿受冊○新書在元年十一月

二月以吏部侍郎裴坦爲兵部侍郎充諸道鹽鐵轉運
使○臣德潛按新書坦于乾符元年二月入相五月

已薨顯然互異但兩書無傳可考未知孰是

三年春正月浙西奏誅王郢徒黨○臣德潛按新書不

著郢誅年月綱目書四年閏二月王郢衆降郢走明州敗死則此時尚未平也疑誤

六月以門下侍郎崔彥昭兼左僕射○六月二字衍文以上已書六月也

四年五月以前綿州刺史皇甫鏞爲秘書少監○沈炳震曰鏞係皇甫鏞弟本傳于開成初卒鏞字疑誤

中和元年秋七月丁未朔乙未車駕至西蜀○新書正月壬子幸成都通鑑亦在正月

八月諸葛爽降賊僞署爽河陽節度使○新書在廣明元年十二月據傳當從新書

光啓二年夏五月襄王僭卽皇帝位○新書在十月丙午綱目同新書

三年六月詔修奉太廟使宰相鄭延昌修奉○沈炳震曰舊書昭宗大順二年十二月入相新書景福元年三月入相僖宗時總未相也此條已書宰相而前無同平章事文明係錯誤

文德元年二月宰臣韋昭度率文武百僚上徽號曰聖文睿德光武弘孝皇帝○沈炳震曰此乃大順元年上昭宗徽號非僖宗也應誤